


Metaphors



6

6-d

20



Bibliotheca

i Coll. Rom.

Societ. Jesu

6-6.d.20

13.3.5.

13

13


f


f

16

22









# DE INVEN

TIONE ET AMPLI-  
ficatione oratoria : seu, Vsu  
locorum, libri

tres.

\*

GERARDO BVKOLDIA-  
NO AVTORE.

VIRTUTE DVCE,



COMITE FORTVNA.

APVD SEB. GRYPHIUM  
LVGDVNI,  
1535.



*Primo libro dialecticorum rhetorumq; communes loci explicantur.*

*Secundo quæ ex locis inueniendi, & amplificandi ratio sit in genere demonstratiuo.*

*Tertio ut ex locis inueniendum, & ad fidem motumq; animorum amplificandum sit, in genere deliberatiuo.*

*Capita librorum post Prologum ponuntur.*

# AMPLISSIMO

PRINCIPIQUE VIRO IN

clytæ Bononiensis Reipub. Præsidi gra-

uissimo Francisco Guicciardino

Gerardus Bukoldianus

S. P. D.



VANQVAM non iniqui ijs  
esse hospibus soleamus, qui, unde-  
cunq; gentium ueniant, nos sibi  
uel qualicunque munusculo con-  
ciliare student, quod natura affert  
ut bene uolentibus nobis uicissim  
faueamus, me tamen hospitem, hos

scriptos à me de inuentione & amplificatione oratoria  
libros pluribus communicaturum, nescio quis de homi-  
num iudicijs timor inuasit: ut quos studiosos iuuandi,  
mihiq; demerendi studio impulsus conscripserim, edere  
nunc, atq; in lucem dare formidem. Itaque plurimum in  
hoc positum esse ratus, si is, cui primum offeram, dedi-  
cemq;, non modò dignitate, sed & eruditione iudicioq;  
excellat: ut si quid meum hunc laborem studiosæ iuuen-  
tuti profuturum putet, non modò timidum sua autori-  
tate protegat, sed & animo metum de hominum iudi-  
cijs omnem eximat. Quare equidem, dum oculos cir-  
cunferens hunc quæro, plures quidem Heroas summo  
dignitatis splendore florentissimos cerno: qui uero sum-  
mis Fortunæ bonis plurimarum, maximarumq; artium  
\* 2 cogni



cognitionem, ceteraq; animi pulcherrima bona adiunxerit, unus uisus es princeps prudentissime, qui ceteros omnes multis passibus præcurris. Neque enim insigni modò utriusque linguæ, minimeq; uulgari cognitione, quod in principe uiro rarissimum est, te præditum agnoscimus, sed & eundem te iureconsultum expertissimum, historiarum scientissimum, oratorem uero maxime insignem cum ceteris multis, præclarisq; prudentiæ, iustitiæ, fortitudinis, modestiæ, humanitatisq; uirtutibus ornatum planè admiramur. Atque his tot tantisq; ingenij, animiq; dotibus fretus, maximis in rebus prudenter, dextreque gerendis, ea etiam felicitate semper es cognitus, ut cum humana consilia Fortunæ telis obnoxia esse intelligantur, tibi hæc cessisse, atque in te, quasi nimis munitum αὐτοῦ fuisse uideatur. Itaque cum te ad res bene gerendas natura fecerit, humanitatis studia instruxerint, ratio exercuerit, & ipsa Fortuna sola in te hostis uideri, suamq; prudentibus tuis inceptis consilijsq; felicitatem denegare noluit. Quapropter summis his spectatis in te bonis sapientissimi, maximiq; Pontifices Romani Leo & Clemens, non pace modo in recte administrandis primarijs Ecclesiæ ciuitatibus, atq; prouincijs, multis abhinc annis felicissime tua usi sunt opera, sed & difficilimis illis belli temporibus, quibus hominum temporumq; uitio, potentissimos in Reges arma sumere sunt coacti: ubi te semper in ducendis exercitibus, rebusq; fortiter gerendis, primum consilij atque autoritatis locum obtinere uoluerunt. Itaque cum pace gubernandi dexteritate, non unius modo Reipub. sed

## EPISTOLA NVNCVPAT.

sed totius prouinciæ splendor atque ornamentum, bello autem idem ipse rem fortiter gerendo, recteq; in futurum consulendo, ad frangendos, declinandosq; hostium impetus quasi propugnaculum, firmamentumq; esse uideare, non mirandum, si Clemens Pontifex Maximus proxinis his annis, nouo planè exemplo te, cum sacerdotalibus infulis id munus debeatur, ad nobilissimæ, potentissimæq; Urbis Bononiensis gubernacula constitucrit: quibus accepto, sic te geris, ut quamuis maximam, tranquillissimam tamen, optimeq; constitutam Rempub. teneas. Ita enim pro tua prudentia longius in futurum prospicis, & nocitura declinas, ita quæ ad sunt præsentia iuste, fortiter, temperanterq; administras, ut consilia quidem tua, summamq; prudentiam admirari, facta autem omnia laudare uel inimici cogantur. Neque enim tuo in imperio ulla uiolentia. tyrannisq;, sed æquitas, clementiaq;: non fastus, & cuiusquam contemptus, sed humanitate, facilitateq; moderata grauitas: non denique ullius rei negligentia, sed summa uigilantia, diligentiaq; conspicitur. Quare his tot, tantisq; animi tui bonis summo Pontifici sæpius cognitis atque perspectis, non contentus te, quanquam potentissimam, pulcherrimamq; hanc Bononiensem, unicam tamen Rempub. felicissime administrare, sed & ad se uocatum, cum aliàs sæpiissime magnis de momentis, tum hac tempestate, dum nunc pro salute Reipub. Christianæ cum Carolo Cæsare, nunc maximis de rebus cum Gallorum Rege consultat, præcipuum in consilium adhibet: ubi, quo plus cæteris præstas, meliorq; es, hoc

## EPISTOLA NVNCVPAT.

te magis de rebus humanis bene mereri, tuæ prudentiæ est posse, iustitiæ uero etiam uelle. Iam uero cum & nobilissimum hic Bononiæ gymnasium, à Theodosio optimo Imperatore maximis ad id datis uestigalibus eo consilio sit institutum, ut hinc eruditi in reliquam totam Europam mitterentur, qui religionem, Rerum'que pub. statum recte conseruarent, gaudet iuuentus, te urbis, suiq; gymnasij gubernatorem, rectoremq; contigisse, quem de literis, rectisq; studijs optime iudicare, & bene consultum uelle intelligunt. Magnum profecto, & sanctum huius urbis apud exterarum gentes omnes nomen est: quod suos huc mittant, hinc repetant, per quos diuina, humanaq; omnia recte conseruari posse confidunt. Itaque si quid hic forte lapsus sit, ex omnium uotis feceris, si cum munificentissimo Senatu rursus erigas, atque confirmes. Nulla profecto res est, cum honestior, tum rebus humanis magis necessaria, quam ut literarum studia, quibus neglectis obbrutescendum est, rectissime conseruentur. Vident hoc & Veneti prudentissimi homines: qui liberalissimis datis stipendijs, iuuentutis studijs optime Patavij consulunt. Cum igitur te Princeps humanissime, & dignitate excellentissimum, & eruditione, pulcherrimisq; animi bonis ornatissimum, inter ceteros coryphæum esse intelligam, hos à me hic Bononiæ scriptos de inuentione, & amplificatione oratoria libros, quod à me primum, quaecunq; sit tractatum argumentum est, tuæ amplitudini offero, dedicoq;: ut si quid pro tuo iudicio, quod exactissimum est, studiosis profuturos putes, de hominum iudicijs sollicitum

me

## P R O L O G V S.

me tua autoritate protegas: sin minus, meæ tibi in studiosos uoluntatis testimonium existant. Fecimus autem qualia hospes potuit, cui nec magna librorum comes esse supellex, nec honor, præmium uel solet, quæ magnas res agentibus, multumq; defatigatis, addere calcaria solent: quæ si probabuntur, maiora aliquando nobis molienda erunt: sin minus, argumento erunt, rectis me studijs bene prospectum uoluisse. Vale. Bononiæ Calendis Ianuarij. M. D. XXXIIII.

## P R O L O G V S.



V M omnium animantium solus homo, rationis, doctrinæq; capax, literarum beneficio, non modò animi sensa stylo mandet, aliorumq; uicissim legendo intelligat, sed et de rebus diuinis humanisq; recte iudicet, eos profecto, ut de rebus humanis optime meritos, semper magni putauì, qui hanc in animis hominum literariam industriam scriptis suis, uel qualibuscunq; aluerunt, conseruaruntq;. Nam cum educare foetum, quærere uictum, declinare mala, sequi bona, aliaq; id genus multa, ipsa nobis natura cum brutis animantibus communia esse uoluisset, sola est literarum cognitio, quæ res diuinas, humanasq; complexa fouet, conseruatq;: qua qui animum excoluerunt, non secus rudibus præstare hominibus, quàm ipsi subinde brutis antecellere, suo iure creduntur. Cæterum in dandis, cum et aliarum artium, tum maxime rhetorices præceptis, tot,

\* 4      tantiq;



## P R O L O G V S.

tantiq; diligentes extiterunt, ut qui post hos ad scriben=  
 dum se contulerunt, quia nihil firè, nisi inde sumptum,  
 aliena subinde fide traderent, partim consilio, quod  
 compendio suo uiam iuuentuti sternere ad ipsos auto=  
 res uoluerunt, partim solo iuuandi studio, uoluntateq;  
 potius, quàm ipsa opera, laudem meruisse uidentur.  
 Itaque omnem hætenus operam in docendo collocans,  
 aut interpretandis, aut scholijs utcunq; illustrandis classi=  
 cis autoribus, quos potui, iuui: tenuissimq; hunc cur=  
 sum lubenter, nisi iuuandi studio impulsus, ea me alla=  
 turum in præsentia putarem, quæ non tam ab alijs ex=  
 professo tradita uiderem, quàm profutura quidem, si  
 quis recte tractet, intelligerem. Vtinam onus hoc,  
 quod in humeros grauissimum suscepi, tam ad finem  
 perferre possẽm, quàm multos iuuare ex animo cupe=  
 rem. Quod si ex uoto minus succedit, hic tamen, qua=  
 liscunque meus labor, argumento erit, humanitatis stu=  
 dijs ex animo me bene consultum uoluisse. Scriptu=  
 rus igitur de locis, & quæ sit ex his, in unoquoque  
 caussarum, seu potius rhetorices genere inueniendi,  
 amplificandiq; ratio: ostensurusq;, ex paucis numero  
 locis, omnia ad faciendam fidem, amplificandum, affe=  
 ctusq; mouendos, denique ad omnem orationis orna=  
 tum, ueneresq; trahi. Quod dum ago, & apparebit,  
 qui quibus in rhetorices generibus autores uersan=  
 tes, alij simul ad fidem, exornandumq;, ut rhetores, alij  
 ad delectandum modo, amplificandumq;, ut heroici ua=  
 tes, historiciq;, ex paucis admodum, iisdemq; ex locis  
 omnia duxerint. Atq; hic quidem inuitus de inuentione  
scribo,



## P R O L O G V S.

scribo, quam à multis, clarisq; autoribus traditam uideo. Verum cum ita natura comparatum sit, ut ijsdem ex locis, & ad fidem, & ad amplificandum ducantur omnia, licebit mihi omnium pace, ea coniuncta tradere, quæ natura iuncta, seiungi nulla ratione possunt: in quo tamen & operam dabo, ut quantam potero, & his rebus lucem adferam. Primum igitur locos explicandos sumo: deinde horum usum in unoquoq; rhetorices genere trado. Quam autem non modò iucundum studioso, sed & maxime necessarium sit, uidere in classicis autoribus, atque adeo in omni genere scriptorum rerum tam diuinarum, quàm humanarum, quæ ad probandum, quæ ad delectandum solum dirigantur, quid splendide, copioseq; sit dictum, quid contra breuiter, atque ieiune: & cum tria sint dicendi genera, qui sublimi illo, omniq; amplificandi ratione sint usi, qui mediocri, qui demum humili, subtiliq; quotidiano sermoni proximo, quis Deum immortalem tam nullius iudicij, qui non uideat? Siquidem cum necessum sit, quicumque feliciter in studijs literarum uersari, fructumq; aliquem demum sere uolet, rectissime ut de autoribus iudicet, optimeq; imitetur: is profecto toto cælo errat, omnemq; ludit operam, qui, cum nihil horum in autoribus aliena præsertim lingua locutis spectet, recte tamen se iudicaturum, imitaturumq; putet: non hercle secus, quàm si quis rudis colorum, rationumq; omnium ducendi lineas, uisa probe depicta imagine, simile statim corpus penicillo adumbrandum temere suscipiat. Equidem hic, dum diligentius apud animum expendo, imprimis in autoribus hæc esse spectanda, neminem, tam Græcorum

## P R O L O G V S.

corum,quàm Latinorum,imo ne eorum quidem, qui in  
poëtas, historicosq; commentarios ediderunt, aut obiter  
indicalse, aut ex professo tradidisse, mirari potius diu,  
quàm certam causam reddere, mihi posse uideor. Iam ue  
ro uates ipsos heroicos, historicosq; insigniores, omni  
genere eloquentiæ usos, omnibusq; modis rhetoricatos  
esse, quis negabit? quantum ijs Cicero? quantum Fabius  
tribuit? qui futuro rhetori, ab Homero, & Vergilio in=  
cipiendum esse præcipit, ut ijs, qui in omni genere elo=  
quentiæ clarissimi existant: quantum, cum Græcis multis  
historiographis, tum ex nostris Liuius, & Sallustius? il=  
lum copiosum, hunc breuem esse: illum lacteæ eloquen=  
tiæ fonte manantem supra quàm dici potest eloquen=  
tem, hunc mirabili uelocitate, quæ uoluit breuissime ex=  
plicantem. Quæ cum ita esse summi ipsi rhetores scri=  
ptum reliquerint, nullamq; tamen in ijs amplificandi  
uiam indicarint, me multum admirantem, causamq; in=  
dagantem, ipsa demum eò deducit ratio, ut credam il=  
los, qui commentaria in autores scripserunt, ea modò,  
quæ ad grammaticen, rerumq; sententiam pertinerent,  
explicanda sumpsisse: cætera ab oratoribus petenda esse  
uoluisse. Oratores uero, circa ciuiles solum quæstiones  
occupatos, locorum usum, amplificandiq; rationem, cæ=  
teris in autoribus ostendere, sui muneris esse non putas=  
se. Quanquam interim minime nego, dari posse, qui di=  
ligenter introspèctis rhetorum scriptis, hanc in Poëtis,  
historicisq; amplificationem, quibusq; ex locis petita co  
pia sit, uideant: uerum id, ut leuiter dicam, non segnis  
crit ingenij, nec cuiusuis lectoris. Quæ cum ita sint, quo  
rectius

## P R O L O G V S.

*rectius de aliorum scriptis iudicemus, nostrumq; stylum  
 exerceamus, ostendam in singulis rhetorices generibus,  
 grauissimisq; autoribus, omnia ex paucis numero locis  
 ad fidem, amplificandum, motusq; animorum, deniq; ad  
 omnem ornatum, quo incrementum capit oratio, quas  
 figuras uocant, petita esse. Equidem non tantum meis hic  
 uiribus tribuo, ut non sentiam grauissimum me onus in  
 humeros suscepisse: intelligamq; undecunque doctissi-  
 mos, eloquentissimosq; huius seculi homines, felicissi-  
 me quidem hanc rem tractare potuisse: meoq; labori  
 consuluisse: quos cum grauiora forte occupatos te-  
 neant, uicit certe meum hic multos iuuandi, demeren-  
 diq; studium, ut hunc laborem subierim. Siquidem  
 non me fugit, pauciores, qui studia sequuntur, in ijs  
 recte uersari: alios, & hos quidem haud parum mul-  
 tos, quia nihil huiusmodi per se spectare in autoribus  
 possunt, nec à professoribus suis accipiunt, male collo-  
 care bonas horas: alios, qui iam feliciores erunt,  
 nonnulla quidem audire, sed ita, ut tenebras sibi ma-  
 gis offundi, quàm lucem admoueri putent. Itaque  
 horum studijs, ut quantum in meis uiribus positum  
 esset consulerem, simulque meis auditoribus, quos  
 in Germania reliqui, quo in præsentia possem ab-  
 sens gratificarer, huc sum progressus: remq; perdif-  
 ficilem, & mihi quidem non necessariam, tractan-  
 dam suscepi. Quòd si doctioribus hic minus satisfec-  
 isse uidebor, Mercurium sibi à me adhuc ru-  
 dem, & utcunque figuratum, propositum esse ad  
 expoliendum putabunt: cæterorum, iudicij uitio,  
 animiq;*

## PROLOGVS.

*animiq; morbo laborantium calumniam , non plus  
apud me ualuisse ad deterrendum , quàm can=  
didorum , studiosorumq; profe=  
ctum ad suscipiendum,  
uideri uo=  
lui. .*

## FINIS.

# CAPITA PRIMI LIBRI.

Vnde tria rhetorices genera cadant & cur ita uocentur.	pag. 1
Omnia ad fidem, amplificandumq; in unoquoq; genere ex locis peti.	pag. 5
Locorum diuifio in internos & circumstantes.	7
Internorum locorum explicatio.	7
Exactior definitionis expositio quæ per omnes locos ducitur.	10
Loci à partibus explicatio.	13
Loci ab etymologia uocabuli explicatio.	16
Quæ per metaphoram definiendi ratio.	17
Deducitur per reliquos omnes locos definitio.	18
Locorum qui proxime rem circumstant & primum loci à coniugatis explicatio.	24
Locorum à genere & specie expositio.	24
Similitudinis & difsimilitudinis explicatio.	25
Contrariorum explicatio.	28
Adiunctorum explicatio.	29
Testimoniorum explicatio.	33
Antecedentium confequentium repugnantiumq; explicatio, quæ per omnes ducuntur locos.	34
Caufarum & euentorum explicatio.	35
Comparisonis expositio.	40
Omnes ad unum locū unde manant referri poffe, & cur diuerfa nomina fument.	42

# CAPITA SECVNDI LIBRI

Quid genus demonstratiuum, & quæ huius cum cæteris cognatio sit.	46
Certa laudari seu uituperari oportere.	47
Res omnis generis quæ cernantur tangantur'ue seu intellectu comprehendantur laudari aut uituperari.	48
Qui hoc in genere autores uersentur.	49
Quæ laudari oporteat uituperari'ue, ex uno adiuncto= rum loco sumi.	56
Quæ ab adiunctis inuenta cæteris ex locis amplificandi ratio sit: & primum in hominis encomio patriæ laus per locos ducitur.	57
Diuisio studiorum factorumq; patriæ in sua uirtutum genera.	60
Primum prudentiæ factum per locos ducitur.	64
Secundum prudentiæ factum ex locis amplificatur.	67
Tertium & postremum prudentiæ factum.	70
Genus hominis ut ex locis sit extendendum.	70
Parentum laus per locos ducitur.	71
Laus hominis à fortunis per locos ducitur.	75
Quæ corporis bona in homine ex locis amplificandi ratio sit.	76
Quæ ratio animi bona ex locis amplificandi.	78
Vt ea ex locis augēda, quæ post mortē acciderunt.	82
Eadem quæ laudandi & uituperandi hominis ratio	84
Quæ urbes ex locis copiose laudandi ratio.	85
Urbis laus à conditore, per locos ducitur.	86
Urbis laus ab ijs, quæ huic simul tempore coniuncta, & pri	

Et primum ab aëris temperie per locos ducitur.	88
Laus urbis ab agris, fluminibus, publicis item munitio- nibus, tectis, ipsisq; ciuibus, per locos ducitur.	90
Quæ facta ex locis copiose laudandi sit ratio.	93
Exemplum facta ex locis amplificandi apud Cicero- nem:	97
Exemplum res ex locis amplificandi apud T. Liuium hi- storicum, breuiterq; easdem explicandi.	98
Nullis non ex locis heroicos uates augere.	104
Eadem uituperandi quæ laudandi ratio	105
De dispositione ipsoq; exordio et unde locorum summa- tur.	105
De narratione et cur Homerus et Maro à fine narra- re cœperint.	113
De confirmatione et epologo.	115
De eloquutione seu exornatione.	115
De perspicuitate ipsaq; periodo.	116
De numeris et pedibus in oratione seruandis.	121
De figuris quæ duo in genera uerborum et sententia- rum sparguntur.	124
De uerborum figuris.	125
De figuris sententiarum, quibusq; ex locis cadant.	129
Quid loci communes, et unde cadant.	139
Quid affectus, quot genera, et unde ducatur.	142
De tribus dicendi generibus: et qui quo in genere auto- res uersentur.	148
De actione et memoria.	152

# CAPITA LIBRI TERTII.

<i>Quid genus suasorium, &amp; qui hoc in genere uersantur.</i>	154
<i>Diuisio &amp; explicatio eorum quæ suaderi seu contra dissuaderi oporteat.</i>	155
<i>Quæ suadentur aut dissuadentur ab adiunctis quidem non male, sed potius à causarum &amp; euentorum locis sumi posse.</i>	156
<i>Quæ ab adiunctis seu causis inuenta, ad maiorem animorum motum cæteris ex locis amplificandi sit ratio &amp; primum honestum per locos ducitur.</i>	160
<i>Vtilia ut ex locis extendantur.</i>	161
<i>Necessarium ut per locos ducendum.</i>	162
<i>Possibilitas ut ex locis sit amplificanda.</i>	163
<i>Exemplum copiose ex locis suadendi apud Ciceronem pro lege Manilia.</i>	167
<i>Exemplum ut in petendo ex locis sit amplificandum: tamq; apud Ouidium Penelopes epistola, quibus ex locis sit sumpta.</i>	180
<i>Exemplum copiose ex locis dissuadendi apud Titum Livium.</i>	181
<i>De dispositione &amp; exordio.</i>	190
<i>De narratione, &amp; propositione: &amp; quibus illa sumatur ex locis.</i>	191
<i>De confirmatione.</i>	200
<i>De epilogo.</i>	201
<i>De eloquutione seu exornatione.</i>	202

**F I N I S.**





terim uituperantur, hæc iudicium sententijs dijudica-  
da committuntur. Quæ cum ita sint, perspicuum est,  
tria esse diuersa rhetorices genera, in quibus certe sin-  
gulis tota uersatur rhetorica. Atqui Ciceronem, &  
hunc secutum Fabium rhetorum maximos, hæc tria  
caussarum potius, quàm rhetorices genera uocasse,  
remq; latissime patentem, tam paruis circumscripsisse  
terminis, hoc magis miror, quòd hi ipsi, omnia, de  
quibus dici possit, intra horum trium generum com-  
plexum uenire, ipsumq; oratorem de rebus omnibus  
copiose, splendideq; dicere posse, affirmarint. Quàm  
uero alterum late pateat, alterum angustis notatum sit  
finibus, ut omnino eluceat, quid ipso caussarum no-  
mine acceperint, debeatq;, indicandum est. Putarunt  
multi oratorem nulla de re, nisi de qua quæreretur, di-  
cere posse. Quæstionum uero duo esse genera, passim  
& Cicero scriptum reliquit: alterum infinitum, nul-  
lis personarum, locorum, temporum, uel circumstantijs  
notatum, quod Græci θέσις, ipse Propositum, & Con-  
sultationem uocauit: alterum rebus, personis, tem-  
poribusq; finitum, Causam, & Controuersiam ap-  
pellauit: illi ὑπόθεσις. Constituit igitur tria hæc gene-  
ra in quæstionibus, & quidem definitis: uoluitq; caus-  
sarum genera, hoc est definitarum quæstionum, dici:  
quod ipsum cum in Topicis, tum ad Quintum fratrem  
perspicuè docet. Iam uero cum in confesso sit, omnia  
in hæc tria incidere, sintq; duo quæstionum genera, cur  
non tam consultationum, quàm causarum dicenda sunt  
genera? Quòd si hic respondeatur, ὑπόθεσις θέσις com-  
plecti,

plecti, ut species genus, quod omnino negari non po-  
 test, tamen extra controuersiam est, in infinitis quæ-  
 stionibus, totam ita sæpenumero uersari orationem, ut  
 ad certarum personarum rerumue complexum non  
 descendatur. Nisi uero quis non putet iustitiam, inno-  
 centiam, modestiam, aliasq; id genus uirtutes, summis  
 laudibus recte uehi posse, quin, quorum uirtutes, ui-  
 tiaue sint notetur. Quid? ne causarum quidem, & iuxta  
 consultationum, quod est, tam definitarum, quàm infi-  
 nitarum quæstionum hæc genera recte dicas. An non  
 uel Ciceronis Fabijq; testimonio, multis de rebus di-  
 cit orator, quæ quæstionem omnino habent nullam?  
 An non certorum hominum perspectas uirtutes, co-  
 gnitæque præclarè facta, tum urbium certarum, por-  
 tuum, locorumq; diuulgatam celebritatem citra quæ-  
 stionem, omnemq; controuersiam, copiosa, spendi-  
 daq; oratione extollam? Neque enim laus ferè conten-  
 tionem habere solet. Itaque Menander rhetor, cuius de  
 partitione rerum laudabilium in genere demonstrati-  
 uo scriptum extat, quas oratores laudes appellassent,  
 ciuiliū certaminum conflictum potius esse putandum,  
 his uerbis disputat, ὅς γάρ ἐπιδείξει λόγων πολυτελέων οἱ  
 Θρησκαὶ καλούμενοι ποιῆσαι, μελέτω ἀγώνων εἰς φάριν, οὐκ  
 ἐπιδείξει. Cum igitur nostris, Græcisq; concedentibus,  
 multa sunt ijs in generibus, quæ quæstionem nullam ha-  
 bent, hæc tria, nō caussarū, sed potius rhetorices genera  
 cū Aristotele uocemus. Is enim ijs in libris, quos ex pro-  
 fesso hac ipsa de re cōscripsit, tria hæc, ἐπιδείξις, συµβου-  
 λευτικόν, δικανικόν, non caussarū, sed τὸ ῥητορικὸν γένος uocauit:

quòd tribus in ijs, ipsa certe uersaretur rhetorica. Quòd ut magis probem, ijs ipsis quas dixi causis adducor. Quare cum summo uiro, contra summos sentiens, hæc admonenda, liberaq; iudicaturis in medio ponenda putauit: ut pro suo quisq; arbitrio, quemadmodum uellet appellaret. Equidem ne rerum uis ipso nomine urgeretur, mei hic officij esse duxi, quid mihi uideretur, alijsq; placuisset, non dissimulare. Patiar sanè, cum præsertim & Græci hic sibi non constant, atq; hæc tria interim πολιτικῶν λόγων genera uocent, nostros hic defendi: nec ita male caussarum genera appellasse: quod rhetorum olim ingenia, in ciuilibus causis, contentionibusq; uel solis propemodum desudarint: modò intelligamus, latius hæc paterè, nullamq; sæpe quæstionem habere.

Omnia ad fidem amplificandumq; in unoquoq; genere ex locis peti.

CAP. II.

Cum igitur præterita, instantia, futuraq; atque adeo omnia in hæc tria rhetorices genera incidunt, sintq; generales quidam, communesq; dialecticorum, rhetorumq; loci in quouis genere dicturis, scripturis uel argumenta, rerumque copiam administrantes, cognitio genere, nostriq; consilij scopo, quem primum spectandum esse, ipsa nobis ratio præscribit, ipsis ex locis ad fidem, copiamq; orationis inueniendum est. Inuenienda autem sunt, & res, & uerba. Verum in rebus proprie inuenire, in uerbis eloqui dicitur. Nam res, nescio quo pacto & uerborum supellectilem secum ferant: & quasi in se inclusam offerant. Quare de rerum inuentione, de quibus proprie inuenire dicitur, dicendum est: quod

est : quod ad uerba attinet, quæ non tam rerum copiam suppeditant, quàm ipsam significant, suo loco dicemus. Cum igitur generales quidam loci, dialecticorum disputationibus, rhetoricesq; generibus omnibus seruiant, de ijs primum dicendum : ut appareat, quæ singulis in generibus, classicorumq; autorum scriptis, siue ad fidem posita sint, siue ad amplificandum, delectandumq;, siue denique ad motum animorum, ornatumue, quo corpus orationis augeatur, hinc sumpta esse, & huc referri posse. Vtinam hic natura rerum pateretur, ut rem, quod pictores faciunt, ob oculos ponere possem, & non animorum profundis cogitationibus, sensibusq; seruirem. Nam aut nulla ars est, aut hæc certe ars, præceptaq; maxime putanda. Quid enim magis admirabile, magis humanum propemodum excedat captum, quàm paucis numero locis, quasi à natura datis sedibus, uniuersas res, de quibus dici, scribi, cogitari denique possit contineri? Hinc dialecticos ductis argumentis uel inuitis fidem facere : hinc oratores sumptis rerum ponderibus copiosa splendidaq; oratione, nunc uolentes ducere, nunc nolentes, repugnantesq;, in suam sententiam pertrahere : hinc poëtas, ducta rerum ad amplificandum copia, non tam narrare, quàm res quasi ob oculos depictas dare, omnibusque modis delectare : hinc historicos sumere, quo inter exponendum res gestas ita augeant, illustrentq; omnia, ut uariè lectoris animum afficiant, pascantq; : denique omnes omnis generis autores, omnia his locis acceptum referre? Hæc autem uidere, quanta res est? quam ad iudicandum imitandumq;

*necessaria, non in generalibus modò illis linguis, Græca  
 Latinaq; studijsq; grauioribus, sed & uernacula nostra  
 dicturis plura aut scripturis? Vbicunque enim perpetua,  
 longioreq; oratione utendum est, siue concionator nunc  
 in diuorum laudem diutius, nunc ad fidem faciendam  
 probabilius plura sis dicturus: siue senator, & ad mul-  
 titudinem mouendam dicturus orator ueneris, ijs rebus  
 instructus si accedas, quod uoles feliciter efficies. Quòd  
 si plerosque uidemus, uel in uernacula sua lingua, quòd  
 hæc ignorant, male suum obire munus, cui dubium esse  
 possit, eos omnem lusuros operam, qui cum nihil horum  
 ne à limine quidem salutarint, in alienis tamen linguis,  
 magniq; nominis autoribus, recte se uersaturos credant?  
 Cæterum ut locorum saltem nomina, numerumq; scire  
 parum est, ita horum usum nosse, omniaq; hinc, nunc ad  
 fidem, nunc ad amplificandum, exornandumq; certan-  
 sumendi rationem tenere, idipsumq; in diuersis rerum  
 scriptoribus spectare, meo quidem iudicio magni putan-  
 da res est. In quo equidem, quantum in meis positum est  
 uiribus, enitar sedulò, ut explicatiora pluraq; traden-  
 do, studiosos mihi demerear. Sequar porrò in traden-  
 dis locis Ciceronem: quòd hunc potissimum iudicio in  
 imitandis Græcis usum, breuissimè omnes, multis in lo-  
 cis, non tam ferè explicasse, quàm enumerasse intelli-  
 go: tantum abest, ut amplificandi rationem in omni-  
 bus rhetoricis generibus, diuersisq; autoribus hinc pe-  
 tendam esse docuerit. Quin etiam dedita opera, nihil  
 nonnullorū exemplo aut mutando, aut addendo, iisdem  
 quibus ille, nominibus utar. Si quidem usitatis uerbis,*

*gener*

generatimq; hæc tradenda sunt : quòd certe per species ire, natura rerum minime patiatur : quod qui facere cœperunt, Fabij iudicio duo simul mala incurrerunt, ut & nimium dicerent, nec tamen totum. Verum quod ad me attinet, ita tamen hic me geram, ut nec Ciceronis, aut ullius mihi autoritas magis præscripsisse, ac ipsa rerum natura uideatur.

Locorum diuisio in internos & circumstantes.

C A P. I I I.

**L**Ocorum igitur, qui sedes sunt argumentorum, argumenta uero, probabilia inuenta, ad faciendum fidem, alij in ea ipsa re, de qua agitur, hærent, fixiq; sunt: alij circa hanc sunt, proximeq; quasi circumstant: ut quibus ea desident, latentq;, quæ eam ipsam ad rem, de qua agitur, quodammodo sunt affecta. In ipsa re inclusi loci sunt, definitio totius, partium enumeratio, uerbi notatio, quæ à Græcis *ὑποθεσις* dicitur. Qui circa rem sunt, proximeq; hanc circumstant, sunt coniugata, genus, species, quam formam Cicero dicere mauult, similitudo, dissimilitudo, contrarium, adiuncta, quibus testimonia item subijcio, antecedentia, consequentia, repugnantia, causse, effecta, & comparata.

Internorum locorum explanatio.

C A P. I I I I.

**D**Efinitione res tota quid sit explicatur. Omnia porro, quæ in dubium uocata, definitione sunt explicanda, aut res sunt, quæ cerni, tangi ue possunt, ut homo, pecus, ciuitas, mons, flumen, aut quæ ipso  
a 4 solum



solum intellectu percipiuntur, ut iustitia, temperantia, ira, odium, tutela, aliâq; id genus innumera. Vt homo est animal rationale risibile. Iustitia est constans, & perpetua uoluntas, ius suum unicuiq; tribuens. Sic Iustinianus, & ante hunc Vlpianus iureconsultus definiuit. Verum cum constantiam, perpetuitatemq; magis ad iustitiam, quæ semper sui similis est, quam ad animorum habitus, uoluntatesq; referas, quæ pro re, & tempore fluxæ, suiq; dissimiles existunt ferè, sitq; in omnibus recte factis iustitia, maliq; interim recte faciant, in hanc sententiam forte tutius definias. Iustitia est animi uirtus, qua rectum quod est, in omnibus fit. Hic & suam cuique rem, dignitatẽque, tum pœnam scelerato tribuis. Per partes item, totum quid sit, explicamus: ut, urbs est ædium priuatarum frequentia, plateis discriminata, portis, fossis, mœnibusq; circummunita. Rhetorice est recte inueniendi, & disponendi, & eloquendi, cum firma memoria, & cum dignitate actionis scientia. Quin & definimus uocabuli etymologia, ut, Iupiter est dictus, quod iuuans sit pater. Philosophus est sapientiæ amator. Iustitium est iuris statio. Hæc, & superiora in argumentum uertere, omnibus procul dubio in proclini est: ut, Si Iupiter dictus, quod iuuans sit pater, perdere neminem debet. Si philosophus sapientiæ est amator, non ut sophista nugarum erit admirator. Si iustitium iuris est statio, Prætor per id tempus, non ius dicet. Verũ multo plura sunt definiendi genera: quod cum Cicero nõ inficias eat, miror equidẽ, duo hæc, à partibus, & uerbi notatione definitioni adiecisse: reliqua non persequunt



sequutum : aut hæc persequi , aut illa omittere , ipsaq;  
 definitione complecti potuisset. Adde uocabuli ἰσχυρο-  
 λογία, & coniugata, recte in adiunctorum, seu caussarum  
 locum conijci potuisse. A causis nanque est, pri-  
 mum Deorum Iouem dictum, quod iuuans sit pater:  
 & philosophum, quod sapientiæ sit amator. Iustum  
 item dici, qui iuste fecisset, quod à coniugatis est, in  
 caussa sunt recte facta : unde, dum homines metimur,  
 nomen hoc tribuimus. Sic item quod compascuum est,  
 compascere licere, à coniugatis quidem est, sed &  
 idem à causis. Quinetiam similitudo, dissimilitudo, &  
 contrarium, commode in comparisonis locum refe-  
 rantur. Neque enim hæc minus, quàm maiora, mino-  
 ra, pariaq;, conferuntur, comparanturq;. Antecedentia  
 item, consequentia, repugnantia, per omnes locos  
 sparguntur : omniumq; naturam induunt : quod suo  
 ostendetur loco. Quare hinc ducta argumenta, ex cæ-  
 terorum locorum aliquo deprompta esse, conuincas.  
 Hæc à me eò dici, nemo suspicabitur, quod præscri-  
 ptum à Cicerone locorum numerum hic magis crimi-  
 ner, quàm admoneam, ne, si in rhetorices generibus,  
 ubi ex his locis generalibus omnia, & ad fidem, & ad  
 amplificandum, petenda esse ostendam, illorum, quos  
 ad suos ueluti fontes remissi, mentionem forte perin-  
 de, ac aliorum tam crebro non fecero, negligi quic-  
 quam à me, usumq; minus indicari, quisquam arbi-  
 tretur. Nihil autem uetat, cur non generales magis  
 locos, in sua ueluti membra, ad unam, eandemq; rem  
 ubique, commodiusq; inuestigandam suo iure spar-

geret : quemadmodum plures eodem tendentes sæpe sterni vias uidemus , ut si non hac lubet , alia uia eodem perueniatur.

Exactior definitionis expositio , quæ per omnes locos ducitur.

C A P. V.

**C**UM igitur plures definiendi sint rationes , adeo , ut ex singulis , quod ostendemus , enumeratis locis definiamus , sitq; magni negotij recte definire , tum potissima dialectices pars , quam poterimus diligentissimè hanc rem excutiamus. In præceptis est , extraq; omnem controuersiam , definitionem , quæ firmissima esse debeat , ex genere & differentijs constare : subiiciuntq; pleriq; omnes definitioni genus , speciem , differentiam , & proprium. Cicero quanquam genus , & speciem , quam formam dici mauult , seiungat , atque inter eos locos ponat , qui rem ipsam , totumq; quod definietur proxime circumstent , in partitionibus tamen idem , his uerbis docet. Non dubium est id quidem , quin definitio genere declaretur , & proprietate quadam : aut etiam communium frequentia , ex quibus proprium quid sit , eluceat. In eandem sententiam , quāquam mutatis uerbis , & in topicis disputat. Cæterum hoc à plerisque uariat , quòd proprii uocabulo & differentiam complectatur. Idem eodem in libro , cum à toto , à partibus , à ui uerbi , diuisioneque definiri docuisset , plures præterea vias , rationesque definiendi esse non dissimulat : sed quia ad sui libri institutum minus pertinere putaret , non est persequutus. Porro in partitionibus , cum genere , & proprietate quadam definiendum

finiendum esse præcepisset, subiicit, quoniam de proprijs oriatur sæpe magna dissensio, definiendum esse, sæpe ex contrarijs: sæpe etiam ex dissimilibus: sæpe ex paribus: tum per descriptionem: per consequentium enumerationem, uocabuliq; explicationem. Hæc quidem docet, sed nulla quibus declarasset, exempla adiecit. Mihi quidem rationem ducem sequenti, locorumq; uim introspicienti, omnibus ex locis definiri commode posse, haud dubie uidetur: nullamq; , nisi ex locis petitam, definitionem esse putandam. Siquidem si mihi omnium pace in uniuersum dicere licebit, nulli dubiæ rei, nisi ductis ex locis argumentis fidem fieri, definiendæ item rei, quæ inuoluta, perplexaq; est, ex locis accedat necessum est, quo quid ipsa sit, eluceat. Neque enim res ulla, quæ dubia, perplexaq; est, per se explicari potest, ut dicam, homo est homo: uirtus est uirtus: sed, aut ex genere, & differentijs, aut alijs ex locis id præstetur oportet. Quod autem ipsa definitio locus, & recte quidem primus omnium consensu dicatur, inde est, quòd uera nusquam ulla inueniatur, quæ non ex locis desumpserit, quo totum ipsum quid sit, explicet. Hæc ut patecant, ad locos redeundum est: definitioq; per singulosq; ducenda: quod dum fit, in quos & à Cicerone diuersis in locis indicatæ explicandi formulæ recidant, apparebit. Felicissime igitur omnium consensu, genere, & differentia, proprioq; definimus. Genus Cicero uocat notionem, ad plures differentias pertinentem. Vulgo id temporis scholæ, id esse dicunt, quod de pluribus differentibus specie

cie

animantibus imbuunt, ut se agnosceret, coleretq;. A' ui no-  
minis erit, si hominem humo, quæ terra est, natum ani-  
mal dicamus. Verum & cæteris ex locis omnibus defi-  
niri potest, quod mox ostensuri sumus. Atqui cum non  
modò quæ cerni, demonstrariq; possunt, genere, &  
differentijs, seu proprijs, quod idem haberi uolo, de-  
finiamus, sed & ea, quæ intellectu comprehendun-  
tur, exemplo res demonstretur. Fortitudo est consi-  
derata periculorum susceptio, & laborum perpeßio.  
Hic genus est susceptio, & perpeßio, reliqua sunt dif-  
ferentiæ. Penelope Ouidiana amorem definiuit rem  
esse plenam solliciti timoris: sic illa, Res est solliciti,  
plena timoris amor. Catilina apud Sallustium ueram  
dixit amicitiam esse, idem uelle, atque idem nolle. Hic  
genus est uelle, ac nolle, idem, autem differentia. Hic  
imprimis danda est opera, uero ut genere, & differen-  
tijs, quantum modo fieri potest, utamur. Hæc de pri-  
mo præcipuoq; definitionis loco, quæ genere & differe-  
rentijs, atque adeo proprijs declaratur.

Loci à partibus explicatio.

C A P. V I.

**S**equitur autem locus à partibus. Partium enumera-  
tione rem explicamus, cum ipsa in re, differen-  
tia, propriumq;, ut in homine ratio, risusq;, aut non  
cluceat, aut omnino non reperiatur. Ut domum si de-  
finiendam suscipio, in qua nihil reperio, qua potis-  
simum differre rebus cæteris uideri possit, definiam  
ab ijs, quibus constructa sit partibus: dicamq; id esse,  
quod fundamento, parietibus, tabulatis, tectisq; con-  
stet. Sic & ciuitatem priuatarum ædium frequentiam  
esse

esse, plateis discriminatam, portis, mœnibus, fossisq; circumunitam. Definimus & per partitionem ea, quæ non cernuntur, tanguntur uel, sed intellectu ipso cognoscuntur. Vt ius ciuile est, quod in legibus, senatusconsultis, rebus iudicatis, iurisperitorum autoritate, edictis magistratuum, more, æquitate consistit. Huc pertinet & diuisio: per hanc ita definias, Animal est substantia, quæ uel sensu tantum, uel sensu & ratione nitatur. Amplitudo est, aut potentiæ, aut maiestatis, aut aliarum copiarum magna abundantia. Porro diuisio est eadem per omnia cum partitione: nisi quod illa sit totius, hoc est generis in species, hæc totius in partes discretio: quemadmodum iam uidimus domum in suas partes, urbemq; in suas, nempe aedes, plateas, portas, mœnia, fossasq; partitam esse. Fabius de diuisione ita dicit: Diuisio est rerum plurium in singulas: partitio, singularum in partes, discretus ordo, & recta quædam collocatio, prioribus sequentia annectens. Locus hic plurimum commune habet cum superiore, adeo, ut unus idemq; haberi ferè possit. Nam quid interest, siue totum ab ijs, quæ ipsi propria insunt definiam, dicamq; , hominem animal esse rationale, mortale: Siue à partibus, quibus totum est compositum, & dicam, hominem esse id, quod capite, humeris, manibus, uentre, cruribus, pedibusq; constat. Quemadmodum ibi, hoc ipso, quod hominem animal rationale, & mortale dico, quæ differentie sunt, ueluti è turba animalium omnis generis eripio, solumq; constituo: ita hic, partes enumerando, caput, humeros, manus, & cetera quæ

quæ differentia erunt, & propria hominis, idem præ-  
 sto. Verum hoc quis interesse putet, quod genus hic,  
 cum non tam manifestum, ut supra appareat, omnino  
 desideretur: qua in opinione Boëtium fuisse, scripto in  
 Topica Ciceronis commentario, minus certe probo.  
 Etenim absurda per omnia definitio hinc erit, præter-  
 missio genere, ut dicam, caput, humeri, manus, pedes, &  
 cætera, sunt homo. Siquidem abscissa hæc suo toto, se-  
 iuncta; atque diuersis in locis posita uideri possunt.  
 Quare & hic semper, aut tacita uis generis, aut ipsum  
 erit expressum. Equidem neminem fore existimo, qui  
 inficias eat, perinde esse, siue dicam, Homo est quod con-  
 stat capite, humeris, reliquisq; enumerandis partibus,  
 siue dicam, homo est animal, quod constat capite, hu-  
 meris, & cætera. Eadem ratio est, & in ijs à partibus  
 definicendis, quæ intellectu comprehenduntur. Nemo di-  
 cit, inuentio, dispositio, eloquutio, actio & memoria  
 sunt rhetorica: sed rhetorica est inueniendi, disponen-  
 di, eloquendi cum actione, firmaq; memoria scientia: ubi  
 genus planè expressum est. Quod si quis urgeat, nullum  
 hic genus uideri: ideoq; diuersum esse locum à superio-  
 re, qui genere & differentijs constet semper, quæram,  
 si quod licet ita definiam: homo est quod ratione præ-  
 ditum est, mortiq; obnoxium, quem in locum, cum non  
 ex partibus definitio sit, hanc coniiciet? Quod si supe-  
 rioris loci esse dixerit, ut certe est, aut genus adesse, aut  
 & ibi sine genere definiri fatebitur. Natura ita compa-  
 ratum est, ut undecumq; locorū, potest autē ex omnibus,  
 petita definitio sit, semper, aut genus expressum, aut ta-  
 citam

citam huius uim inclusam habeat. Petita est contrariorum ex loco definitio hæc : Virtus est fuga uitiorum : sed & eadem ex genere, & differentia. Fuga nanque genus est, uitiorum autem differentia. Dies est solis cursus supra hemisphærium nostrum : sumpta hæc à causarum loco diffinitio est. Nam lucis causa est solis cursus supra hemisphærium nostrum. Sed & hic genus est cursus, solis autem differentia : & cum noctu etiam feratur, nostrisq; Antipodibus luceat, necessario & altera adijciebatur differentia, supra nostrum hemisphærium. Adde & hanc à partibus definitionem, & illam ex genere & differentiis superiorem, ex uno, eodemq; trahi adiunctorum loco : sed hanc semper, illam sæpius. Cæterum in medio pono, siue quis unum, eundemq; hunc, cum superiore, siue diuersum locum arbitretur. Non equidem diffiteor, paulo aliam à partibus, aliam à genere, & differentiis definiendi rationem in speciem uideri posse : sed idem intelligo, non magis hic, quàm supra genus abesse : plurimasq; præterea, nunc à simili, nunc à contrario, nunc à causis, denique ex alijs alijsq; locis, definiendi formulas esse : quas cum superiore definitionis loco, quia non attigit, sit complexus Cicero, huius certe solius à partibus loci, cum & etymologia in suos locos recidat, seiungendi, non ita magna mihi uisa est causa.

Loci ab etymologia uocabulî explicatio.

C A P.

V I I.

**T**ertium definiendi locum esse uoluit Cicero, uocabuli etymologiam, quando ex ipso uocabuli interpre



Interpretatione definimus. Atqui cum uel ipsa luce magis sit perspicuum, aliud ipsam esse substantiam, aliud nomen, quo ipsa significetur, inter eos locos hunc potius constituendum cum Agricola puto, qui extra ipsam sunt, proximeq; circumstant. Locauit autem hunc Agricola inter accidentia, quæ Cicero adiunctorum loco complectitur, quod rebus alijs, alio modo nomina accidunt: ut cum, qui iam nactus sit ampliores possessiones, à locorum copia locupletem, à pecorum pecuniosum dicamus. Atque id quidem negari non potest, posse inter accidentia, siue adiuncta, qui idem locus est, locari. Verum cum ita natura comparatum sit, ut nunquam ferè à ui uocabuli definiamus, nisi simul caussa inditi nominis aperiatur, malui, ut supra indicaui, in caussarum, quàm adiunctorum locum reijcere. Nam Musam, si deam inquisitricem esse dicam, ἀπὸ τοῦ μωσίου, seu μὲν, quod est inquiri, causam certe inditi nominis in definiendo aperiam necessum est: sic & Ceres, à gerēdis frugibus Dea, quasi geres dicitur: & iustitium, iuris statio, tempus id, quo prætor ius dicere prohibetur.

Quæ per metaphoram definiendi ratio.

C A P.

V I I I.

**N**ihil quod ad definiendi locos à Cicerone præscriptos attinet, restat, nisi quod & per metaphoram definiri interim doceat: cui cum locum proprium non constituerit, nos in quem recidat, utq; per hanc definiatur, paucis perstringamus. Metaphora est, quam nostri translationem uocant, qua uera uocabuli significatio transfertur in suam cognatam: ut florem ætatis, pro



tis, pro uiuida optimaq; etate dicimus. Definimus per metaphoram loco generis, adiecta differentia, ut mors est occasus uitæ, pro terminus uitæ : hic genus est occasus, uitæ uero differentia. Sæpe etiam per plures accumulatas metaphoras, ut Antonius apud Ciceronem: Historia uero, inquit, est testis temporum, lux ueritatis, uita memoriæ, magistra uitæ, nuncia uetustatis. Nihil interest, inter hanc, & superiorem illam definitionem, quæ genere & differentijs constat, nisi quod ibi genus suam propriam, genuinamq; significationem, hic uero metaphoricam, cognatamq; sumat. Quare & superiorem illum definitionis locum iure sibi uendicat. Porro poëtis frequenti in usu est : cecinit ille : Mors ultima linea rerum, pro finis rerum. Hæc de tribus illis ipsa in re fixis definiendi locis, toto, partibus, etymologia : de quibus quid iudicem, non dissimulaui. Partes cum toto idem uideri posse putauit : unamq; & eandem à toto, & partibus definiendi rationem esse, quæ genere & differentijs constet. Etymologiam uero in causarum locum reieci : quod qui minus probat, stomachari non debet, quod eo ordine, quo Cicero descripsit, & me tradidisse intelligat.

Deducitur per reliquos omnes locos de :

finitio.

CAP.

IX.

**N**Vnc subinde, quod polliciti sumus, ducamus definitionem per reliquos omnes locos : ostendamusq;, non solum ex ijs, qui in toto defixi sunt, sed & ex ijs omnibus, qui extra id sunt, proximeq; circumstant, definitiones sumi. Vocauimus autem Ciceronis exemplo,

exemplo, has explicatas definiendi rationes, locos ipsa  
 in re defixos : quanquam ex locis, uel rem ipsam circun=  
 stantibus magis sumant, quo totum ipsum, quid sit, expli=  
 cant. Nam definitio ex genere, & differēt ijs, partiumq;  
 enumeratione, ab adiunctis ferè sumitur. Verū cum ad=  
 iuncta latius pateāt, & pleraq; ab re longius absistant,  
 has definitiones, quæ aut ab ijs, quæ rei, toti q; suo pro=  
 pria insunt, accidunt q;, aut partes, membra uel sunt su=  
 muntur, quod ita proxime toti suo adhærentia, adiun=  
 cta q; sint, ut unū idem q; uideri possint, locos sanè cum  
 Cicerone, ipsa in re positos, fixos q; potius uocemus,  
 quàm quicquam immutemus : modò tamen intelligamus,  
 liberiores definitiones sæpius, ac nescio an sæpiissime,  
 & cæteris ex locis omnibus, rem circunstantibus, duci.  
 Ordine igitur eo ipso, quo enumerati sunt, breuiter de=  
 finiemus : postea uero ad principium reuertemur : ordi=  
 ne q; rursus singulos, quantum ad nostrum institu=  
 tum attinet, & explicabimus, & argumenta inde du=  
 cendi rationem indicabimus. Primus itaque eorum, qui  
 extra rem positi sunt, locus est coniugatorum : hinc ita  
 definias. Si iustitia est animi uirtus, & iusta facta ea sunt,  
 quæ ex animi uirtute proficiuntur. A genere ita : Si  
 quicquid auri, argenti q; terra effoditur, malorum irri=  
 tamentum est, & signata pecunia malorum erit irrita=  
 mentum. A specie : Homo est, qui ratione duce, ex præ=  
 teritis, præsentibus q;, longius sibi in futurum prospici=  
 cit : ergo animal est, quod ratione præditum est. Possu=  
 mus & aliter ijs ex locis definire, ut à genere per diui=  
 sionem ad species descendamus, & econuerso, à specie ad  
 b 2 genus

genus ascendamus : quas quia definiendi formulas cognouimus, nihil attinet hic repetere. A simili definitio eiusmodi est. Si patrem enecare paricidium est, & matrem occidere paricidium erit, Si continentia animi uirtus est, erit & abstinencia. A dissimili, quam Cicero differentiam uocat. Non si letitia animi bonum est, & uoluptas animi bonum erit. A contrarijs : Virtus est uitium fugere, & sapientia prima Stultitia caruisse. Ad iuncta sequuntur, quæ ut latissime patent, maximèque sunt obuia, ita hinc oratores, & poëtæ, reliquiq; omnis generis autores sæpiissime definiunt: qui non ieiunè, per genus, & differentiam solum, more dialecticorum, sed fusius rem explicare, magisq; communem ad captum, loqui student. Huius generis est, si hominem, ut supra indicauimus, à creatore suo definiam. Eadem ratione, & equum ab homine licet, dicamq; esse, quem homo suum ad usum alat, nunc ad equitandum, nunc ad arandum, sarcinasq; ferendum. Hinc item erit, si ab ijs definiam, quæ rei definiendæ, aut accidunt, aut ab ipsa fiant, aganturq; : ut, lupus terrestris animal est, forma, magnitudineq; paulo maiore canina, ex raptu ferè pecorum uitam trahens, Iustitia est uirtus, quæ homines in officio retinet, ne alter alteri suū eripiat, Quod si forte plura in definiendo sumantur, descriptio appellatur : quo definiendi genere, sæpe autores utuntur. Itaque Vergilius, cum & alia multa, Famam hoc ex loco copiosissime depinxit his uerbis:

Fama, malum, quo non aliud uelocius ullum:  
Mobilitate uiget; uiresq; acquirit eundo;

Parua

Parua metu primo : mox sese attollit in auras:  
 Ingrediturq; solo : & caput inter nubila condit.  
 Illam terra parens, ita irritata Deorum,  
 Extremam, ut perhibent, Cœo, Enceladoq; sororem  
 Progeniuit, pedibus celerem, & pernicibus alis,  
 Monstrum horrendum, ingens : cui, quot sunt corpore  
 plumæ,

Tot uigiles oculi subter, mirabile dictu,  
 Tot linguæ, totidem ora sonant : tot subrigit aures.  
 Nocte uolat cœli medio, terreq; per umbram,  
 Stridens : nec dulci declinat lumina somno.  
 Luce sedet custos, aut summi culmine tecti,  
 Turribus aut altis : & magnas territat urbes,  
 Tam ficti, prauiq; tenax, quàm nuncia ueri.  
 Hæc porro omnia ab adiunctis sunt petita : ut quæ par-  
 tim, aut accidant Famæ, aut agat ipsa, temporis, lociq;  
 adiecta mentione. Accidunt autem, malum esse uelocissi-  
 mum, nobilitate uigere, in eundo uires acquirere, primo  
 paruam metu, deinde incrementum sumere, & ad nubi-  
 la usque caput erigere, matre terra ultimo partu editam  
 sororem Cœo, Enceladoq; gigantibus, celerem pedibus,  
 pernicibusq; alis, monstrum horrendum, ingens, cui,  
 quot plumæ, totidem uigiles oculi, ora, auresq; essent.  
 Quæ uero agat ipsa, ubi recte temporis, lociq; fit men-  
 tio, ea sunt. Nocte hanc per aëra, umbrasq; cum sonitu  
 uolare, nec unquam somnū capere : die uero ipso, custo-  
 dem sedere in summis aut tectis, aut turribus, magnasq;  
 urbes territare, tam falsa, quàm uera nuntiando. Omnia  
 hæc, ut diximus, ab adiunctis sunt petita : id quod in ex-

plicando hoc loco, infra patefiet. Est & illud hinc sumptum, siue eiusdem, siue alterius sit:

*Liur, tabificum malis uenenum:*

*Intactis uorat ossibus medullas &c.*

Ab ijs, quæ agit, ipse definitur liur. Naso item inuidiam, solisq; regiam, cum & alia multa, descripsit.

*Regia solis erat, sublimibus alta columnis:*

*Clara micante auro: flammisq; imitante pyropo. &c.*

Verum passim hæc obuia sunt. Quid multa? hic ille est locus, qui non modò in definiendo, sed & amplificando, omnibus autoribus, & maxime poëtis, non tam calamum, quàm penicillum ministrat: ut res, non tam scribant, quàm depictas ob oculos ponant. Sequuntur antecedentia, consequentia, & repugnantia. Horum ea est natura, ut per omnes ferme locos deducantur: singulorumq; naturam induant: quod suo dicetur loco. Ab antecedentibus ita definias: si homo est, in quo ratio, risusq; intelligatur, & animal erit, quod ratione, risuq; sit præditum. Cæterum cum Cicero hunc locum dialecticorum proprium esse uoluerit, hunc in modum, magis arcte, atque dialectice, quod illi probatur, definias. Ab antecedentibus: si iustitia est, uirtus animi est suum cuique tribuens: sed iustitia est, uirtus igitur animi est suum cuique tribuens. A consequentibus: si iustitia est, uirtus animi est suum cuique tribuens: sed uirtus animi est suum cuique tribuens, iustitia igitur est. A repugnantibus: Virtus est placidis abstinuisse bonis. Sequuntur causæ & effecta: à causis ita: Literæ humaniores sunt, quæ homines ciuiliores, rerumq; humanarum prudentiores

tiores reddunt. Maximus Deorum, Iupiter dictus, quod mortalibus iuuans sit pater. Ab effectis, domus est, quæ extructa est ad inhabitandum, aduersus tempestates, omnesq; aëris iniurias. Dies est solis cursus, supra hemisphærium nostrum. Postremus locus est comparationis, ubi maiora ex minoribus, minora ex maioribus, paria ex paribus confirmantur. A maiori, si omne animal est substantia, erit & homo. A minori : si furtum scelus est, & sacrilegium scelus erit. A pari : si abstinentia est uirtus, erit & continentia. Hæc de definiendi ratione : quibus utcunque declaratum esse puto, non solum ijs ex locis, qui toti ipsi, rei q; de qua agitur inhærent, nempe genere, differentijs, partiumq; enumeratione definiri, sed & ex ijs omnibus, qui totum ipsum proxime contingunt : unde, si non semper, sæpiissime tamen grauißimi quiq; autores definiunt. Nam dum uariando delectare student, constrictam illam dialecticorum, quanquam certam, unicam tamen ieiunamq; definiendi formulam, quasi seruitutem, quæ ad certa uerba astringat, oderunt. Neque hercle uideo, cum præsertim positum id, in uulgari usu intelligamus, cur minus ad cuiusq; arbitrium liceat rem, modò breuiter, modò copiose, aliter atq; aliter, quid ipsa sit explicare. Quare, cum omni dubiæ rei, atq; adeo definiendæ, ex locis ijs adducatur oporteat, quo fides fiat, nulla iam cuiusquã incidet definitio, quæ non in aliquem horum recidat. Hoc porro animaduertendum, omnes definitiones naturaliter ab adiunctis duci, quæ rebus omnibus, de quibus agitur, adhærent maxime : fieri q; ut cum hic locus in cæteros

conuertatur, quod suo ostendetur loco, genus simul, differentiaq; per plures sparsae uideantur.

Locorū qui proxime rem circūstant, & primū loci à coniugatis explicatio. CAP. X.

**R**estat igitur, ut cum haecenus de definitione diximus, ad locos hos ipsos, extra rem positos, reuertamur, paucisq; & cuiusq; uim, naturamq;, & inde argumenta ducendi rationem indicemus. Primus ordine coniugatorum locus est. Sunt autem coniugata, uerba eiusdem generis uarie inflexa, ut homo, humanus, humaniter : iustus, iustitia, iuste : sapiens, sapientia, sapienter &c. Hinc Terentianus ille trimetro hoc ita argumentatur : Homo sum, humani nihil alienum à me puto. Homo nanque, & humanum, coniugata coniunctaq; uerba sunt. Sic item iustum credi oportere, qui iuste fecisset, & compascere licere, si ager sit compascuus, & humanum esse mortem timere, cum homo sit mortalis, eiusdem generis sunt. Fabiū, nisi Ciceronem usum uideret, locum hunc ridiculum putat. Negari hoc certe non potest, quod supra diximus, reijci commodè in adiunctorum, seu potius causarum locum posse: quod & Fabium sensisse uidemus, qui inter causas, quibus adiecit, huius loci mentionem fecit. Verum & hic seorsum tradatur, cum uel plures uias unius inuestigandae rei, nihil uetet monstrari.

Locorum à genere & specie expositio.

CAP. XI.

**G**enus, qui locus sequitur, quid sit supra diximus. Habet porro parum uirium ad probandam speciem: ad refell



ad refellendam autem plurimum. Neque enim necessum est, si arborem esse dicas, nucem esse oportere. Hinc ita argumentum ducas. Si nulla uirtus est, ne temperantia quidem erit. Si nullus est magistratus, nec erit cōsulatus. Quod si uocabulum omne generi adiiciatur, quod Cicero fecit, omnes species complectaris necessum est: ut, si omne argētum mulieri legatum est, & signata pecunia, legata erit. Si omnes artes conseruari Reip. interest, & rhetoricen cōseruari Reipub. interfuerit. A specie item, quam formam Cicero appellare mauult, argumentum trahitur. Hanc idem notionem esse dicit, cuius differētia, ad caput generis, & quasi fontem referri potest. Habet autem firmam generis probationem, infirmam refutationem: ut, si homo est, animal est: si rhetorice est, bene dicendi ars est: si temperantia est, uirtus est.

Similitudinis & dissimilitudinis explicatio.

C A P. X I I.

**S**imilitudinem, qui locus sequitur, in comparationis locum commodè referri posse diximus: sed & hanc, ut nonnulla alia, seorsum tradi nihil uetat. Est autem similitudo, rerum similitum collatio. Hinc sæpe nunc ad faciendam fidem argumenta sumuntur, nunc, ut frē poētæ faciunt, ad augendum, illustrandumq; copia. Cicero pro L. Muræna, accommodatissima una atque altera similitudine argumenti loco usus contra Catonem, contendentem præter decorum fieri, Consulem Ciceronem, legisq; ambitus autorem, L. Murænā consulem designatum, ambitus reum, defendendum suscipere. Quod si inquit, in his rebus repetendis, quæ man-



cipij sunt, is periculum iudicij præstare debet, qui se ne-  
 xu obligavit, profecto etiam rectius in iudicio *COSS.*  
 designati, is potissimum consul, qui consulem declara-  
 uit, autor beneficij Populi Romani, defensorq; periculi  
 esse debet. Et paulo infra: Quod si portu soluentibus,  
 ij, qui iam in portum ex alto inuehuntur, præcipere  
 summo studio solèt, & tempestatum rationem, & præ-  
 donum, & locorum, quod natura affert, ut eis fauca-  
 mus, qui eadem pericula, quibus nos perfuncti sumus, in-  
 grediantur, quo tandem animo me esse oportet, propè  
 iam ex magna iactatione terram uidentem, in hunc, cui  
 uideo maximas Reipub. tempestates esse subeundas? Ex  
 hoc loco Poëtæ, sæpius ad amplificandum, illustran-  
 dumq; quàm probandum, copiam petunt: id uno exem-  
 plo monstrari, cum innumeris posset, sit satis. Maro,  
 cum infelicem congressum Daretis cum Entello in sin-  
 gulare certamen magis enucleare uellet, eiusmodi usus  
 est similitudine:

Stat grauis Entellus, nisuq; immotus eodem,  
 Corpore tela modo, atque oculis uigilantibus exit.  
 Ille, uelut celsam oppugnat qui molibus urbem,  
 Aut montana sedet circum castella sub armis,  
 Nunc hos, nunc illos aditus, omnemq; pererrat  
 Arte locum: & uarijs assultibus irritus urget.

Duo autem similitudinis genera esse. Cicero docet: al-  
 terum, quo unum uni comparatur, ut iam ostendimus:  
 alterum, quo ex pluribus collationibus aliquò perueni-  
 tur, ut, si tutor fidem præstare debet, si socius, si cui man-  
 daris, si qui fiduciam acceperit, debet etiam procurator.

Quin

Quinetiam exempla ex hoc ipso petuntur loco. Vfus hinc sumpto exemplo Cicero, cum alibi passim, tum pro lege Manilia, ubi Mithridatis fugam, cum Medea antè eodem in loco fuga confert: & sparsa à Medea fratris membra, cum Mithridatis relicto auro atque argento. Primum, inquit, ex suo regno, sic Mithridates profugit, ut ex eodem ponto Medea illa quondam profugisse dicitur: quam prædicant in fuga, fratris sui membra, in his locis, qua se parens persequeretur, dissipauisse: ut eorum collectio dispersa, mærorq; patrius, celeritatem persequendi retardaret: sic Mithridates fugiens, maximam uim auri, atque argenti, pulcherrimarumq; rerum omnium, quas & à maioribus acceperat, & ipse bello superiore ex tota Asia direptas in suum regnum congesserat, in Ponto omnem reliquit. Huc & parabola pertinet: quæ est remotior, longiusq; petita similitudo. Hic equidem miror Agricola, hominem, ut leuiter dicam, & ingeniosum, & eruditum, de hoc loco scrupulosius, quam utilius disseruisse: adeoq; à Cicerone, reliquisq; dissensisse, ut quæ illi similia uocarent, uideri omnino non posse putarit. Non enim similitudinem uideri, sed comparisonem, si duo, aut plura in aliquo tertio, quod utrisque sit commune, conferantur. Vt, si Catoni licuit sequi bellum ciuile, & Ciceroni licuisse sequi: ubi sequi bellum ciuile, ambobus esset commune. Similia uero putanda, non quæ in tertio aliquo, quod ambobus commune esset, iungantur, sed suam singula naturam, uimq; collata ostendant: quod eo docuit exemplo. Quemadmodum uascula oris angusti

angusti, superfusam humoris respuunt copiam, sensim autem instillantibus replentur, sic tenera puerorum ingenia, grandia non percipiunt, modica, & uiribus suis apta, commodius addiscunt. Hic ut paucis dicam, nulla profecto mihi uisa est caussa, similia arctius contrahendi: atque à Cicerone dissentienti. Nam primum illud exemplum, comparisonem dici posse, nemo negat: sed, cum comparatio latissime pateat, sitq; similitudo huius quædam species, idem illud exemplum, & simile cum Cicerone, alijsq; uocare nihil impedit. Dissimilitudo sequitur, quam Cicero differentiam uocat. Est autem dissimilitudo, rerum repugnans similitudo: ut, Brutus occidit liberos proditorem molientes, Manlius uirtutem filij morte multauit. Mire hinc auxit Cicero corpus orationis pro Muræna: ubi Seruij Sulpitij iureconsulti, & L. Muræne imperatoris dissimilia studia confert. Vigilas inquit, tu de nocte, ut tuis consultoribus respondeas: ille, ut eò, quò intendit, mature cum exercitu perueniat: te gallorum, illum buccinarum cantus exuscitat: tu actionem instituis, ille aciem instruit: tu cauēs, ne tui consultores, ille, ne urbes aut castra capiantur: ille tenet & scit, ut hostium copiae, tu ut aquæ pluuiæ arceantur: ille exercitatus est in propagandis finibus, tu in regendis.

Contrariorum explicatio. CAP. XIII.

**A** Contrarijs item argumenta trahimus. Sunt autem contraria, ea, quæ secum è diametro pugnant: quo uel ipso, satis apparet, quid inter hunc, & superiorem intersit locum. Dissimilia namq; sunt atq; adeo  
 i. ferentia

differentia, quæ inter se differant: minusq; modo conueniant. Contraria uero, quæ sibi maxime aduersa, atq; opposita intelliguntur: ut, iuuat, ergo non nocuit. Marcellus ornamenta Syracusanis hostibus restituit: Verres eadem socijs abstulit.

Adiunctorum explicatio. CAP. XIII.

**A**Diunctorum locus sequitur, qui ut latissime patet, ita maximam autoribus rerum copiam suppeditat. Sunt autem adiuncta, quæ ipsi rei, de qua agitur (siue corporea sit, cerniq; atque tangi possit, ut homo, equus, adamas, ciuitas: siue solo intellectu comprehendatur, ut cædes, matrimonium, iustitia) proxime adiacent, cohærentq;. In homine, cui præ cæteris animantibus, rebusq;, plurima adiacent, acciduntq;, primum ea spectanda uidentur, quæ in animo posita sunt: quod genus sunt, aut uirtutes, ut prudentia, iustitia, temperantia, fortitudo, religio, pietas, modestia, beneuolentia, & contraria ijs uitia. Aut artes omnis generis, ut grammatica, rhetorica, musica, physiologia, medicina, iurisprudentia, pictura, fullonia, agricultura, militia, aliæq; id genus multæ, quæ partim cognitionis, partim actionis sunt. Aut affectus ipsi, tam mali, quam boni, ut amor, desiderium, gaudium, spes, misericordia, ira, odium, inuidia, & cætera. Huc deniq; omnes animi cogitationes, iudicia, consiliaq; pertinent. Istiusmodi serè in animo: in corpore uero spectantur, ætas, forma, ualetudo bona, seu aduersa, sitis, fames, somnus, uigilia, pallor ex metu, rubor ex pudore, &c. Iam uero omnes actus huius loci sunt, ut scribere, dicere, bellare

bellare, ædificare, bibere, dormire, & id genus innume-  
 ra alia : quare sua cuique dicta, factaq; sunt adiuncta.  
 Sunt item adiuncta, non homini modo, sed & cæteris  
 rebus omnibus, locus, & tempus. Neque enim fieri po-  
 test, ut quicquam extra locum, tempusq; consistat.  
 Hinc firmissima sæpe petuntur argumenta : ut si eum,  
 qui quid male fecisset, diuerso in loco id temporis fuisse  
 conuincas. A loci natura, cum passim, tum pro Milo-  
 ne Cicero argumenta duxit. Quinetiam ijs annume-  
 randa, quæ personis non ita ex proximo, ut ferè hæte-  
 nus dicta, sed ex magis longinquo adiacent: ut coniunx,  
 liberi, parentes, patria, & quæ à Fortuna obtingunt  
 bona, res familiaris, ædium, agrorum, pecorumq; pos-  
 sessiones. Hæc ferè sunt, aut his similia, quæ personis  
 sunt adiuncta : unde & quæ cæteris animantibus re-  
 busq; adiaceant, facile colligi potest : ut in magnete uis  
 attrahendi, in adamante, fugandi ferri conspicitur.  
 Animaduertendum autem, locum hunc, non solum tria  
 complecti tempora, præteritum, præsens, & futurum,  
 ut si à præteritis dictis, factisq; , à præsentibus item co-  
 pijs, atque facultatibus, tum à futuris commodis, ali-  
 quem ad honeste faciendum, magnasq; res consequen-  
 das adhorteris, sed & in ijs, quæ præterierunt, quos-  
 dam temporum gradus, atque interualla : nempe quod  
 anteceßit : simul extitit : & insequutum fuit. Vt si  
 quem uita defunctum laudādum suscipias, primum com-  
 mode ab ijs, quæ tempore anteceßerunt, nempe natio-  
 ne, patria, parentibusq; commendes : deinde ab ijs,  
 quæ cum eo simul tempore extiterunt, fortuna, cor-  
 poris

q: p  
 d: b

d:

q: p  
 d: b

q: f  
 d: l

poris, animiq; bonis, quibus recte sit usus: postremo ea prædices, quæ demortuo ad honorem, & nominis gloriam acciderunt. Factis etiam, rebusq; quæ non tam cernuntur, quàm intellectu comprehenduntur, & in iudicium ueniunt, adiuncta sunt ea omnia, quæ has ipsas antecedunt, simul sunt, & subsequuntur, Rem porro antecesserunt, apparatus, colloquia, locus, constitutum conuiuium, & similia. Cum re sunt, pedum strepitus, murmur, hominum umbræ, & his similia. Post rem uero, rubor, pallor, titubatio, cruentus gladius, & id genus alia facti signa. Cicero, quia hunc locum præcipue ad coniecturales causas, quæ in iudicium ueniunt, pertinere putauit, ea breuiter, dilucidèque indicauit, quæ ad facti coniecturam pertinerent: nos simul & quæ in reliquis generibus hinc sumi possunt, utcunque aperuimus. Quare usum huius loci, quanquam alibi suo loco fusius declarabimus, hic tamen, quis in unoquoque genere sit, paucis obiter perstringamus. In laude igitur, aut contra uituperio, ubi non tam ad probandum, quàm delectandum exornandumq; oratio suscipitur, mirabilis hinc rerum copia ducitur: dum hominem, qui ferè laudandus suscipi solet, primum à patria, à parentibus, amicisq; laudes: deinde, si is ordo placet, alius nanque atque alius esse potest, quas opes consequutus sit: tum corporis bona attingas, robur corporis, formam, staturamq;: postremo ad animi bona, quæ imprimis laudem merentur, peruenias: quæ ut multæ, & uariæ sunt, aliæq; in alijs, ita nemini hic oratio deesse potest. Ab his animi bonis Cicero Pompeium laudando,

suasit

suasit Quiritibus, eum potissimum Mithridatico bello ducem esse præficiendum: ubi laus in suasionem uersa est. Quod si forte hic ordo minus placet, licet primum animi uirtutes laudandas suscipias, deinde ad corporis, postremo ad Fortunæ bona peruenias. Copia hæc omnis ab adiunctis ducitur: quæ ex comparationis loco, alijsq; mirabiliter augeri potest. In suadendo autem, ubi argumentis res agitur, ad præclare aliquid faciendum aliquem adhorteris à patriæ, parentumq; expectatione: ab ipsius fortiter ante dictis, recteq; factis: ab ætate, corporis robore, facultatibus, amicorumq; operatum à nominis gloria, & commodis, quæ sit consequuturus. Iam uero causis coniecturalibus, quæ in forum ueniunt, familiaris admodum hic locus est. Vt si forte cædes facta sit, ab ijs, quæ cædem antecesserunt, simul fuerunt, postq; secuta sunt, percussorem prodas. Antecedentia sunt, inimicitias eum cum interfecto gessisse, sæpeq; iurgatum, atque mortem minatum esse. Cum re coniuncta sunt, auditum clamorem esse, atq; interfectoris nomen sæpius incusatum. Post insecuta sunt, solum eum ex eo ipso loco, ubi cædes facta fuit, gladio, uestibusq; sanguine conspersis uenisse: & appellatum de cæde, palluisse, fugamq; quæsisse. Quæ omnia, & his similia, hinc ducta, ut singula parum, ita plura congesta, plurimum ad probandum uirium habent, ac penè nullū dubium relinquunt. Rodolphus Agricola adiuncta in sex aut septem locos distraxit: Mihi profecto nouandi hic aliquid nulla uisa est causa, cum præsertim & teste Fabio, hæc magis secari citra obscuritatē, natura rerum

non



non patiatur: & apud illū, tam modo res distractæ, quæ natura coniunctæ erant, sed ne ipsa quidem locorum nomina, ita magnā præ se differentiam ferunt. Quare, quæ ille adiacētia, cōtingentia, cōnexa, actus, locum item, & tempus uocat, nos cum Cicerone adiuncta uocamus.

Testimoniorum explicatio. CAP. XV.

**A**diunctis nos quidem & testimonia adiecimus: quæ Cicero extra rem posita, longeq; disiuncta, extrinsecus assumi dixit. Sunt autem testimonia, diuina & humana. Diuina nunc recte Saluatoris nostri, Prophetarū, Euangelistarū, Apostolorumq; dicta, scriptaq; uocemus: unde sumpta argumenta, suo iure plurimum in animis Christianorū ualebunt. Humana autem sunt, autoritate præstantium uirorum dicta, iussaq; testata, scripta, ut leges, instrumenta, iurata, promissa, pacta, quaestionibus expressa, rumores, aliaq; id genus. Hæc omnia esse huius loci ab adiunctis, non minus, quàm superiora illa, nemo mediocris iudicij inficias eat. Nam iurata, testata, promissa, denique omnia dicta, scriptaq; suis de rebus, ad quas referri possunt, scripta, dictaq; esse necessum est. Sic & euangelia, Apostolorumq; scripta, ad Christianos sunt referenda. Quod autem Cicero locorum numero hæc exemerit, atque arte carere dixerit, nulla alia causa est, nisi quod hæc orator, non ita ut superiora inueniat, sed causa secum adferat: quemadmodum Cicero, Archiam poëtam, ciuem Romanum esse, non tam argumentis à se inuentis, quàm ampliſsimorum hominum testimonio probat. Quæ causa fuit, cur & Aristoteles testimonia, πῖς δὲ ἀνθρώποις, hoc est inartificiales probationes uoca-



rit : quem Fabius, & interdum Cicero sequuti, eodem pacto appellarunt. Quare, cum testimonia per omnia eadem sint cum adiunctis, non propterea seiungenda putavi, quod non tam orator inuenire, quàm caussa secum ferre uideatur : cum præsertim, & suam inuentionem habeant, summaq; arte tractari uelint. Adde, quòd in laude & uituperio, inter testimonia, & adiuncta omnino nihil interest : quin tam inde, quàm hinc susceptam rem laudes, seu uituperes.

Antecedentium, consequentium, repugnantiumq; explicatio : quæ per omnes ducuntur locos.

CAP. XVI.

**S**equuntur antecedentia, consequentia, & repugnantia : de his, quot autores, tot diuersæ sententiæ. Cicero in topicis hunc locum dialecticorum proprium dicit : longeq; ab adiunctis esse diuersum : quod adiuncta non semper, consequentia uero semper eueniant. Fabius Quintilianus antecedentium non meminit : consequentia autem adiunctis copulat : esseq; interim naturæ, interim temporis dicit. Repugnantia uero eiusmodi exemplo indicat, ut quo à contrarijs differant, planè nescias. Agricola, qui proxime hanc rem ex proëssu tractauit, antecedentia, consequentiaq;, temporum ordine uult esse distinguenda : minimeq; peculiare locos habenda : quòd sparsa per omnes inueniantur : nullumq; hinc, nisi ex alijs locis ductum, sumatur argumentum : accommodatissime autem naturæ, proprietatiq; contingentium accedere posse. Cum igitur alij aliter hæc tradiderint, in re quidem obscura, sed eadem utili, quantum  
in nobis

in nobis est, demus operam, lumen ut ijs uel qualccunque adferatur. Quod si igitur Ciceronem sequamur, necessum est, totum hunc locum cum Boëtio, qui in Ciceronis Topica scripsit conditionalem esse dicamus: argumentumq; ab antecedenti duci, si proponas aliquid, & quod hoc ipsum, quod proponis, sequatur, deinde ad antecedens redeas, atque concludas: ut sit ab antecedenti. Si homo est, animal est, sed homo est, ergo & animal. Si peperit, cum uiro concubuit, sed peperit, quare cum uiro concubuit. Hic proponis aliquid, & quod inde sequitur: nempe, si homo est, animal est: deinde ad id, quod proposuisti, redis, atque concludis: sed homo est, ergo & animal. A consequenti uero argumentari, si quid proponas, & quod inde sequatur, deinde hoc ipsum, quod sequitur, iterum sumas, atque concludas: ut si peperit, cum uiro concubuit: sed non cum uiro concubuit, ergo ne peperit quidem. Hic Agricola non tam locos Ciceronem, quam potius certas quasdam argumentandi formulas præscripsisse, meo quidem iudicio non male disputat. Siquidem ex locis quod ducitur; statim quas uires habet ostendit, citra ullam, quam hic uidemus legem, nunc conclusionem, nunc antecedens repetendi. Porro Fabius, uir acerrimi iudicij, adeo hanc scruitutem non probauit, ut ne meminerit quidem: dicatq; consequentia, quo nomine & antecedentia complecti uidetur, nunc naturæ, nunc temporis esse. Quid? an non ipse Cicero, qui in Topicis hæc nihil commune habere cum adiunctis disputat, de oratore ad Quintum fratrem, ea consequentia

c 2      esse ex

esse exemplo declarat, quæ ipsam rem sequuta sunt ad-  
iuncta signa? Quare huius pace nobis licebit, rem late  
patentem, non arctius, quàm ipsa postulet contrahere.  
Sunt igitur antecedentia, consequentiaq; quæ sparsa  
per omnes locos, partim naturæ, partim temporis sunt.  
Naturæ autem uocamus ea antecedentia, consequen-  
tiaq; in quibus temporis gradus, quem ipsa præ se fe-  
runt nomina, non deprehenditur; sed positis antece-  
dentibus, naturaliter consequens sequatur. Quæ hu-  
ius generis sunt, ab omnibus locis trahas. A' definitio-  
ne, quæ genere & differentiis constat, atque adeo ab  
adiunctis petitur. Si homo est animal rationale, turpem  
uoluptatem non sequitur. Si iustitia est uirtus suum cui-  
que tribuens, recte à bonis iudicandum est. Si perfidia  
est malum, non est fallendum. A' partibus: Res est quæ  
fundamento, parietibus, tabulatis, tectisq; constat, er-  
go domus est. A' ui nominis: Iupiter est iuuans pater,  
ergo mortales iuuat, & non perdit. A' coniugatis:  
Compascuus ager est, quare compascere licebit. A' ge-  
nere: nulla arbor est, ergo nec platanius: nulla ars,  
quare ne rhetorica quidem. A' specie: si homo est, ani-  
mal est: si dies est, lux est. A' simili: si patri pietas de-  
betur, debetur & matri. A' contrario: si iniquitas ma-  
lum, æquitas bonum erit. Ab adiunctis, non omnibus,  
sed ijs, quæ citra temporis ordinem, cum ipsa re maxi-  
mè iuncta sunt, coherentq;: ut, si homo est, animal ri-  
sibile est: palluit, ergo timuit. A' causis item, quæ nul-  
lum temporis interuallum habent: ut, sol fertur supra  
nostrum hemisphærium, quare dies est. Ab effectis:

*Dies*

Dies est, ergo sol fertur supra hemisphaerium nostrum. Sic & comparata tibi hæc suppeditent. Possunt autem magna ex parte conuerti : quam causam nonnullis fuisse puto, cur hæc antecedentia, & quæ hic naturaliter sequuntur, uno nomine consequentia appellarent. Temporis uero antecedentia, consequentiaq; sunt, cum ex temporis interuallo, quod ipsa uolunt nomina, ex antecedentibus consequentia, & hinc uicissim illa indicamus, & confirmamus. Locos & hæc plures habent : maxime tamen proprios, adiuncta, caussas, & effecta. Antecedentia ab adiunctis istiusmodi sunt : ferro ante petijt, mortemq; minatus fuit, quare & eadem fecit. Cum uirgine sæpe collusit, solusq; cum sola aliquoties inuentus, quare & demortuæ partum suum esse non negabit. A causis : Datum uenenum insciens hausit, ergo & morietur. Hic ex ijs, quæ antecesserunt, postea facta probo, atque confirmo. Consequentia autem ab adiunctis, hoc pacto sumas : Diducti uerbis inter se non constituerunt, quare sceleris consilia agitarunt : Res ablata domi ipsius inuenta est, quare furtum fecit : In pedes se coniecit, salutemq; fuga quæsiuit, ergo eadem fecit. Ab effectis : Hauſto poculo statim concidit, mortuusq; est, ergo uenenum bibit. Ostendimus utcunque antecedentia, consequentiaq; sparsa per omnes locos, partimq; naturæ esse, cum absque temporis gradu, ex antecedentibus naturaliter aliquid consequatur : quod genus ferè & conuerti possit : partim temporis, cum iuxta ipsorum uim nominum, temporis interuallo, ex antecedentibus consequentia, & hinc uicissim illa com-

probamus : quibus, qui uolet, probetq; , & illa Cicero-  
nis , quorum supra meminimus adiiciat. Repugnantia  
restant, quæ sunt secum quasi pugnantia : ut, Cælius  
cum literarum studiosus sit, turpi amore non capitur.  
Repugnant nanque, literas, & uoluptatem sequi. Fa-  
bius repugnantia eadem esse, quæ contraria, exemplo  
declarauit. Verum hoc intersit, omnia quidem contra-  
ria repugnantia , sed non contra omnia repugnantia,  
contraria dici posse. Dissimilia nanque, atque adeo diffe-  
rentia, quæ non secum è diametro pugnant, ut contra-  
ria, sed collata modo sese non ferant, hoc item nomine  
ueniunt. Quare, quanquam hi loci, quod sparsi per reli-  
quos proprii uideri non possint, seorsum tamen tradi, &  
quasi plures uias ad unam, eandemq; inuestigandā rem  
munitas monstrari, nihil uetabit.

### Causarum & euentorum explicatio.

CAP.

XVII.

**C**Aussarum locus, qui latissime patet, sequitur. Sunt  
porro causæ, quæ efficiunt aliquid, quod adeo ferè  
abesse non potest, ut nisi appareat, causa esse, diciq; ne-  
queat. Harum autem aliæ naturaliter, necessarioq; effi-  
ciunt : ut sol exortus est, quare dies est : ignis est, ergo  
comburit : natum est, ergo morietur. Aliæ non necessa-  
rio, ut uirginem sæpe alloquitur, quare amat : in studia  
literarum incubuit, ergo doctus. Hic animaduertendum,  
materiam, instrumentum, locum, tempusq; , efficiendi  
per se naturam habere propemodum nullam, sine ijs ta-  
men ipsis, fieri omnino nihil posse. Neque enim sine ma-  
teria,

teria, instrumentoq; , ne dicam loco, & tempore, domus extrui, aut quicquam fieri potest. Verum locus, tempusq; , interim tamen & per se efficiant, ut si locum paludinosum pestis, & tempus longum ruinæ ædium causam dicas. In causis item, quæ non necessario, naturaliterq; efficiunt, finis etiam, cur aliquid fiat, spectandus est. Ea porro omnia, quæ animi humani præmeditatione, consilioq; fiunt, finem suum destinatum, utilem, honestum uel spectant : qui, quanquam effectu, usuq; sit postremus, ipsa tamen agentis destinatione, institutioneq; primus est, efficiensq; causa appellandus : ut nauigat mare, & cum uitæ periculo merces auehit, nempe ut rem faciat, feliciorq; inde uiuat : domum extruit, non certe alium in usum, finemq; , quàm ut inhabitet : literas discit, ut de rebus tam diuinis, quàm humanis recte iudicet. Effecta quæ sint, ex causis, unde sequuntur, apparet. Natura nanque hæc ita coniuncta sunt, ut altera sine alteris esse nequeant : & ut causæ effecta, ita hæc uicissim illas indicant, produntq; . Vt, dies est, quare sol est supra hemisphærium nostrum. Hic ab effectis causam ostendo. Solis namq; cursum, supra hemisphærium nostrum, causam diei esse, certum est : Emoritur, quare & natum fuisse, constat. Loci hi à causis, & effectis, omnibus, siue dicturi scripturiue sint, summam copiam suppeditant : plurimusq; horum, in omni rhetorices genere usus est. In laude nanque, aut contra uituperio, quantam hinc copiam poëta, historici, rhetoresq; sumunt? In suasorijs item, dum aut ab utili, honesto, necessario, possibili, faciliue argumenta trahimus, an non à causis efficientibus

ductis argumentis persuademus? Quanquam autem ex his, utilia maxime, atque honesta, à fine effectisq; sumi uideantur, si ad res suas gestas, unde manarunt referas, tamen, si ad agentem accommodes, cuius animum ad agendum, suscipiendumq; negotium primum impulerunt, causæ efficientes, hincq; sumpta argumēta, à causis efficientibus ducta putabuntur. Necessitudinem uero, possibilitatem, facilitatemq;, conficientes causas esse satis liquet. Iam uero in iudicio, quot hinc argumenta petuntur? dum à causis, effectisq; criminando, nunc factum conuincimus, nunc iniquum impiumq; ostendimus. Sed hæc suo loco indicabuntur.

Comparisonis expositio. CAP. XVIII.

**P**ostremus, latissimeq; patens comparisonis locus est: ubi maiora minoribus, & contra minora maioribus, paria paribus comparantur. Plurimus huius ubique usus, maximeq; obuius est, in coniectura, definitione, & iuris quæstione. Coniectura à maiori: Si de patris uita cogitauit, & de nepotis cogitare non dubitabit. A minori apud Ciceronem pro Archia poëta: Et enim cum mediocribus multis, & aut nulla, aut humili aliqua arte præditis, gratuito ciuitatem in Græcia homines impertiebantur, Rhegynos credo, aut Locrenses, aut Neapolitanos, aut Tarentinos, quod scenicis artificibus largiri solebant, id huic summa ingenij prædito gloria noluisse? Ex pari: Qui ob rem iudicandam pecuniam accipit, & ob dicendum falsum testimonium accipiet. Definiendi hinc ratio quæ sit, supra ostendimus. De iure si quærat, ita à maiori probetur: Si fu-

rem



rem nocturnum per leges occidere licet, qui domi deprehensum uulnerauit, nihil peccasse credetur. A minori: Si parentibus, unde in lucem editi, educatiq; sumus, præstanda pietas est, maxime ipsi Deo, cui, cum uitam, tum ipsius animæ immortalitatem, salutemq; debemus. A pari: Quæ pietas patri, eadem & matri debetur. Exempla item huc pertinent: quæ sunt res gestæ, aut ut gestæ, ad persuadendum accommodatæ. Ducuntur autem à maioribus ad minora, & hinc uicissim ad illa. A maiori: Si reges suos Tarquinius Romani nondum Christiani, quod inuitæ Lucretiæ pudicitiam eriperint, urbe, regnoq; deturbarunt, idem hoc flagitium, in priuatis ciuibus, & Christianis, non est ferendum. A minori, apud Ciceronem in Catilinam: At uero uir amplissimus, P. Scipio Pontifex maximus, Tiberium Gracchum mediocriter labefactantem statum Reipub. priuatus interfecit, L. uero Catilinam, orbem terrarum cæde, & incendijs uastare cupientem, nos c o s s. perferemus? Ducuntur item à simili, & dissimili, & contrarijs, quorum locorum, cum supra exempla posuerimus, & uel hinc, quæ istorum natura sit pateat, breuitati hic studebimus: cum præsertim, plures huius loci species sint, quàm persequi facile, aut poterimus, aut opus sit. Comparantur nanque, alia numero, dum unum pluribus, paucis bona, mala uel multis, diuturna breuibus, & id genus alia conferuntur: ubi, quid quibus anteferri debeat, nemo non uidet. Alia specie: ubi ea omnia, quæ per se expetuntur, ijs anteferuntur, quæ propter aliud: ut salus, cum per se expetatur,

c 5      melior



melior medicina est, quæ ob hanc expetitur. Conferuntur hic & innata aduentitijs, à natura accepta uitia, uirtutes uel assumptis, integra corruptis, iucunda iniucundis, honesta utilibus, facilia difficilibus, totum partibus, rara uulgaribus, necessaria non necessarijs, efficientia non efficientibus, nihil indigentia indigentibus, animi bona, uirtutesq; omniaq; quæ in nostra potestate sunt, ijs, quæ Fortune telis sunt exposita, stabilia caducis, publica priuatis, ab optimis laudata, cum ijs, quæ à pluribus. Atque hæc omnia, aliaq; id genus, quanquam partim nouam, propriamq; faciem ostendent, maiora tamen, minoraq; esse, aut similem uim habere deprehenduntur. Similia autem, paria uel, nullos in significando gradus habere, ipsa testimonio sunt nomina. Quare hoc in uniuersum sit edictum, ex hoc comparisonis loco, in omnibus rhetorices generibus, tam ad ornandum, delectandumq; quam ad fidem argumentis faciendam, copiam peti maximam.

Omnes ad unum locum unde manant referri posse, & cur diuersa nomina sumant.

CAP.

XIX.

**E**xplicatis locis omnibus, ut nulla præterea sedes querenda sit, unde ad fidem, copiamq; sumas, quo horum natura, uisq; magis pateat, intuendum nobis, quæ inter hos cognatio sit, quæ tanta est, ut ad unum adiunctorum locum, unde manant, omnes referas: quod eo ipso, quo expositi sunt ordine, ostendemus. Rem igitur ipsam, totumq; quod nisi adsit, nihil est de quo tibi oratio esse potest, si definitione, quæ genere & differentijs

rentijs constat, firmissimaq; est, explicare uoles, ab adiunctis sumas necessum est, quo id praestes. Vt si hominem definias, dicasq; animal esse, nihil praeterea, quam substantiam quandam esse, quae ei cum omnibus animantibus communis est, significasti. Quare ab ijs, quae ei propria insunt, acciduntq; erit definiendus, ut à ceteris animantibus, brutisq; secludatur, solusq; constitutur, hoc pacto: homo est animal rationale, risibile, mortale. Insunt autem homini haec propria, acciduntq; ratio, risus, ipsaq; mortalitas: quae eadem ipsi & adiuncta sunt omnia. Eodem pacto, si hominem partes, membraq; enumerando definias, hinc te definiuisse puta. Sunt nanque sua cuique membra, adiuncta maxime. Quin & etymologia uocabuli, & uicinus huic coniugatorum locus, hinc cadunt. Accidit nanque maximo Deorum, adiunctumq; est, à mortalibus eum Iouem, quasi iuuantem patrem dici: & iusto item, sua recte facta, unde nomen accipit, sunt adiuncta. Genere autem, & specie, totum id de quo agitur, significatur, cuius hic adiuncta explicantur: quod, ut diximus, si absit, nihil est de quo oratio suscipiatur. Iam & similitudinis, dissimilitudinis, contrariorum, comparisonisq; locus hinc oritur, omnemq; copiam sumit. Si quidem ea, quae rei de qua agitur, sit homo, adiuncta sunt, aut inter se conferendo ostendis, modo similia esse: ut si qua impietate in patrem, eadē postea illo demortuo & in matrem extitisse dicas: modò dissimilia: alterum ex liberis natu maiorem uix filium agnoscit, alteri nimium indulget: modò contraria: coniugem suam principio plurimum

plurimum amabat, eandem postea odit maxime. Hinc maiora, minora, paria'ue quæ sint, satis liquet. Hic porro eiusdem hominis facta, quæ ipsi adiuncta sunt, conferuntur. Aut ex huius, de quo dicis hominis externis, corporis, animi'ue bonis, malis'ue, atque adeo factis omnibus, quæ huic adiuncta sunt sumis aliquid, cui, quod foris est, externæq; personæ adiunctum est, comparas: atque ostendis id, aut simile, aut dissimile, aut contrarium, aut maius, aut minus, aut denique par esse: Vt si eius, de quo dicis opes, tantas esse dicas, quantæ Crassi illius olim apud Romanos fuerunt. Sumpta hæc ab adiunctis similitudo est. Nam sua utrique bona sunt adiuncta, quæ collata similitudinem præ se ferunt: & inde hoc nomen accipiunt. Hinc, cum omnia supra abunde exemplis sint declarata, & cætera satis liquere arbitror. Quid de antecedentibus, consequentibus, repugnantibus dicemus? quæ cum ut demonstratum est, sparsa sint per omnes locos, qui ab adiunctis oriuntur, & ipsa simul hinc nasci, nulli dubium esse potest. Restat caussarum, & euentorum locus: qui item, ut cæteri, ab adiunctis nascitur. Sunt autem cuiq; sua facta, animiq; bona, & uitia, adiuncta maxime: quæ tamen ipsa, in causas & euenta conuertuntur, cum à causis euenta, & hinc uicissim illas ostendimus. Vt si honestatem ipsam, causam Cæsari nostro fuisse dicamus, cur contractis maximis copijs, armatus in Turcam processerit. Dicebat namq; Imperatorem, suorum salutem armis, aduersus infestissimum hostem tueri. Sic & iram, causam esse dicamus, cur alter alteri uulnus inflixerit

xerit. Et Naso, desidiā Aegistho causam fuisse dicit,  
cur factus sit adulter.

Quæritur Aegisthus quadrè sit factus adulter,

In promptu causa est, desidiosus erat.

Facta igitur omnia, animorumq; uirtutes, & uitia, ijs,  
quorum ea sunt, adiuncta sunt maxime: quæ tamen in  
causas, & euenta commutantur, cum ab animorum uir=  
tutibus, uitij's ue, ut causis, quæ euenerint bona, mala ue,  
facta indicamus. Porro in suadendo, ubi de futuris ad=  
huc, agendisq; rebus agitur, eadem hæc adiuncta in  
causas conuertuntur. Vt si quencquam, ad faciendum  
aliquid adhorteris ab ætate, opibus, amicorum nume=  
ro, & potentia. Sunt autem huic, cui suades, adiuncta  
hæc omnia, ætas, opes, amicorum multitudo, & po=  
tentia. Verum, cum hinc argumenta ducis, & ad fa=  
ciendum hominem impellis, eadem hæc, causarum no=  
men accipiunt: atque id quod fiet, quò diriguntur  
omnia, euentum appellabitur. Ostendimus breuiter, ex  
uno adiunctorum loco, reliquos omnes emanare. Quod

autem loci, diuersa nomina sumant, inde est,

quod hinc nati, alibi aliam faciem, uimq;

ostendant. Hæc de locis illis, unde

tam dialectici, quàm rhetores,

reliquiq; omnis generis

scriptores, omnia

sumant ne=

cessum

est.

GERARDI BV  
KOLDIANI DE INVENTI-  
tione & Amplificatione Oratoria  
Liber Secundus.

Quid genus demonstratiuum, & quæ huius  
cum cæteris cognatio sit.

C A P. I.



EST AT igitur, ut ad tria illa rhe-  
torices genera, unde digressi sumus re-  
uertamur: atque in singulis, quæ hinc  
inueniendi, amplificandiq; ratio sit  
ostendamus. Demonstratiuum itaque  
genus id esse diximus, quo præterita præsentiaq; , nunc  
laudamus, nunc uituperamus. Plurimum hoc genus com-  
mune habet cum suasorio, adeo, ut alterum alteri sæpe  
coincidat. Siquidem ita ferè fit, ut quæ laudamus, hæc  
ipsa & suadeamus: & contra, quæ suademus, prope-  
modum & laudemus. Itaque oratio Cicronis pro lege  
Manilia, quanquam magna ex parte nil nisi laudem  
Pompei contineat, suasorij tamen generis est. Neq; enim  
orator ad laudandum Pompeium, sed ad persuaden-  
dum Quiritibus uenit, cum recte Mithridatico gerendo  
bello Imperatorem præfici, qui tot tantisq; , tum animi  
uirtutibus, tum sæpius spectata cognitaq; feliciter admi-  
nistrandi belli scientia, unus tantum eniteret, omnibusq;  
antecelleret. Itaque laus hic in suasionem est uersa: con-  
traq; hæc in illam potest. Quare de genere iudicaturus,  
quis rei scopus sit, quò argumenta orator dirigat, im-  
primis spectabit. Induit & naturam generis iudicialis.

Sæpe

Sæpe nanque in clarissimorum hominum laudibus inuenias aliquid, quod nisi purges, multorum animos turbet alienetq;. Vt si Cæsaris nostri multas præclareq; res gestas oratione laudandas suscipias, excusandum forte erit Romam oppidanis nihil grauius timentibus captam direptamq;: non eius id iussu, qui tum longius absuit, sed aut Ducis, aut militis imperio abutentis, & ad prædam auidiore culpa factum. Quemadmodum autem laus sæpenumero defensionem, ita illa uicissim laudem accersit: & ad suum quasi corpus melius uestiendum sumit. Quod ipsum cum alibi passim apud Cicronem uideas, tum in oratione pro Archia poëta: quæ cum iudicialis sit generis, ut qua uatem apud iudices defendat, summis tamen laudibus humanitatis ibi studia uexit. Verum nulla propemodum oratio est tam certi generis, quæ ex alijs non aliquid assumat, suiq; corporis faciat.

Certa laudari seu uituperari oportere.

C A P.

II.

**H**Oc item huius generis proprium, capita rerum quæ laudabuntur certa ferè esse oportere, alioqui non ad laudandum, sed aut adsuadendum, aut ad defendendum uenit orator. Incerta enim dubiaq; laudem mereri in animis hominum omnino nullam possunt. Quod si forte dubijs incertisq; argumentis lucem adferat, iam aut suasoris, aut defensoris personam sumit. Quanquã nihil uetat, quod et diximus, inueniri nonnulla in laudibus posse, quæ interim recte probentur, interim defendantur, modò rerum pondera firmamentaq; certa

certa est constet. Quid ? nulla igitur in hoc genus quæstio, nullusq; status incidit ? Non equidem id omnino disputo. Nam quanquam ea natura laudis sit, ut uera esse uelit, fieri tamen posse minime nego, ea interim quæ pluribus probentur, pauciores, forte doctiores, in dubium uocare posse : & contra, quæ apud hos laudem mereantur, multitudinî minus probari : atque ita uel omnes status, coniecturalem, difinitiuum, iuridicalem, in hoc genus incidere posse : cum & de certissimis quæri, nihil omnino uetet.

Res omnis generis, quæ cernantur tangantur'ue, seu intellectu compræhendantur, laudari aut uituperari.

## CAP. III.

**P**orro præterita, instantiaq; , atque adeo omnia quæ nunc laudamus, nunc contra uituperamus, res sunt omnis generis, quæ aut cerni tangiq; ut homo, equus, urbs, flumen, aut animo intellectuq; cognosci atque percipi possint ut facta, dictaq; , uirtutum item uitiorumq; , tum artium uaria genera, ut prudentia, iustitia, fortitudo, temperantia, eloquentia, medicina, architectura, scientia rei militaris, aliaq; id genus multa. Vitia autem quæ sint, hinc cognosci facile possunt: nempe iniustitia, luxuria, inuidia, & cætera. Ipsius item Dei laus, quanquam quid huic aut nostra laude accedat, aut uituperio adimatur, non uideo, tota huc pertinet. Rerum autem quæ cerni tangiq; possunt, primas partes homines tenent: qui cum cæteris animantibus brutis rebusq; mutis ratione et sermone, tum multis alijs animi naturæq; dotibus antecellant, laudem imprimis sibi



sibi uendicant. Laudamus igitur præcipue personas, urbes, portus, loca, et his similia: præclare itē facta, dictaq; quæ cum uirtutibus coniuncta atq; inde orta esse cōstat. Iam & iuxta uirtutes artesq; aut in certis hominibus, aut seorsum suis ipsas laudibus exornamus.

Qui hoc in genere autores uersentur

C A P.

I I I I.

**L**Atissime autem genus hoc demonstratiuum patet: plurimiq; in hoc uel diuersi generis autores uersantur. Neq; enim ij modo, qui oratione perpetua rē quāpiam laudandam sumpserunt, sed & heroici uates, historiciq; omnes. Quid enim aliud in Iliade Homerus agit, quàm ut Græcorum gloriam, ulciscendi uiolati ab Alexandro hospitij, raptæq; Helenæ caussa ad Troiam uenientium, decemq; hic annos pugnantium, diuino carmine immortalem redderet? Neque tamen ingeniosus uates ita suis lenocinatus est, ut quācunq; urgerent, Troianorum ut ignauorum imbelliumq; hominum fuga cædesq; sit facta. Vtrobique fortitudinem ignauiamq; esse uoluit. Nihil in Hectore Troiano requiras, quod ad fortissimū & ad agendum promptissimum ducem attineat. Thersitem cōtra Græcorū principum unum non modò ignauissimum, sed & ipsa corporis forma capitisq; figura pene monstrum introduxit. Alexandrū autem ipsum effæminatiorem quàm fortiozem nobis depinxit. Achillis cōtra uirtutem quis Græcorum omnium æquauit? quē non fortissimum modò, sed ipsum belli fulmen, hostiumq; terrorem esse cecinit. Iam uero reliquarum maximeq; uariarum



riarum uirtutum uitiorumq; quæ non in alijs atque alijs simulacra nobis exhibuit? Agamemnonem potentia quidem, ijsq; quæ à fortuna ueniunt bonis insignem, nempe omnium principem constituit: sed ad pleraque obeunda, eundem hunc, prudentem minus circumspexitumq;: ut qui nec hominum Deorumq; iram tanti penderet, ut unicum mancipium ipsam Briseida patri suo Apollinis sacerdoti repetenti reddendam putaret, numenq; reconciliaret. Nō uniuersorum Græcorum, quos quanquam sui fratrisq; gratia arma sumpsisse, & ad Troiam uenisse intelligeret, peste tamen ab irato Apolline immissa emori passus est. Non ipsius Achillis, cuius unius omnium cum summam militiæ felicitatem, fidemq; sanctissimam in eum diem expertus esset, non modo tamen eum temere à se abalienauit, sed propemodum hostem fecit. Non denique ab irato Apolline, cum in uniuersos Græcos, tum in suum ipsius caput grauiora pericula timuit. In Nestore autem sene quantam prudentiam, quantamq; eloquentiam uidemus? Quid de Vlyssæ dicam? qui armis multum, eloquentia plurimum ualuit: & ubi res non tam uim, quàm technas poscebat, ad struendum dolum uersutissimum & accommodatissimum ingenium habuit. In Telemonio bellicam quàm eloquentiæ iudem maiorem cognoscimus. Gradus etiam eloquentiæ in principibus esse uoluit. Vlyssæ sublime illud dicendi genus tribuit: quem rerum & uerborum copiam, supra quàm dici potest locupletem, nec tam o. antem, quàm fulminantem introduxit. Nestori autem ipsi ge-

nus mediocre, cui quidem tum suauem, tum copiosam splendidamq; orationem tribuit: adeo, ut huius ab ore melle dulciorem orationem fluxisse memoria proderet. Menelao breue laconicumq; assignat genus: cuius oratio, quanquam breuis, nec exquisita rerum uerborumq; copia instructa fluere, dilucida tamen, et ad cuiusque captum perquam accommodata. Iam uero in Odyssea quantum nobis fortitudinis, continentiae, ueræq; ad omnes fortunæ casus patientiæ, et propemodum omnium animi uirtutum exemplum Vlysssem proposuit? Hic dum à bello decem annos mari errat, adeo animum non abiecit, quin, ubi res posceret, suam, suorumq; salutem uel armis protegeret: et cum ad Cyclopi antrum deuenisset, claususq; ibi deuoratis sex socijs periculose teneretur, forti animo ingenioq; sibi suisq; excæcato Polyphemo salutem quæreret. Hic Calypsus Circesq; blanditias elusit: effœminatisq; et in bestias, quia in uenerem procliues rationem ducent non sequerentur, commutatis socijs, infractum animum solus tenuit: solus ad inferos descendit: cognitisq; hic quæ uoluit, ad superos redijt. Has easdem autem uirtutes et in huius coniuge Penelope quantas uidemus? ut nescias, in hoc ne, an in illa magis admirari debeas. Nam decem annos dum ad Troiam pugnabatur, non modò castissimam uitam duxit, sed ueræ pudicitiae, coniugalisq; amoris de se exemplum uniuersis præbuit. Deinde capta Troia, omnibusq; reuersis ad suos unoquoque principibus, cum suum diutius emanere cerneret, nec certò nuntiari ubi gentium aut mortem

d 2 obierit,

obicit, aut impeditus moram traheret, non modò multis expetentibus nemini nupsit, sed pudicum & inuiolatum corpus ingenij artibus, cum uiribus non posset, in uigesimum usque annum reseruatum suo demum redeunti Vlyssi leta restituit. Nam cum à procis, nobilissimis, potentissimisq; suæ gentis iuuenibus undique ad se confluentibus, ad nubendum indies magis ac magis sollicitaretur, remq; suam familiarem, quæ uel sola res magnum ad maturandas nuptias momentum esset, dilapidarent, & parum consilij, minusq; præsidij in suis domi, Laërte iam decrepito, & Telemacho tum adolescentulo, positum animaduerneret, ut simul animi curas qua posset arte leniret, simul honestam procis nuptias suas differendi, inq; plures dies protrahendi excusationem afferret, ne aut mortuo suo Vlysse contempsisse quencquam, aut tandem redeunte polluta à quoquam deprehenderetur, telam texendam suscepit ad faciendum Laërti iam è senio ægre uitam trahenti rationem: quo confecto, promittit & se demum desituram de sui coniugis reditu sperare, atque in nouum matrimonium concessuram. Verum dum sola de sui Vlyssis reditu bene sperat, quantum interdium confecit, nocte rursum abscidit: unde intelligi poterat, ad solas animi curas utcunque mitigandas, & honeste potius proferendas, quàm maturandas nuptias hanc sumpsisse operam. Quid hic deum immortalem aut de scœmina admirabilius, aut ad coniugalem fidem sanctius, aut denique ad summam animi uirtutum laudem, non dico dici, sed omnino excogitari à uate potuit? Sed quæ intem-

rim Clytemnestra in suum absentem coniugem fides  
 extitit: hæc contra, pugnante ad Troiam Agamemno=  
 ne suo marito non modo turpissime cum Aegisthorem  
 habuit, sed insuper adultera cum adultero de uita coniu=  
 gis cogitauit: Troiaq; redeuntem fœdissime trucidauit.  
 At quorsum hæc tendunt? quò spectat oratio? cò certè,  
 ut pate scat, utrunque hoc Homeri poema in demon=  
 stratiuo constitutum genere: nihilq; hic nisi aliorum ui=  
 tuperia, aliorum laudes contineri: & quasi quoddam  
 speculum rerum humanarum esse. Quod de Homeri  
 poëmatis diximus, idem de Vergilij nostri Aeneide po=  
 test: ubi cum multis magnisq; Fortunæ corporisq; , tum  
 maximis animi laudibus, quæ solæ propemodum ueræq;  
 existimandæ sunt, Aeneam suum uexit. Quæ enim uir  
 ille capto Ilio complures annos mari patienter tulit, &  
 deinde terra strenue fortiterq; gessit, summis prosequu=  
 tus est laudibus. Quo autem ordine uterque uates id fe=  
 cerit, suo dicetur loco. Iam & historiographos in hoc  
 uersari genere cui dubium esse potest? qui si hoc nomi=  
 ne appellari uolent, res gestas, non secus ac gestæ sunt,  
 nihil falsi addendo, aut ueri reticendo, seruato tem=  
 poris ordine narrabunt. Quod dum faciunt, quando  
 recte facta cum honestate, & quæ contra cum uitijs sint  
 coniuncta, fieri non potest, quin inter exponendum,  
 eos quorum probe facta sunt laudent, quorum con=  
 tra male, turpiterq; , hos uel inuiti historiæ lege cogen=  
 te uituperent. An non Titus Liuius Patavinus, ut de  
 nostris, qui in omnium manibus uersantur dicam, egre=  
 gius est buccinator uirtutum uitiorumq; Romani po=  
 d 3 puli?

puli? ut qui lactea eloquentiæ copia, perpetuaq; oratione, res gestas ab Vrbe condita ad sua usque tempora, summumq; imperium perduxit. Quibus artibus, consilijsq;, populus ille modicus, tenuisq; primum uiam strauerit ad summam democratiam. Deinde cum imperio unâ & uitijs in animis hominum crescentibus, eadem ipsa arma, quibus terrarum orbem domuerat, in sua ipsorum uiscera conuerterit: & quemadmodum multis magnisq; animi uirtutibus parsimonia, iustitia, innocentia, atque imperandi æquitate incrementum sumpserat imperium, ita contra uitijs, luxu, rapinis, priuata iniustaq; dominandi cupiditate conciderit. Quid? non Sallustius adeo corruptos sui temporis mores perstringit, ut non defuisse, uel senatorij ordinis homines dicat, qui cum Catilina de euertendo Reipub. statu coniurarint? Non defuisse, qui acceptis largitionibus sceleratissimæ Ingurtham defendendum putarint? Quod de nostris, idem de Græcis censendum. Huc & Plinij nostri Secundi Veronensis historia naturalis pertinet: ubi, quanquam non personas ut facta, ut poëtæ historiciq;, aut laudet, aut uituperet, sed rerum naturalium cognitionem tradat potius quàm laudet, tamen, cum citra argumentandi probandiq; necessitatem quæ rerum coelestium terrestriumq; natura sit non sine summa delectatione doceat, huius generis eius scriptum esse negari non potest. Delectare enim sine contentione argumentisq;, cum docere uniuscuiusque sit, epideicticæ orationis proprium est. Quanquam & hunc, pterisque rebus suam amplificando adiecisse laudem, testimo

testimonio est ipsum opus. Est ubi res narrantur cum maiori delectatione, quam amplificatione: quod ipsum Ovidius in metamorphosi rerum uariarum transformationem canendo fecit. Quinetiam huius generis sunt Satyrici, Comiciq; quorum illi, hominum uitia uel nominatim insectantur: hi sumpto figmento uerisimili, rerum uerborumq; elegantia hoc consequuntur, ut sui uoluptate nunc lectorem, nunc auditorem spectatoremq; retineant. Adde præcepta dantium diuersa autorum genera: rerum rusticarum: ut Maronis Georgica: Columellæ Catonisq; scripta: rhetorices, ut Fabij Institutiones: compluraq; Ciceronis: medicorum item, & physicorum multa: denique artium rerumq; præcepta omnia: quæ ingredi molestum, persequi prope infinitum foret. Nec me præterit, uideri pleraque horum suasorij potius generis, qui cum hoc multum commune habere diximus, faciem ostentare: quod præcepta, cum ieiuna ferè sint omnia, paruam copiam delectationemq; adferant, & sola rerum utilitate legantur. Verum cum ea quæ traduntur certa ferè sint omnia, citraq; omnem probationum argumentorumq; pugnam perpetuo orationis ductu exponantur, etiam si nuda ieiunaq; sit oratio, nec tam delectet quam doceat, tamen demonstratiui potius quam suasorij generis uideri oportebit. Neque enim Crispus Sallustius eo minus historicus est quam T. Liuius, aut in alio atque ille rhetorices genere uersatur, quod hic nude breuiterq;, ille copiose splendideq; res gestas percrebat.

Quæ laudari oporteat uituperari'ue, ex  
uno adiunctorum loco sumi

C A. V.

**D**iximus quæ demonstratiui generis cognatio cum reliquis esset: certa item esse oportere, quæ laudari aut contra uituperari deberent: tum res omnis generis quæ cerni tangiq; aut animo intellectuq; percipi possint, huc pertinere: postremo qui potissimum hoc in genere autores uersentur. Nunc igitur, cur maxime hanc suscepimus operam, quæ illis ex locis, quos supra exposuimus, hic inueniendi amplificandiq; ratio sit, subinde prosequamur. Vnus igitur adiunctorum locus ea omnia nobis quasi digito monstrat, quæ laudari uituperari'ue oporteat. Admonet enim hic, ea omnia, quæ rebus laudandis uituperandis'ue adiuncta sunt, quandamq; ad has cognationem habent, aut laudibus uehenda, aut insectanda esse: ubi & temporis gradus recte scruari poterit. Antecedunt autem hominem, quando personas imprimis laudari diximus, patria, genus, parentes, consanguinei, cognatiq; unde laus uituperium'ue trahi potest. Deinde quæ fortunæ, copiarq; sunt dicendum erit: atque hæc quidem externa sunt omnia. In tribus enim generibus laudes & uituperia uersantur: externis, corporis, & animi: quorum omnium unus hic adiunctorum nos admonet locus. Corporis igitur bona mala'ue sunt statura, figuraq; corporis, ipsaq; ualetudo & robur, imprimis autem forma, quæ certissimus ferè animi index esse solet. Animi autem laus, ea est, quæ potissimum suo iure prædicari debeat. Atque hic duplex  
se di



se disponendi ratio offert. Aut enim temporum seruatō ordine dicendum quæ iam nati, atque in lucem editi educatio, indoles'que fuerit: quibus morum artiumq; magistris sit usus: quantum quo in disciplinæ genere profecerit: deinde cum iam adoleuerit ætas, quæ tam domesticis priuatisq;, quàm publicis in rebus prudenter, iuste, fortiter, temperanter'que fecerit, dixerit, tulerit'ue. Aut quod Cicero in Pompeiana fecit, uaria multa'que facta, ad sua uirtutum genera sunt referenda. Atque hic, cum omnis uirtus posita sit, aut in cognitione scientiæ'que, ut prudentia, calliditas, eloquentia, iurisprudentia, ars militaris, & reliquæ multæ & uariæ labore, usu'que paratæ, aut in actione, ut iustitia, fortitudo, temperantia, commode primum laude prosequimur, quæ prudenter, callide, docteq; tum quæ iuste, fortiter, temperanterq;, tam suis in priuatis domi, quàm foris publicis in rebus fecerit, dixerit, perpeßus'ue sit. Quanquam ne hic quidem, certus ut uirtutum, cum nullus temporum ordo seruetur, est necessum, quo minus ipsarum rerum naturæ causæq; seruiatur. Quapropter laudaturus, diligenter apud animum expendet, quid causâ postulet: temporis'ne potius ordo in exornandis factis seruetur, an ad sua quæq; uirtutum genera exigantur.

Quæ ab adiunctis inuenta, cæteris ex locis  
amplificandi ratio sit: & primum in  
hominis encomio patriæ laus  
per locos ducitur.

C A P. VI.

d 5

Que

**Q**Uæ laudari oporteat ex uno adiunctorum loco petenda esse ostendimus: qui si certis, quas ornandas suscipis personis admoueat, cum singulis sua quædam fortunæ, corporis, animiq; propria bona sint, quid in laudem adduci debeat, semper ad manus erit. Nunc igitur subinde, quibus ex locis hæc ipsa amplificari augeriq; debeant, erit dicendum. Neque enim solum ex uno atque altero, sed ex omnibus illis quos supra commemorauimus locis, extendi hæc possunt. Nam cum in singulis his tribus rhetorices generibus tota uersetur rhetorica, omnium quoque locorum in singulis usum esse negari non potest. Præcipuus autem horum usus est, definitionis, quæ hic, cum res non ieiune breuiter que ad faciendam fidem explicetur, sed pluribus ad delectandum augeatur exorneturq; , descriptionis nomen accipit: similitudinis item, dissimilitudinis, contrariorum, adiunctorum, testimoniorum, causarum, euentuum, comparatorum: antecedentia & consequentia per omnes sparsa locos supra ostendimus. Verum & aliorum interim creber usus est. Rarior tamen hic locorum à genere & specie usurpatio est: unde cum res petita, non tam ad amplificationem, quàm fidem ualeat, crebrior in reliquis generibus erit. Cum igitur patriam hominis laudandam esse adiunctorum nos locus admoneat, huc & reliquos admoueamus, ut quid ad copiam ex unoquoque sumi possit, intelligamus. Descriptio ergo quæ materiam ex adiunctorum mutuatur loco, ut est ordine prima, ita huc commodè primum admota, rem ipsam extendet plurimum, dum describitur,

describitur, qua in natione, quo in loco, fertili an sterili, maritimo an campestri sita ciuitas sit : quæ & publicæ munitiones : quæ ædium frequentia, magnificentiaq; : quod genus descriptiones apud poëtas historicosq; leguntur plurimæ : adeo, ut illi augendi delectandiq; studio uel ficta loca describenda interim suscipiant. Ab etymologia nominis item copia peti potest, si uis huius sit, aut insignis cognitaq; , aut eiusmodi, quæ dilucide sciteq; à laudante in rem præsentem erui possit : ut si quis inter laudandum Bononiæ uocabulo, elisa in litera, bona omnia indicari dicat. Voluisse id indito hoc nomine urbis aut primum conditores, aut auctores significare, cum hinc summa agrorum longe lateq; , hinc beatissima surgentis Apennini fertilitate, tum amnium partim agros foris irrigantium, partim intrò multiplicem ad usum labentium copia maxime insignem locum uiderent. Commode huc adiunctorum locus adhiberi posset, qui rebus, de quibus agitur adiunctus est maxime, omnesq; harum circumstantias, quas *περίστασις* illi uocant, uel solus suppeditat : que deinde, per reliquos ductæ locos, incrementum sumunt maximum. Verum, cum & ea quæ descriptio ob oculos posuit, hinc sint petita, nihil uetat & hæc primum, antequam plura inde ducantur, reliquis ex locis dilatare. Augebis igitur à simili, si tuum hunc, cum maxime notæ urbis insignisq; fertilitatis agro confers, ostendasq; , in producendis frugibus, uino, oleo, rebusq; cæteris, similem per omnia in utroque dexteritatem. A' dissimili, hanc tui hominis urbem patriamq; duplici cir-

cumma

cummunitam fossa, tum lata, tum profunda, aggereq; in-  
 termedio altius educto, mœnibus autem, propugnacu-  
 lisq; cum altissimis, summaq; industria ad arcendam uim  
 factis, tum interiori aggere ad summum usque adden-  
 satis firmatisq; : illam uero, una modo obmunitam fossa,  
 mœnibusque utcunque quidem firmis, sed nullo siue lo-  
 ci uitio, siue oppidanorum negligentia, aggere sufful-  
 tis corroboratisq; . A contrarijs: huius urbis regiones  
 omnes latissimis discretas uicis, illius arctissimis, huius  
 mundissimis, illius immundissimis, hic ædes magnificen-  
 tissimas, ibi casas humilimas, hic plerasq; omnes lapi-  
 de euectas, ibi argilla lignoq; compactas cerni. Possunt  
 quidem hæc, et à causis extendi : sed ad adiunctorum  
 locum reuertamur.

Diuisio studiorum factorumq; patriæ in sua  
 uirtutum genera. CAP. VII

**V**T autem ea, quæ oculis exposita cerni tangi que  
 possunt amplificanda sint ostendimus : nunc sub-  
 inde et ea, quæ intellectu comprehenduntur, ipsa ui-  
 delicet patriæ studia factaq; in sua uirtutum genera di-  
 stribuamus : et singula deinde per locos ducamus. Pri-  
 mum igitur ipsa prudentiæ facta honore uerborum ex-  
 tollenda erunt : quod forte humanitatis studiorum scho-  
 las instituerint, conseruentque undecunque doctissi-  
 mos accersendo professores, hosq; liberaliter alendo:  
 quod æquisimas leges ad suæ ciuitatis consuetudinem  
 rationemque ciuibus præscripserint, suamq; Rempub.  
 optime constituerint, atque in futurum firmarint : quod  
 item frumento, sale, cæterisq; rebus omnibus, qua-  
 rum

rum sæpe penuria premere ciuitates soleat, tot tantaq;  
 copia comparatis sepositisq; ita sibi in futurum prospere=  
 xerint, ut nec bello obsidionem, nec pace annonam gra=  
 uiolem fore propemodum timeant. Atque hæc inter nar=  
 randum, à loco, & tempore, tum testimonio uicina=  
 rum gentium, alijsq; huius loci circumstantijs augen=  
 da erunt omnia. Deinde ad iustitiæ studia factaq; ue=  
 niendum: quæ suum cuique tribuit, & erga deos reli=  
 gio, erga parentes pietas, creditis in rebus fides, in mo=  
 deratione puniendi, imperandiq;, æquitas uocatur. Ne=  
 que enim minimum laudis meretur, religionem uulgo  
 sanctè conseruari: suumq; parentibus honorem habe=  
 ri: dariq; per magistratus operam, ut creditis in rebus  
 fides seruetur, & imposturæ ita puniantur, ut nec re=  
 missior pœna peccandi licentiam præbeat, nec uehe=  
 mentior iudicis seuitiam arguat. Tum subinde dicen=  
 dum quæ fortiter gesta, aut intra mœnia animaduer=  
 sis certorum hominum flagitijs, Rempub. eaq; quæ re=  
 cta sunt defendendo, aut foris fuis sæpius pugna hosti=  
 bus imperij fines proferendo. Atque hic, non modò eo=  
 rum qui in magistratu fuerunt, sed & priuatorum for=  
 titer facta patriam ipsam honestant: ut Horatorum,  
 Lucretiæ, Horatij Coclitis, Mutij Scæuolæ. Postremo  
 spectemus, quæ sint studia factaq; temperantiæ: quæ  
 cum posita sit in ijs quæ absunt non inhoneste expeten=  
 dis, atque ijs quæ in nostra potestate sunt recte hone=  
 steq; utendis, maximi ad laudem momenti est, consuetu=  
 dine patria, publicis priuatisq; in negotijs temperan=  
 ter continenterq; uixisse: aliena non appetiuisse: suisq;

non ad luxum turpemq; uoluptatem usum fuisse. Hæc ab adiunctis, unde & plura quidem possent, sumuntur omnia: quæ propterea sua in uirtutum genera, non numero, sed rerum pondere distribuenda puto, quod in urbium encomio, quarum sæpe quòd diutissime steterunt, longa annorum serie innumera ferè præclara extant facta, temporis ordinem sequi, præsertim non in harum, sed personæ laudibus, tum infinita, tum perplexa dubiaq; oratio esset. Harum autem uirtutum omnium exempla, prisca illa nobis Romana respub. uel sola suppeditet. Qua in urbe humanitatis studia magis uiguerunt? ijsq; cum præmia, tum maiores honores habiti? ubi principes Reipub. uiri, maximiq; Imperatores, aut ipsi Græcorum academias longis itineribus discendi studio petierunt, aut illos ad se Romam rerum uerborumq; magistros pertraxerunt: ubi sæpe literatis quidem, doctisq;, sed iisdem tamen nouis hominibus summi magistratus mandati: maximum imperium concreditum. Neq; enim magis maiorum imaginibus, quàm eruditioni uirtutiq; aditum patere ad Reipub. gubernacula prudentissimè homines uoluerunt. Prudenter autem rerum à Romanis gestarum, quæ innumerae sunt, egregius unde exempla sumas buccinator est T. Liuius. Quod genus est, ciuium multitudinem pro cuiusq; facultatibus in classes distributam, ut numero, copijsq; cognitis, pro re familiaris Reipub. quisq; penderet: tenuioribus, quos proletarios uocarunt, sola liberos educandi cura esset. Descriptas item Græcorum leges ad huius urbis rationem mutatas, atq; ciuium oculis expositas, ut non extra mœnia

ius quærerent, sed domi ob oculos positum discerent. Sed quid multa de hac, quæ nisi summa & propemodum diuina in ijs fuisset, quæ deum immortalem in orbem terrarum imperium adepti fuissent? Quantum autem ueteribus Romanis iustitiæ studium, in deos, hominesq; fuerit, alterum sacerdotum collegia, caerimoniæq; à Numa rege institutæ, sanctæq; per multa secula conseruatæ declarant: alterum, cum alia multa, tum Saguntinorum in ultimis terris hominum, in fide persistentium labor ærumnæq;, maxime æquum in se moderatumq; Romanorum imperium fuisse testantur. Fortitudinis autem pro innumeris, Brutum, Manlium, Fabiumq;, in exemplum adducamus: illi in magistratu cædis filiorum suorum autores spectatoresq; esse maluerunt, quàm Rempub. ab ijs uel leuiter læsam uideri: hic cum cunctando, pugnaq; abstinendo, non Romæ modò apud omnes, sed & à toto suo ipsius exercitu odium sibi conflasset maximum, maluit fortiter ferèdo sui nominis existimationem, quàm Rempub. in discrimen adduci. Iam uero temperantiam, continentiamq;, quæ gens pluris fecit? quæ luxum turpitudinemq; magis odit? ubi agricultura parsimoniaq; maximam laudem meruit: & nonnunquam Consul, princepsq; Reip. in agro appellatus, à labore ad curiam sit deductus: ubi puberes filij cum parentibus, generi cum soceris, in balneum descendere, quia res lasciua & inuerecunda putabatur, patrio more prohibebantur. Sed hæc ipsa ab adiunctis ducta prosequamur.

Primum prudentiæ factum per locos ducitur.

CAP. VIII.

Cum



**C**um igitur plurimum referat, in reliquam totam ui-  
tam recte degendam, quibus à teneris imbuamur,  
commode primū iuuentutis studia si bona intelligimus,  
laudamus augēdo ab ijs, quæ huc spectant circumstantijs:  
quarum omnium idem hic nos locus admonet, ab auto-  
ritate, doctrina, numeroq; professorum: ab autoribus:  
ipsisq; quæ docentur rebus: ab auditorum item, si lubet  
numero, alijsq; id genus circumstantijs. Atq; hic eorum  
prudentiam, quibus autoribus scholæ primum institutæ  
sint, siue princeps senatus uel fuerit, imprimis prædica-  
bimus: quæ ut eluceat, cernaturq; quasi ob oculos posita,  
à causis, euentis, comparatisq; explicanda res erit maxi-  
me. A causis: uidisse prudentissimos homines, ea esse lite-  
rarum studia, quibus, cum Rerumpub. status, tum ipsa re-  
ligio cōseruaretur: imprimisq; Reipub. interesse, iuuentu-  
tem in ijs, quàm rectissime uersari: ut hinc lecti in senato-  
res, iudicesq; illi rogati in Senatu sententiam prudenti  
oratione, instructaq; exemplis, quæ historia suppeditat,  
sue Reip. quæ declinanda sequenda uel sint edoceant:  
hi legum boniq; & æqui scientia, suum cuique adiudi-  
cent: scelera flagitiaq; animaduertenda putent. Reliqui  
autem, quibus publica non demandantur munera, co-  
gnitione rerum humanarum, atque adeo uirtutum ui-  
tiorumq; suis in rebus priuatis honeste, iusteq; uiuant:  
liberorum uitam ita instituant, ut eos in uiros abeant,  
qui si fieri potest, non modo sibi, suisq; sed & Patriæ  
olim, multisq; utiles ciues inseruiant. In communi au-  
tem positam religionem, cuius conseruandæ uniuscu-  
iusq; interest maxime, puram synceramq; uulgo per  
probos

probos doctosq; concionatores retineant : quæ recte  
 culta, cum tantum in animis hominum ualeat, ut uel si-  
 ne legibus honeste iusteq; uiuatur, leges autem sine hac,  
 paucos in officio retineant, quòd illæ, delata modo con-  
 uicta q; crimina puniant, peccandi autem sæpe & in oc-  
 culto mutoq; loco occasio detur, sancte seruandam hanc  
 esse, dubitari non debet. Hæc porro illos pro sua pru-  
 dentia uidisse neglectis literis labefactari omnia, con-  
 uulsa q; secum ruinam trahere : quod ne committeretur,  
 publicæq; & priuatim bene uiueretur, institutis scholis  
 rebus humanis optime consultum prospectumq; uoluis-  
 se. Ab euentis : Plerosque igitur omnes senatores, quod  
 literas historiasq; teneant, consilio prudentiæque Rem-  
 pub. administrare : cauere, ne quid detrimenti capiat.  
 Iudices autem scientia legum, dare operam, ne cuiquam  
 sua, aut ui, aut iuris prætextu inique eripiantur. Quæ  
 omnia, si additis personis, factisq; demonstrantur, nar-  
 renturq; mire augebitur oratio. Multitudinem autem  
 ipsam, quòd literarum beneficio magna ex parte hu-  
 manior sit facta, moderatum æquumq; imperium ferre  
 didicisse : tumultus odisse. Vniuersos autem, in id in-  
 cumbere potissimum, ut per bonos doctosq; uiros, reli-  
 gio seruetur : imprimisq;, quod iudicare melius possint  
 cauere, ne quis pro suo arbitrio affectuq; aliud, quàm  
 pium sit, concionando diuulget. Iam & uicinas gentes  
 hoc ex studio fructum cepisse maximum. Fateri enim,  
 quos huc erudiendos misissent liberos, doctissimos ac-  
 commodatissimosq; Rerumpub. rectores rediisse. Qua-  
 re studium hoc, urbisq; nomen, apud exteras gentes  
e      magnum

magnum sanctumq; haberi. Atque hic nationes urbesq; has enumerando incrementum sumet oratio. Restat comparatorum locus, ubi maiora minoribus, aut hæc illis, similia similibus, dissimilia dissimilibus, contraria contrariis conferri possunt. Hoc itaque ex loco, qui late patet, & plura membra locos uel habet, mire orationis corpus dilatari potest. Primum: si nostræ urbis studia, & inde Reipub. profecta commoda, cum aliorum gentium urbiumq; studiis conferendo, ostendamus nostræ superiora omnia, siue numero professorum discipulorumq;, siue spectata horum eruditione editisq; in lucem ingeniorum monumentis, siue denique felici beataq; administratione Reipub. à doctis uiris, religione, legibus, cæterisq; ciuilibus rebus optime constitutæ conseruataq;. Deinde à simili laus copiaq; parabitur: si cum celeberrimis omnium academijs, quæ aut sunt, aut fuerunt, nempe Græcorum nostram conferamus, doceamusq; paria nostra, aut omnia, aut pleraque. In enim semper Platones Aristotelesq; extitisse: qui uulgus philosophorum, ita multis passibus præcurrerunt, ut qui acutissimi uisus essent, quò tenderent ipsa quidem oculorum acie uix assequerentur. Tum à dissimili: illos magno docuisse: quare non tenuioribus, sed solis diuitibus aditum ad musarum antra patuisse: hic multa magnaq; constituta professoribus stipendia ex ærario publico liberaliter quotannis numerari, tenuioribus iuxta ac ditioribus musarum patere fores: illos suis conclauibus inclusos, solis sibi studuisse, parumq; aut nihil Reipub. unde abhorrebant aut opera, aut consilio utiles ext

les extitisse : nostros & ad communem utilitatem sua accommodare studia, eò cumprimis pertinere arbitran-  
tes, ut inde Reipub. fructus redeat quàm maximus. Po-  
stremo à contrarijs : illos, dum alij omnia peccata pa-  
ria uideri contenderunt, perinde esse gallum gallina-  
ceum, aut hominem interfici, alij deos nullos esse, alij  
esse quidem, sed inferiora curare minimè, plures mundos  
uideri, quæ item natura tribuisset, naturaliterq; fierent,  
in ijs pudorem nullum esse oportere, quare in publico  
cacare, nudumq; incedere honeste fieri, alij honestum  
uirtutemq; ipsam summum bonum, alij ipsam uolupta-  
tem credi uoluerunt: hæc aliaq; id genus paradoxa sub-  
inde noua, atque à communi sensu aliena diuulgando  
Rempub. conuulsisse. Nostros uero, ijs quæ natura præ-  
scribat, communisq; sensus probet, suas literas accom-  
modantes Rempub. religione legibusq; constituuisse. Illos  
metum deorum in animis hominum minuisse: nostros au-  
xisse. Illos à Republ. maxime fugisse : nostros admini-  
strandam suscepisse. Illos communem sensum damna-  
sse: nostros probasse.

Secundum prudentiæ factum ex locis  
amplificatur.

CAP. IX.

**I**isdem ex locis, & præscriptas ciuibus leges ad suæ  
urbis morem proprias, quod secundum prudentiæ fa-  
ctum fecimus, dilatemus. À causis : Magnam semper  
incommodorum uim huic ciuitati attulisse, orta contro-  
uersia, ciues foris domo procul de iure quærere : iudices  
patronosq; conciliare : atque illorum fidei litem cau-  
samq; cōmittere, quibus composita damno, tracta autem

e 2 diutius

diutius emolumento esset maximo. Quæ ne mala ciues grauarent amplius, ipsorum ad consuetudinem moresq; leges esse descriptas: semperq; omnibus legendi copiam fieri: ut iuris controuersia omnino aut nulla existat, aut si qua interim oriatur, domi, non foris interpretem quærant. Ab euentis: Incredibilem ex eo factum in animis multitudinis suum erga magistratum amorem esse generatum: Omnes uulgo ferre, fateriq; eam ordinationem in rem multorum esse maxime. Neque enim eos subinde, quibus domi res amplior est, tenuiores ciues longius domo in ius uocare, forisq; malam causam per subornatos homines tueri, trahendoq; ubi illos res defecit obtinere, quam domi iam aperire pudeat. Vereri enim uniuersorum in se odia, si scriptis, omnibusq; cognitis legibus domi in conspectu iudicum ciuiumque id defendendum suscipiant, quod parum æquum patroni clamitent, magistratus intelligat, uniuersi ciues improbent. Comparatione autem rem uarie augeas, si hoc senatus principisue factum in conscribendis legibus, cum alijs præclare prudentérque factis conferas: forte auctione ditionis, oppidiq; alicuius adiectione: ostendasq; hinc plus commodorum quotidie pluribus ciuibus, tum laudis ab ijs suo magistratui redire, quàm ex ista finium propagatione. Vectigal nanque quod inde quotannis obueniat, totum propemodum in ipsius oppidi munitiones defensionemq; expendi: hac autem legum præscriptione indies aliorum atque aliorum ciuium, in eum usque diem rem omnem in aduocatos expendentium fortunis bene consultum. Verum animaduertendum

dum maiora minoraq; hic in laude, ubi non ad fidem diriguntur, dissimilium quidem naturam induere, sed hoc interesse, dissimilia etiam ea habenda, in quibus gradus excessusq; non deprehendatur : ut si dicam alterum optimis legibus Rempub. constituisse, alterum cum exercitu foris rem felicissime administrasse. Hic in alterutro gradus excessusq; nondum apparet : quem si uerbis inesse declaro, maius hic minusq; credi oportet. A simili item copiam petas, si cum urbe aliqua celeberrima, & eodem pacto quod ad leges attinet, summa cum laude proxime firmata nostram hanc conferas : ostendasq; parem utrobique in diligenter conscribendis legibus magistratus principisue prudentiam extitisse. Quin & à dissimili, si ijs cum oppidis conferas, ubi quod proprium ius scriptum nondum habeant, foris ciues de iure quærere disceptareq; non sine magna rei familiaris iactura coguntur. Nostros, si qua de iure controuersia nascatur, aut per se introspecto expositoq; suo iure litem statim componere, aut domi suos apud iudices populumq; sententiæ auditorem, testemq; tum modicis & ferè nullis expensis, tum minime longo tempore litigare : illos à suis, quibus causa cognita est, ad externos proficisci : ijs sæpe multumq; dare : causamq; interuallo temporis iterum atque iterum, quod interim excidat non uacuis manibus aperire : hic procul domo, dum alter patriæ morem consuetudinemq;, cum scriptam nequeat, multorum adductorum hominum testimonio confirmat, alter contra impugnat, totam sæpe ætatem & rem familiarem perdere. Dissimilia hæc sunt alteros suæ ciuitatis

ius scriptum habere proprium : domiꝫ; cum breue tempus, tum paruo disceptare : alteros foris omnia temporis reiꝫ; familiaris iactura facere. A contrarijs autem hunc in modum : hos præscriptum certumꝫ; ius domi ob oculos positum habere, illos nullum : hos apud suos maxime notos disceptare, illos apud externos maxime incognitos litigare : hos copiarum suarum iacturam nullam facere, illos fortunas omnes in patronos & aduocatos profundere : hos confectam causam statim cernere, illos temporis progressu perplexiora omnia intelligere : his subitam pacem dari, illis immortale bellum seri.

Tertium & postremum prudentiæ factum.

C A P. X.

**P**ostremum prudentiæ factum fuit frumento, sale, ceterisꝫ; id genus rebus ad belli leuandæꝫ; annonæ usum necessarijs conuectis, longius Reip. in futurum esse prospectum. Quod ipsum per eosdem locos ad eundem modum quo superiora, augeri extendiꝫ; potest. Hæc de patria, quæ quanquam extra personas sit, ex huius tamen laudibus, is quem laudandum suscipimus ornari potest plurimum. Iustitiæ autem, fortitudinis, & temperantiæ facta, quæ ex locis augendi ratio sit, quia hinc satis liquet, non prosequimur.

Genus hominis ut ex locis sit extendendum.

C A P. XI.

**I**am & in externis bonis genus esse diximus : quod si clarum à maioribus accepit, ut Aeneas ab Ioue primo sui generis autore, unde illū Illioneus orator, quod apud



apud uatem est regi, Latino commendat maxime, primū copiam petas ab adiunctis, recensendo quā longo tempore, quorum splendore factisq; , & quibus in locis illustre extiterit. Atque hic spatiosus sese ad dicendum campus aperit. Deinde à comparationis loco, conferendo cum illustrissimorum hominum genere, ostendendoq; aut nobilitate par, aut illustrius clariusq; credi oportere. Reliquis ex locis hæc res minus commode dilatetur. Neque enim ex omnibus ad omnem rem, copiam petas. Quod si uero aut temporis tractu fortunæq; casibus obscuratum in lucem reuocauit, aut humile sua solius uirtute factisq; nobilitauit, quemadmodum nemo laudandum negat, ita cum non extra eum, quem laudamus, sed ex ipso profecta laus sit, non hic, sed suo loco dicenda amplificandaq; erit. Infame autem genus nemo est tam nullius iudicij, qui prætermittendum dubitet.

Parentum laus per locos ducitur.

C A P.

X I I.

**S**Equuntur parentes, consanguinei, cognatiq; , quorū item laus licet extra filios nepotes uel sit, laudati tamen & ijs quasi lumen adferunt: maxime parentes, qui genuisse, educasse, uitamq; suorum à pueris ad optima quæque instituisse putantur. Quare cum prædicandis filiis coniunctissimi sint, atque hinc ducta laus plurimum ponderis adferat, horum laudandorum quæ iisdem ex locis superioribus ratio sit, subinde prosequamur: unde & sciri poterit, quid in consanguineis cognatisq; extolendis commode fieri poterit. Cum igitur de patria & genere dixerimus, quæ parentibus cum filiis communia  
e 4 sunt,

sunt, ea in parentibus bona, quæ ipsorum propria maximaq; sunt, nempe animi laudanda augendaque uidentur. Atque hæc duplicia sunt, alia cognitionis, alia actionis: illorum genus prudentia, scientiaq;: horum iustitia, fortitudo, temperantiaq; dicetur: illa posita in rerum humanarum diuinarumque cognitione: hæc in actione & iuste, fortiter, temperanterq; factis. Vt in Iulio Cæsare præter iustitiæ, fortitudinis, temperantiæq; plurima facta, & scientiæ, utriusque uidelicet linguæ, artis oratoriæ, astronomiæ, aliarumq; pulcherrimarum artium exactam cognitionem recte suis laudibus extollas. Quapropter, si & in parentum encomio sua in uirtutum genera spargere quæque placet, non secus ac supra uisum est ex locis singula amplificanda erunt. Verum temporum hic ordinem sequi forte commodius erit: nec leuiuscula, sed grauißima quæque facta omnium iudicio probata laudibus ferre atque dilatare. Quod dum fit, & liberos suos ingenue educaße, liberaliterq; ad optima quæque studia aluisse, negligi non debet: quod ipsum si & per plures locos ducas, plurimum extendetur oratio. Erunt autem singula facta primum ex adiutorum loco extendenda: quo tempore, quo in loco, qua ætate, multorum auxilio an paucorum, ab ipso solo an per subornatos homines gesta res sit. A loco & tempore Cicero Pompeium Quiritibus commendat maxime: illum in pyratas, à quibus omnia maria, omnes nationes diu iam multumq; uexabantur, extrema hyeme bellum apparasse: ineunte uere, aditis præsidijsq; firmatis maritimis prouincijs suscepisse: media æstate totum

consec

confecisse. Deinde à testimonijs, quæ cur ab adiunctis non seiungamus, supra diximus, rem extendas, si hominibus factum, à multis, aut paucis, doctis, aut rudibus, principibus, amplisq; hominibus, aut plebeis priuatisq; approbatum ostendas. Tum à causis, quo consilio fecerit, publicam gloriam utilitatemq;, an priuatam, suam ipsius, an amicorum spectarit. Hinc cum poëtæ historiciq;, tum rhetores ipsi, non ad probandum modò, sed et delectandum augendumq; sæpe copiam petunt. Cicero cum alibi passim, tum pro Archia poëtæ à causis, non sine summa ipsius uatis studiorumq; humanitatis laude corpus orationis plurimum ampliavit. Quæres inquit, à nobis Gracche, cur tantopere hoc homine delectemur? quia suppeditat nobis, ubi et animus ex hoc forensi strepitu reficiatur: et aures conuitio defessæ conquiescant: et quæ sequuntur plurima. Excursus nanque longior est, qui à causarum sumptus loco, atque adeo ab adiunctis quæ in illas conuertuntur, corpus orationis mire uestit. Neque hic mirabitur quisquam excursus ex locis sumi, cum dixerimus, certumq; sit omnia inde duci, atque adeo ipsas figuras, quod suo docebitur loco. Summa autem digressionis, quæ à causis ducitur hæc est. Propterea se uate delectari, quòd ex ijs quæ suppeditat, literisq; quas tenet, non modò se honeste oblectet, sed et suam orationem dicendiq; facultatem augeat: tum præceptis exemplisq; uirtutum, quæ à summis autoribus utriusque linguæ literis sunt mandata, ijsdemq; conscruantur, animum suum iam inde ab adolescentia imbuerit, et ad laudem honestatemq;

sequendam præ cæteris rebus omnibus, imprimis conformarit. Vnde factum, ut neglecta sua uita, pro Repub. maximas in dimicationes, & quotidianos profligatorum hominum impetus sese obiecerit. Qui tantus fructus, si non ex studijs rediret, solaq; inde delectatio caperetur, tamen cum præ cæteris rebus omnibus, quæ delectationem adferant, sola literaria omnium sit temporum, ætatum, atque locorum, humanissimam liberalissimamq; hanc animaduersionem iudicari oportere. Iam uero ita instructum Archiam esse literis, ut uel ex tempore magnum numerum optimorum uersuum faciat: Cimbricasq; res adolescentem scribendas suscepisse: charumq; Mario Imperatori fuisse. Mithridaticum autem bellum, non sine summa Populi Rom. laude totum conscripsisse. Atque hic errare uehementer, qui Latinas Græcis literis anteferant: quod hæ ubiq; gentium, illæ exiguis contentæ finibus legantur. Postremo, illum res & à se in consulatu suo pro urbis salute gestas, uersibus attigisse, atque inchoasse. Hæc sunt ferè totius excursus firmamenta causæq;, cur uati bene uelit: iudicibusq; quid facere debeant præscribat: quas ut grauissimæ uideantur, & ex comparatorum loco, dum sumptis inde pugnat exemplis, copiosissime instruit. Tum subinde ab euentis factum hominis adaugeas, si quantam inde gloriam utilitatemq; Respub. aut ipse, amiciue sint consequuti oratione persequaris: quantoq; in honore deinde uixerit: aliaq; id genus multa, quæ pro causarum personarumq; uarietate alia atque alia erunt. Restat comparationis locus,

ad

ad amplificandum accommodatissimus : ubi nostri hominis, cum aliorum præclare factis conferendo, ostendas nostra, aut maiora, aut similia esse ducenda. Quæ in parentibus laudandi amplificandiq; ratio est, quam paucis perstrinximus, eadem in consanguineis cognatisq; putanda.

Laus hominis à fortunis per locos ducitur.

C A P.

X I I I.

**D**E fortunis quæ & externa bona sunt, subinde nobis est dicendum. Hæ autem quantæ sint, quot numero prædia, quo sita in loco, quo tempore siue dono data, siue suorum testamento legata, parentibusve relicta acceperit, emeritve, ex adiunctorum loco narrantur locupletandumq; erit. Deinde ex descriptionis loco, situm prædiorum, atque hortorum, ad flumina seu fontes, & factas hic ad uoluptatem structuras pluribus licet uerbis depingas : quemadmodum Homerus Alcinoi hortum : & maxime, si is, quem laudas princeps sit, urbesq; in quas imperium habet describas. Quin & huius fortunas cum aliorum facultatibus conferendo, ex comparatorum loco mire locupletabitur oratio : ostendendoq; aut genere, numero, fertilitateq;, maiores amplioresq; putandas, aut situ ad flumina, seu fontes, rebusq; manu factis, atq; ad uoluptatem structuris iucundiores amoenioresq;. Quod si uero eorum, quibuscum nostras conferimus, omnium iudicio amplissimas esse copias constiterit, pares ostendisse contenti esse possumus. Spectandum etiam, atque cum materia deliberandum, ecqua & à dissimili contrarijsq; copia peti possit. A dissimili  
hoc

hoc pacto : nostro prædia esse agrosq; suburbanos, unde certus ferè quotannis fructus redeat : illis non modò longius domo, sed & aliena in ditione sitos : ijsq; expositos fluminibus, quæ sæpius inundando sata omnia obruant atque conuellant. A contrarijs : nostro flumina fontesq; irrigando agros utilitatem adferre maximã, illis in sata erumpendo eademq; conuellendo incommodum adducere summum : huic aquarum cursum prodesse, illis eundem ipsum obesse : huic uoluptatem adferre, illis mœrorem tristitiamq; dare : huic uel exorto bello omnem ex agris fructum redire, illis nullum : huius prædia urbis horreum alimentumq; in hostes esse, illorum contra hostium in urbem : his patriam defendi, illis oppugnari : Quod si uero principem laudandum suscipias, potentiamq; eius, gentis suæ, urbiumq; genere & numero prædices, quo res maior illustriorq; fuerit, hoc magis his ex locis extendas.

Quæ corporis bona in homine ex locis amplificandi ratio sit. CAP. XIII.

**H**Actenus de externis bonis eius, quem laudamus : quæ quidem pro personarum uarietate, alia atque alia existunt : quæ persequi, cum infinitum, tum minus fructuosum foret. Quare ad fontes ipsos ducere consilium fuit : usumq; locorum in ijs, quæ omnibus communia sunt, laudemq; merentur monstrare : ut horum usu cognito, pro causæ conditione, quantam quisq; uelit moram ubiq; facere in augendo posset. Corporis autem bona esse diximus, staturam figuramq; corporis : ualitudinem roburq; : ipsam deniq; formam. Hæc quāquam leuiora

leuiora sunt, suam tamen laudem merentur: certaꝫ; in-  
 terim animorum indicia esse solent: unde Homerus, cum  
 in Thersite garrulitatem, animiꝫ; uitium nobis depingi  
 uellet, nescio quo modo non tam male facta, quàm cor-  
 poris deformitatem uitiaꝫ; explicando, uitiosissimum  
 ipsum introduxerit. Idem staturam grandiore, ro-  
 burꝫ; in principibus magnopere prædicat: ut qui Aga-  
 mennoni staturam magnam, cui maiestas inesset regia,  
 tribuit: Vlysssem, illo quidem minorem, sed latissimis  
 humeris & pectore describit. Iam uero Aiace illum,  
 non ambobus modò his, sed cæteris Achiuis omnibus  
 corporis statura & robore antecellentem introduxit.  
 Nec noster hanc in suis laudem neglexit: qui cum &  
 in cæteris, tum maxime in Aenea & Turno principi-  
 bus corporis bona laudat. Et Dareta cum alta statura,  
 latissimisꝫ; humeris, quod certum uirium argumen-  
 tum esse solet, in singulare certamen produxisset, eius  
 tamen antagonistam Entellum, uel senem, magnitudine  
 corporis uiribusꝫ; adeo superiorem facit, ut illum, non  
 secus ac qui frustra urbem, aut castellum oppugnet,  
 hunc temere infelicitersꝫ; aggressum dicat. Forma plus  
 laudis meretur: præsertim in Principibus uiris, grauitas  
 oris, maiestasꝫ; in uultu: hæc imprimis pondus oratio-  
 ni, auctoritatemꝫ; tribuit: tantumꝫ; in animis Gallo-  
 rum hostium ualuisse T. Liuius scriptum reliquit, ut  
 cum urbe capta auidi prædæ in principum atria irrue-  
 rent, cerneretꝫ; hos cum ornatu habituꝫ; paulo huma-  
 no augustiore, tum maxime oris grauitate atq; maiesta-  
 te dijs similimos domi sedentes, ante horum ora, sicuti  
 Deorum



Deorum simulacra uelut uenerabundi constiterint : nihilq; in hos ferro grauius facturi fuerint, nisi M. Papius principum unus prior iram mouisset. Atqui & hinc augendi modum, usumq; locorum explicemus. Staturam, robur corporis, orisq; decus quantum sit ubi ab adiunctis satis exprefferimus, à causis & euentis deinde dilatemus. Fuisse huius maiores, homines cum insigni statura & robore, tum quadam modestia orisq; grauitate præditos : semperq; operam dedisse hunc, ut quæ à natura ad sui nominis dignitatem amplitudinemq; acceperit, certa uiuendi ratione aleret, prouheretq; : nulla ut Venus, Bacchusq; immoderatio, corporis uires uigoremq; auferret. Quare ea iam ualetudine esse, ut nulla corporis imbecillitas obsit, quo minus in rebus cum grauitate agendis, suo, amicorum, & Reipub. temporari seruiat. Quinetiam comparatione rem extendas, si cum alijs amplissimis hominibus conseras : ostendasq; in hoc nostro, aut similitudinem, aut excessum esse, aut etiã dissimilitudinem : si aut proceritate, ipsoq; robore, & ualctudine, aut ipsius uultus grauitate maiestateq; multis partibus sit superior.

Quæ ratio animi bona ex locis amplificandi.

C A P.

X V.

**R**estant animi bona, quæ ut cuiusq; propria sunt, ita præ cæteris laudem mereri suo iure maximam solent. Hæc laudandi duplex uia est : aut enim ad sua uirtutum genera, ut supra uisum est, quæque referuntur : sua prudentiæ, iustitiæ, fortitudini, & temperantiæ tribuendo facta : aut quod non minus comode fiat, temporum

temporum seruabitur ordo. Itaque dicendum, quæ pueritiam adolescentiamque transegerit : quæ sequutus studia : quantumque in ijs, et quam breui sit assequutus. Atque hic, si forte insigne ingenij specimen, indolisque paud uulgaris bonitas eluxerit, pluribus erit uerbis excellendum : quo uidelicet tempore, quo in loco, apud quos, qua in re, alijsque id genus additis circumstantijs, quas adiunctorum locus suppeditat. Quod si forte operæpretium uideatur, et hæc ipsa per plures ducendo locos, plurimum extendas. Aetate autem iam magis inualescente, si qua scripta honesti sui studij, uoluntatisque testimonia in lucem edidit, primum qualia quantaque ipsa sint narrandum, quantusque inde ad plures fructus redeat. Quæ item seu doctorum, seu multitudinis, seu uersorum de ijs testimonia iudiciaque existant. Quæ ubi ex adiunctorum testimoniorumque loco, quem eundem esse diximus, prosequutus fueris, à causis subinde augebis : quod à multis, magnique nominis hominibus, siue rogatus, siue ultro iuuandi studio ad scribendum se contulerit. Ab euentis : non modò hominum de se expectationi respondisse, sed et uicisse : nec in una atque altera, sed in pluribus nationibus ipsius scripta legi, laudarique. Atque hic et enarrandum, quorum expectatione maiora emiserit : quibusque in prouincijs plurimum probentur. Iam uero et huius cum probatis magnorum autorum scriptis conferas : ostendâsque potiora multo, melioraque hominum consecuta esse iudicia : aut maximis summorum autorum monumentis, paria esse atque iudicari. A dissimili etiam amplifices

plifices : si in ijs , quibuscum confers scriptis dissimilitudinem esse ostendas : ut si Hippocratis & Galeni medicorum opera , cum Pauli & Pomponij iureconsultorum scriptis conferas : illos rerum naturalium , hos ciuiliū scientiam tradidisse : illos de uita , hos de fortunā sollicitis bene consuluisse : illos præcepta dedisse ne morbus uincat , & æger moriatur , hos ne auarus triumphet , & suum alteri eripiat : denique illos cauisse ne ipsa præmature uita , hos ne sua cuique res iniuste auferatur. Hinc mire Cicero , non sine delectatione corporis orationis auxit , dissimilitudinem studiorum Murææ & Sulpitij pluribus uerbis explicando. Hunc in modum singula quidem , tam domestica , quàm publica facta , quæ laudanda uidebuntur , seruato temporis ordine , enarranda amplificandaq; erunt : quæ ratione domi uixerit , liberosq; educarit : ad quæ studia miserit , liberatiterq; aluerit : quos in uiros aut abierint , aut se euasuros certam de se spem patri patriæq; præbuerint. Quæ si persequaris omnia , ducasq; per locos , incrementum res ipsa sumet maximum. Iam & quid commodi ipse , siue re operaq; , siue consilio Reipub. præstiterit. Quale est , si dum aliquando , ut sæpe , maximis de rebus bene Reipub. consulendum fuit , inopsq; consilij multitudo ea facili momento sequenda putasset , quæ probata , Reipub. statum euersura penitus fuissent , hunc in concionem prodijisse dicas : & prudenti oratione , quæ ex his aut illis inceptis cōmoda , mala uē Reipub. impendeant , edocuisset : eaq; suscipienda persuasisset , quæ cum singulis tranquillitatem , utilitatemq; , tum uniuersis no-

men

men gloriamq; attulerunt. Atque hæc aperienda, pluribusq; uerbis ex locis alijs atq; alijs explicanda erunt: quæ res ad ita consulendum animum potissimum impulerit: quæ si honesta, utilisq; fuit, euenta uotis respondisse pulchrum erit. Quanta autem gloria emolumenta; inde Reipub. euenerint, quis item ad consultorem fructus honosq; ab uniuersis uicissim redierit, copiose erit exponendum. Postremo comparationibus rem extendas: cum urbis conditoribus, aut munitoribus huius factum conferendo: & aut maius, aut simile, distimileque ostendendo. Illos urbem quidem condidisse, hunc conditam prudentia sua ab exitio conseruasse: illos partim fundamenta iecisse, partim moenia turresq; in hostes propugnacula, non sine summis oppidanorum impensis laboribusq; altius eduxisse, hunc unum ipsa modò ratione consilioq;, non moenia solum, urbemq;, sed & fortunas omnium uitamq; seruasse. Quantum etiam ciues grati uicissim postea huic honorem, gratiamq; habuerint, cum ijs conseras licet, quibus ob præclarissima in Rempub. merita, non ingrati extiterunt: doceasq;, aut maiora, aut paria huic contigisse omnia. Quod si uero is quem laudas Princeps sit, exercitumq; duxit, præterquam quòd ex his locis omnibus, ab adiunctis quæ late patent, passimq; usui sunt, à testimonijs, à causis, ab euentis, ex comparatione maiorum, minorum, à simili, à dissimili, à contrarijs copiam petas, etiam à descriptionis loco amplifies maxime: cum aut stratagemata genusq; militum, et armorum, aut urbes quas cepit, regionesq;, et gentes, mores, aliq;

f id genus

id genus suo. quæq; loco describas. Porro cum temporis hic seruandus sit ordo, danda est opera, ut leuiores, aut omittamus, aut paucis perstringamus. Quæ uero magna sunt, & prudenter, iuste, fortiter, modesteq; facta, laudem in animis hominum maximam merentur, per plures ducenda locos, plurimumque dilatanda erunt. Quæ autem laudari facta oporteat, horumq; numerum, personæ quas, laudandas suscipis, secum adferent; in quibus singulis augendis, cognitis his locis, quantam ipse uoles, moram trahas.

Vt ea ex locis augenda, quæ post mortem acciderunt.

CAP. XVI.

**C**um igitur hunc in modum quæ toto uitæ cursu recte fecit, uerbis extuleris, dilatauerisq; non neglegendum modo excessit è uiuis, & quæ uita iam defuncto uirtutis ergò magna acciderunt. Nam cum magnis uiris dum uita manet, laudemq; sequentibus comes sit inuidia, fit, ut morte iam sublatis, ereptisq; quos nocitura sequitur, sese auertat: patiaturque mortuis, quem uiuis noluit, suum honorem deferri. Quare si & huic uita defuncto, aut tumba publice magnificentius sit extructa, aut statua erecta, aut deniq; quotannis ad sempiternam huius memoriam, rerumq; ab ipso gestarum aliquid statis diebus fiat, quanta hæc sint, quo tempore fiant, quo in loco, à quibus, quantis impensis, quanto studio, alijsq; id genus explicatis circumstantijs, quarum adiunctorum locus nos admonet, copiose erit exponendum. A causis item & hæc si uoles amplifices: quæ ipsius in Rempub. merita constent: cur tantum,

tantum, uel emortuo honorem constituerint. Ab euen-  
tis hic nihil sumas, cum explicata ex adiunctorum loco,  
causas suas præcesserint: nisi propterea hæc defuncto  
contigisse dicas, ut statuto præclare factis summo hono-  
re, plures ad imitandum pellicerentur: exponasq; ea  
ita ex sententia euenisse: pluresq; honoris præmio in-  
citatos, ipsam uirtutem sequendo, nominis immortaliz-  
tatem uenari. Quinetiam ex comparationis loco locu-  
pletari res potest maxime: si uirtutis præmia, monu-  
menta; huic post mortem constituta, cum regum pa-  
rentationibus, funebribusq; honoribus conferas: atque  
ostendas, studio hominum ultrò hæc præstantium illos  
superasse: rerum autem magnificentia æquasse. A dissimili  
item: illis à regijs, regiaq; pecunia funebria magni-  
ficentius adornata, huic ab uniuerso populo, ære; pu-  
blico splendide instructa: illis, quia reges uixerunt, mor-  
tuisq; sunt, huic quod patriæ conseruator extitit, mor-  
tuusq; sit, habitus est honos: illis ne regium nomen leue  
in animis uulgi putaretur, huic ne sua uirtuti præmia  
deesse uiderentur. A contrarijs: illos subditi maxime  
oderunt, hunc sui summo honore prosequuti sunt: il-  
los noua constituendo uectigalia, annonam, uictumq;  
communem aggrauasse agnoscunt, hunc uirtute, pru-  
dentiq; consilio plurimum leuasse intelligunt: illos ui-  
uos, tyrannos execrati sunt, hunc patriæ patrem con-  
seruatoremq; appellantes, amplexi sunt: illos post mor-  
tem, uel ab alijs honorari ægre ferentes, quantum in sua  
positum potestate impediuerunt, hunc contrà uniuers-  
si æquali studio, summis honoribus ultrò affecerunt.

Quæ ratio sit personas laudandi, ab externis, corporis, animiq; bonis, atque adeo ab ijs, quæ has tempore antecedunt, simul iuncta, & post insecuta sunt ostendimus. Antecedunt autem homines tempore, patria, parentes, cum ijs coniuncta sunt, fortuna, corporis, animiq; bona omnia: post autem insecuta sunt, habitus post mortem honores, præclaraq; de ijs hominum iudicia. Quæ autem uia singula ex locis copiose insiru augeriq; possint, utcunque aperuimus: non quidem eo consilio, quod tantam copiam, quanquam paucis rem perstrinximus, in cuiusvis hominis laudem, (quis enim finis?) temere adducendam putemus: sed ut monstrato locorum usu, pro causæ conditione quantam quisq; inde uelit, copiam peteret. Neq; enim hic cuiquam quid fieri debeat præscribimus, sed quid possit.

Eadem quæ laudandi & uituperandi hominis ratio.

CAP. XVII.

**P**orro uituperandi quæ ratio sit, hinc facile intelligi potest. Siquidem idem ordo eademq; per omnia uia in uituperandis externis, corporis, animiq; malis erit sequenda. Patriam igitur, parentesq; bonos habuisse, atque inde degenerasse, patrimoniumq; dilapidasse, ut Catilina, tam uitium dedecusq; est, quam cui hæc mala obtigerunt. In corpore autem, si qua sit deformitas, ut in Thersite, suis erit uerbis exaggeranda: si nulla, forma uiribusq; male usum fuisse, odio dedecoriq; erit magno. Animo autem profecta uitia, flagitiaq; seruato temporis ordine, nisi in sua uitiorum genera spargere quæq; maus, perpetua oratione, quod in L. Pisone facit



facit Cicero, erunt explicanda, atq; exaggeranda. Quod si forte & iam uita defunctis aliquid accidit, quo turpitudinem odiumq; augeatur, non erit silentio prætermittendum. Singula autem eadem ratione, quæ superiora, ex locis augenda amplificandaq; erunt.

Quæ urbes ex locis copiose laudandi ratio.

C A P. X V I I I.

**V**Rbium laus quæ sit supra attigimus: sed cum latius pateat, quam in personarum laude indicare operæpretium esset, quæ has laudandi atque ex locis augendi ratio sit, seorsum hic breuiter aperiamus: laudantur non secus atque homines. Quare & huc adiutorum locus erit admouendus: quo admonemur, primum ea spectanda, quæ tempore præsentem urbis celebritatem antecesserunt: ut conditor, ciuesq; qui administrarunt, inhabitaueruntq;: deinde quæ ipsi sunt tempore coniuncta, ut ager, flumina, montes, mare, portus, mœnia, fœuæ, tecta & ciues, qui inhabitant: postremo quæ infecuta infortunia, quibus commemorandis commiserationem mouemus, ipsis que euersoribus odium conflagamus. Ut si quis Athenas, aut Romam, ut quondam fuit, laudet, dicatque, quibus artibus iam inde à primis iactis à Romulo fundamentis eò incrementum acceperit, ut non modo Italiæ urbium celeberrima, sed totius terrarum orbis caput lumenq; extaret: & quorum deinde uitio, inertiaq; concidere, retroq; labi cœperit. Sed cum ferè laudem sibi hæ potissimum uēdicent, quarum celebritas dignitasq; in omnium posita oculis elucet maxime, quæ has ab ijs quæ tempore

pore antecedunt, simulq; iuncta sunt prædicandi uia sit, indicabimus.

Vrbis laus à conditore, per locos ducitur.

C A P. . X I X .

**C**onditorem igitur commode primum ex descriptionis loco, atq; adeo ab adiunctis describemus: unde cognosci potest, quæ ipsius potentia, & præsertim quæ animi uirtutes, prudentia, iustitia, fortitudo, temperantiâq; fuerit. Deinde à causis erit augendum: cur eo in loco urbem locarit: quæ si maritima fertilisq; in agro posita sit, eo nimirum consilio fecisse dicendum, ut hinc mari, hinc agro magna uis hominum alius sustentariq; posset. Tum euenta erunt explicanda: quanta iam inde à condita urbe hominum multitudo uictum hic, quomodo, & quàm facile quærat. Postremo conferendo hanc cum aliarum urbium agro, situq;, mire rem extendas: ostendendoq; huius agrum, aut fertiliorem, aut certe parem esse, nullaq; in re deteriore. Dissimilitudinem autem ex situ forte colligas: hanc maritimam, illas esse campestres: huc cum terra magna, tum nauibus maxima onera aduehi: illuc plaustreis modò res asportari. Iam & actus in primo illo urbis conditore spectandos esse, adiunctorum idem nos locus admonet. Quòd si igitur legibus & religione Rempub. nouam primus bene constituit, à causis extendenda res erit: eo nimirum consilio fecisse, ut iuste, pieq; uiueretur: & quos lex non posset, religio in officio retineret. Deinde euenta explicanda erunt: qui mores, ex eo usque tempore iuste, modeste, pieq; uiuentium, tum  
uniuer

uniuersorum, tum singulorum extiterint. Quæ omnia si ut gesta sunt copiose exponas, incrementa sumet oratio, maiora quidem, si quæq; & ex comparatorum loco dilates. Præter hæc, si quid recte instituit, considerandum: ut si idem simul cum urbis primordijs literarum belliq; studia erexit: illis ut animi diuinarum humanarumq; rerum cognitione imbuerentur, his ut suas suorumq; fortunas tuerentur. Consilia ubi exposueris, euenta inde ab urbe condita enarranda erunt: quot quantosque uiros undecunque doctissimos, & quemque tempore tulerit: quæ cuiusque eruditionis testimonia scripta extent. Atque hæc subinde comparando dilatabuntur maxime. Hunc in modum & quæ interim belli studia, & fortia facta extiterint, prosequendum erit: quæ nunc uniuersorum, nunc singulorum militiæ fortitudo, uirtusq;, & quo tempore, quo in loco cognita perspectaq; sit. Atque hic non solum ex comparationis loco, si uoles, quæque uarie extendas, sed & personas describas: consiliaq; faciendi aperias. Breuiter quæ ratio urbes laudandi ab ijs, quæ tempore præcesserunt, usumq; hic locorum ostendimus. Verum, si ut sæpe de conditore, bonisq; eius institutis nihil certi in medium adferre poterimus, solumq; in confesso sit urbem uetustam esse, semperq; ferè incrementum sumpsisse, nihilominus quorum id administratione uirtuteq; contigerit, narrandum erit: quæ nunc singulorum, nunc uniuersorum prudenter, iuste, pie, fortiter, temperanterq; facta extiterint, quo Respub. nomen uiresq; accepit. Atque hic singula cuiusq; facta, ex adiuncto=

rum loco copiose, omnibus expositis circumstantijs enarrari, personæq; describi possunt. Tum quæ causæ iam uniuersos, iam singulos ad faciendum impulerint dicendum. Variè autem per comparationem unumquodque amplifies, dum aut excessum, aut similitudinem, aut dissimilitudinem, aut denique rerum pugnantiam, contrarietatemq; ostendis.

Vrbis laus ab ijs quæ huic simul tempore coniuncta sunt, & primum ab aëris tēperie

per locos ducitur.

C A P. XX.

**R**Estant ea persequenda, quæ urbi quam laudamus, simul tempore sunt coniuncta. Hic primum spectandum, quo in climate, cœliq; parte sit posita, unde aëris temperies cognosci potest. Neq; enim parum refert, languidioribus, an feruentioribus, seu temperatis solis radijs sit subiecta: ut sunt ferè omnes hæ, quæ inter Cancrī Vrsæq; circulos sunt posita. Deinde dicendum erit de agris, qui adiacent: de fluminibus, stagnis, piscinis, montibus, ipsoq; mari, si aut uicinum est, aut urbem alluit. In ijs autem omnibus ea, quæ fructuosa amœnaq; sunt laudibus uehenda esse idem qui omnium, adiunctorum nos locus admonet. Siquidem agros fertiles, fluuios piscosos, nauigabilesq; montes uitibus consitos, tum mare nauibus frequentatum, hoc ipso quòd fructus uoluptatesq; maximas adferant, & urbis nomen dignitatemq; imprimis conseruare dubium non est. Spectari item potest, in ora'ne an mediterraneo prouinciæ sit posita: quod genus circumstantias copiose Græci, ut quos uerba non deficiunt, persequuntur: præsertim

Menander

Menāder rhetor, qui de laude seorsum scripta reliquit. Verum dum hic in laudando ex loci positione circumstantias, quod infinitum est, studiose prosequitur, eorum quæ omitti minime debuissent, quæ uidelicet publicæ munitiones, interiorq; ciuium structura esset, ne meminit quidem. Atqui nos ad locos, atque adeo ipsos ad fontes laudaturum ducimus: unde quantum pro suo quisq; arbitrio uolet, hauriat. Nam cum urbium ad laudem pertinentes circumstantias explicare infinitum sit, quod unicuique serè, præter diuersa hominum studia, rationemq; quærendi uictus sua quædam propria à natura sint attributa, alijs nempe aurisodinae, alijs thermæ, alijsq; alia id genus innumera, cognito adiunctorum loco, in hoc instructus sit, ut sciat, quæcunque præterita præsentiaq; splendorem urbi, commodum'ue, seu proprium, seu cum cæteris commune adferant, laudari oportere: quæ per reliquos deinde ducta locos, augeantur plurimum. Postremo igitur de publicis munitionibus, interioriq; ciuium structura, & ipsis ciuibus erit dicendum. Hæc igitur ab adiunctis ministrata, copiose erunt singula omnibus enarratis circumstantijs explicanda: & per reliquos subinde locos ducenda, amplificandaq;. Itaque si in bono climate sita sit ciuitas, primum aëris temperies, coeliq; clementia, & temperata sub ipsa solstitia dierum noctiumq; longitudo, pluribus erit describenda. Deinde à causis hæc erunt locupletanda. Non enim aut solis ignibus, aut septentrionalibus frigoribus nimis esse subiectam: sed in medio positam, hinc frigora, hinc æstum fugisse: unde & illud die-

rum noctiumq; suo tempore nec maius, nec minus iusto incrementum: quorum alterum sub Arcto, alterum sub solis cursu positum accidit. Ab euentis: quare homines nulla aëris intemperie impediri, quo minus toto anno uictum domi et foris quærant: omniaq; in agris felicius proueniant. Accedit eò, & ipsa ingenia, cæli beneficio præsentiora, perspicacioraq; reddi. Et hæc quidem omnia multis explicari possunt. Postremo & ex comparatione petenda copia est: ut si hic auram salubriorem hominibus, maturescendisq; frugibus accommodatiorem declares, quàm eius, quacum confers urbe. A simili autem extendas, si cum ea urbe confiras, cuius positum pluribus notum, maximeq; probatum uides. Hunc in modum si uoles, & dissimilitudinem repugnantiamq; collatione aperias. Quòd autem hac uia, ordineq; ex locis amplificandi commode utamur, tamen cum & aliter recte fiat, nemo sibi hic legem præscribi putabit. Nam postquam ex adiunctorum loco, qui omni rei de qua agitur adiunctus est maxime, quæ uoles ob oculos posueris, deinde ex comparatione copiam sumas: & si magis augere uoles, subinde à causis augeas licet. Verum id aliter atque aliter fieri posse, in uniuersum sit dictum uolo: adeo, ut sepe dum uno in loco longiorem moram trahimus, plures interim alij ex suo aliquid, uel antequam inde digredimur communicent.

Laus urbis ab agris, fluminibus, publicis item munitionibus, relictis, ipsisq; ciuibus, per locos  
ducitur

CAP. XXI.

Hæc

**H**Aec de aëris temperie: de agris subinde dicen-  
 dum: de fluminibus, stagnis, montibus, piscinis,  
 & ipso denique mari, aut uicino, aut urbem alluente:  
 quantaq; ex singulis utilitas uoluptasq; capiatur, ab ad-  
 iunctis copiose erit exponendum: nunc ea ipsa describen-  
 do, nunc aut classicorum autorum, si fieri potest, aut ui-  
 cinarum gentium testimonijs confirmando. Atque hac  
 uia res quidem ipsa mire augeatur. Quod si uero ma-  
 gis hæc extendi uoles, singula celeberrimis urbibus com-  
 parando, ostendes hanc, siue agri ubertate, siue flu-  
 minum copia uoluptateq;, siue denique ipso maris  
 usu alijs longe superiorem, alijs certe per omnia pa-  
 rem esse iudicandam. Iam & de publicis urbis muni-  
 tionibus, testisq; dicendum: quantaq; sit fouearum,  
 aggerum, murorumq; altitudo, latitudoq; erit descri-  
 bendum: quis portarum, turrium propugnaculorumq;  
 numerus: quæ magnitudo firmitasq;: quot bellicis ma-  
 chinis rebusq; ad arcendam uim accommodatis, sint  
 omnia referta. Hæc ubi pluribus exposita uerbis, de-  
 scriptaq; fuerint, à causis est augendum: cur foueas,  
 moenia, aggeresq;, ita duci poniq; placuerit: quo con-  
 silio hac distantia, hoc in loco, turres propugnacu-  
 laq; locarint: cur tantis sumptibus, tot tantisq; labo-  
 ribus eò omnia euexerint, nempe ut quàm minimâ  
 manu hostiles incursiones, impetusq; sustinendo pro-  
 pulsandoq;, uitam fortunasq; suas defensarent. At-  
 que hic subinde euenta narrabuntur: quorum hostium  
 impetum, oppugnationesq;, quo, & quanto tempo-  
 re fortiter sustinuerint: furorem fregerint: discedere  
 demum



demum cū ignominia pauci plurimos coëgerint. Quin  
 & postremo comparatione omnia maiora amplioraq;  
 reddas, maximis munitissimisq; urbibus hanc, aut muni-  
 tione per omnia parem docendo, aut multis etiam parti-  
 bus superiorem. Atque hæc & a uicinarum gentium te-  
 stimonijs, præclarisq; regum, atq; magnorum hominum  
 iudicijs dilatari possunt. Tecta autem ciuium frequen-  
 tiora, magnificeq; extructa, tum plateas, foraq; ad homi-  
 num usum latiora, diuorumq; templa augustiora esse,  
 quod non parua laus sit: ut quæq; maxime excellunt,  
 ita pluribus erunt uerbis ornanda, hominumq; de ijs te-  
 stimonia iudiciaq; adferenda: tum cum uicinis pūlcher-  
 rimisq; ciuitatibus conferenda, quo ipso, aut parem, aut  
 longe maiorem huius celebritatem magnificentiamq;  
 edoceas. Quod si lubet, & hæc ipsa ex alijs locis licet  
 extendas. Restat de ciuibz esse dicendum: horum iam ui-  
 uentium, cum de uita defunctis dixerimus, quæ studia,  
 qui mores, quæ præclare facta existant spectandū. Com-  
 mode autem quæq; in sua uirtutum genera spargas: &  
 sua prudentiæ, sua iustitiæ, quæ erga deos religio, erga  
 parentes pietas dicitur, sua item fortitudini, temperan-  
 tiæq; assignes. Caterum cum supra in patriæ laudibus  
 laudandi hæc amplificandiq; rationem ostenderitimus,  
 quæ insistenda hic uia sit, inde peti potest. Hæc de ur-  
 bium laudibus, unde quæ uituperari oporteat, res nem-  
 pe contrarias, facile colligi potest.

Quæ facta ex locis copiose laudandi

sit ratio,

C A P. XXII.

Facta

FACTA ornandi, & amplificandi quæ ratio sit, subinde intueamur: in quibus laudandis uituperandisq; cum & rhetores, tum maxime historici heroiciq; uates uersantur. Tēporis autem seruato ordine laudari oportere ipsa nobis præscribit ratio: poëtis tamen id, quod suo loco dicetur, de industria mutantibus. Præcipui autem hic loci sunt, causæ & euenta: quanquam alij omnes, qui supra, & huc adhiberi possint: expositisq; primum causis, deinde quæ euenerint explicentur. Quare Vergilius postquam paucis proponendo, multisq; inuocando, hominum animos sibi beneuolos attentosq; reddidit, causas statim commemorat, cur Aeneam Iuno insignem pietate uirum, tot labores periculaq; adire coëgerit.

Urbs antiqua fuit, Tyrii tenuere coloni  
 Carthago: Italiam contra: Tyberinaq; longe  
 Ostia: diues opum, studijsq; asperrima belli:  
 Quam Iuno fertur, terris magis omnibus unam,  
 Posthabita coluisse Samo: hinc illius arma,  
 Hinc currus fuit: hoc regnum Dea gentibus esse,  
 Si qua fata sinant, iam tum tenditq; fouetq;.  
 Progeniem sed enim, Troiano à sanguine duci  
 Audierat, Tyrias olim quæ uerteret arces.  
 Hinc populum late regem, belloq; superbum  
 Venturum excidio Lybiæ: sic uoluere Parcas.  
 Id metuens: ueterisq; memor Saturnia belli,  
 Prima quod ad Troiam pro charis gesserat Argis.  
 Necdum etiam causæ irarum, sæuiq; dolores  
 Exciderant animo: manet alta mente repositum

Iudicium

Iudicium Paridis: spretæq; iniuria formæ:  
 Et genus inuisum, & rapti Ganymedis honores.  
 His accensa super, iactatos æquore toto  
 Troas reliquias Danaûm, atq; immitis Achilli  
 Arcebat longe Latio: multosq; per annos  
 Errabant acti fati, maria omnia circum.  
 Tantæ molis erat Romanam condere gentem.  
 His irarum Iunonis è causis, quæ infortunia Aeneæ  
 Troianisq; euenerint, dum complures annos mari errare,  
 & deinde in Latio bellum gerere coguntur, Poëta  
 subinde fusissime narrare occipit: & uix duodecim libris  
 absoluit.

Vix è conspectu Siculae telluris in altum  
 Vela dabant lati, & spumas salis ære ruebant, &c.  
 Sic & ante hunc in utroque suo opere Homerus primū  
 causas, deinde insecuta canit euenta. Hunc in modum &  
 T. L. iuius secundo sucepti à Pœnis in Romanos belli,  
 antequam euenta resq; gestas enarrat, causas primum di-  
 cit, quod uidelicet Sicilia Sardiniaq; illa nimis celeri re-  
 rum desperatione Romanis concessa, hæc fraude ab illis  
 intercepta esset: tum quod Annibal, cum puer adhuc es-  
 set, à patre Amilcare Imperatore aris admotus iuras-  
 set, & se quàm primum per ætatem posset, hostem fo-  
 re Romanis. Quin & Sallustium idem facere, ipsius  
 argumento est historia. Quid? non igitur aliò hic cau-  
 sarum locus ualet, quàm ut causas rerum, quæ euene-  
 runt, quod ab his autoribus factitatum esse uidemus,  
 primum exponendas esse sciamus? Est profecto mul-  
 tiplex huius, passimq; nec certo in loco usus: cum

nunc

nunc præcedant, nunc suos sequantur euentus. Nam  
 quanquam primæ quædam, principalesq; summæ re-  
 rum causæ sint, quas nosse principio lector auditor  
 cupit, tamen cum subinde aliæ atque aliæ actiones  
 casusq; existant, & ipsorum alias atque alias causas  
 esse constat: unde si inter narrandum obiter amplifi-  
 cetur, mire orationis extendetur corpus. Quare Ci-  
 cero, cum suarum se laudum minus grauem scripto-  
 rem fore intelligeret, uideretq; L. Luceium Q. F. in-  
 ignem sui temporis historicum bellum ciuile scriben-  
 dum suscepisse, scripta ad eum epistola, omnibus pe-  
 rit modis, suas ut res exemplo Græcorum seorsum per-  
 scribat, atque in se ornando historiæ leges negligat.  
 Posse autem inde, si à continentibus suis scriptis seiun-  
 gat, & à causis, euentis, adiunctisq; amplificet, quod-  
 dam corpus confici. His porro ex locis augeri rem opor-  
 ere, L. Luceium admonet, dum causas, consiliaq; re-  
 rum suarum, casus etiam & euenta explicanda esse  
 scribit. Adiuncta autem sunt, tempus, testimoniaq; Lu-  
 ceij, quem ea, quæ suo iudicio laudanda putaret ornare,  
 quæ contra uituperanda reprehendere uoluit. Atq; huc  
 etiam pertinet multorum in Ciceronem perfidia, insi-  
 dia, proditioq; quæ & putauit esse notanda. Hic nemo  
 mirabitur consilia, & actiones, quas supra in locorum  
 expositione adiunctorum loco complexi sumus, hic causas  
 & euenta dici. Sunt namq; ijs, quorum consilia & facta  
 sunt, adiuncta maxime. Verum caesarum & euertorum nomē  
 accipiunt, cum sumpta ab adiunctis, unde omnis rerum  
 lucitur copia, inter sese componuntur: & causæ effecta:  
 & hæc

Et hæc uicissim illas ostendunt. Quare causas et euen-  
 ta, magnam cum adiunctis cognationem habere, nemo  
 mirabitur. Inde nanq; hi licet nati loci sint, tamē et ipsi  
 latissime patent. Itaque his locis, unde ornatur historia,  
 si et comparationis locum adiecisset, non uideo, nō mo-  
 dō unde historici, sed et rhetores poētæq; qui maxime  
 solent, magis amplificarent. Hinc Cæsar, ut Brutus apud  
 Ciceronem disputat, quia minus rerum suarum his-  
 toriam uestijt, commentarios inscripsit: ceterisq; scri-  
 bendi ansam præbuit, ut qui uellent, eadem copiosius  
 tractarent, et quasi calamistris quibusdam inurerent.  
 His ipsis ex locis lactea illa Titi Liuij ubertas est peti-  
 ta: unde tamen Dionysium Halicarnasseum, qui et ipse  
 Romanas res perscripsit, multo magis auxisse intelli-  
 gas: ut mihi is, quod de Demochare Brutus Ciceronia-  
 nus iudicat, non tam historicum, quàm rhetorem egisse  
 se uideatur. Hinc Maro noster, hinc Homerus ea sum-  
 pserunt, quibus quæ uoluerunt, non tam dilucide enar-  
 rasse, quàm facta ubique mora omnia ob oculos posuisse  
 se uideantur: hic fusissime, ille modo quodam usus: id  
 quod is facile animaduertet, qui cognitis locis et am-  
 plicandi ratione, utrunque cum iudicio legit. Sed hæc  
 de re suo dicetur loco: nunc quod uolumus, usum loco-  
 rum augendiq; rationem in celebrandis factis diligen-  
 tius, et ad cuiusque magis captum indicemus. Vnū igitur  
 factum, si oratione landandum sumamus, sit Theo-  
 dosij Imperatoris, quod insigne maxime gymnasium  
 Bononiæ instituit, primum ex descriptionis loco, at-  
 que adeo ab adiunctis ipsum describamus: unde in-  
 genium,

genium, moresq; principis eluceant: & causæ tam honesti & utilis facti, quasi per transennam appareant. Fecit id & T. Liuius principio historiæ suæ de secundo bello punico: ubi pluribus Annibalem depingendo, animiq; bona uitiaq; plurima exprimendo, qui cum uiro Romanis futura res esset, lectorem statim instruit. Secundum hæc, ab adiunctis res ipsa erit explicanda: quantis & unde sumendis fructibus, qui in professores expenderebantur, hanc scholam adornarit confirmaritq;. Deinde à causis: cur hoc in loco, & tot tantaq; stipendia professoribus constituerit: ut certe hinc, in reliquam totam Europam qui recte Rempub. administrarent, docti mitterentur. Tum ab euentis mirum in modum augeas, si quæ interea loci emolumenta, aliæ aliæq; nationes hac ex academia & ceperint, & quotidie capiant persequaris: qui quibus in locis hinc missi, siue cognitione rerum humanarum physicarumq; utiles Reipub. extiterint, siue legum scientia quid æquum & iniquum esset edocuerint, siue denique medicinæ beneficio laborantibus opem tulerint. Postremo ex comparationis loco quantam uoles copiam sumas, factum hoc, aut cum alijs ipsius, aut cum aliorum Imperatorum præclare factis confrendo.

Exemplum facta ex locis amplificandi apud

Ciceronem.

CAP. XXIII.

**I**Nterdum factum laudamus & dilatamus, non tam sere à causis, & quæ has sequuntur euentis, sed saltem ex adiunctorum & comparationis loco: id quod

Cicero fecit, gratias Cæsari agens, ipsumq; laudans, quòd Marcello ignouisset. Postquam igitur exordium à tempore, eiusq; quo dixit diei circumstantia duxisset, clementiam sapientiámque Cæsaris ab adiunctis statim laudat, ornatq; : nempe à sua, totiusq; Senatus letitia, factum hoc probantis : & propterea de Repub. subinde melius sperantis. Aspergit & paucis obiter laudem Marcelli : quod ipsum, & ex hoc ipso loco est ductum : & eò ualet, ut clarius illustriusq; factum eius reddatur, quod præstantissimo amplissimoq; uiro ignouisset. Deinde ex comparationis loco Cicero amplificat : & confert hoc Cæsaris factum cum maximis eius bellis, rebusq; gestis : quibus omnibus iure anteferri oportere, pluribus ostendit. Porro hac in comparatione orator tantam moram trahit, dum interim ab adiunctis circumstantias admiscet, ut omnia quæ ad laudem pertineant, totaq; oratio, nisi quod pauca ad finem aliò spectantia adiecit, hoc solo ex loco uestita, amplificataq; deprehendatur. Quare quantum hoc ex loco res extendi possit, cum plurima apud Ciceronem exempla, tum hoc studioso perspicuum esse potest.

Exemplum res ex locis amplificandi apud  
T. Lium historicum, breuiterq; easdem  
explicandi.

CAP. XXIIII.

**H**Inc autem quis locorum usus, quæ laudandi amplificandiq; ratio sit, quanquam satis liquere putem, tamen non abs re fuerit, & hæc ipsa in historia, classicisq; autoribus paucis indicare. Narraturus T. Liuii



uius contra Romanos res ab Annibale gestas, ut statim intelligi posset, qualis is esset, qui tantum in discrimen Romanum nomen adduxerit, primum ipsum Ducem ex descriptionis loco depinxit his uerbis : Missus Annibal in Hispaniam, primo statim aduentu omnem exercitum in se conuertit. Amulcarem sibi redditum ueteres milites credere : eundem uigorem in uultu, uimq; in oculis, habitum oris, lineamentaq; intueri. Deinde breui effecit, ut pater in se minimum momentum ad fauorem conciliandum esset. Nunquam ingenium idem ad res diuersissimas, parendum, atque imperandum fuit. Itaque haud facile discerneres, utrum Imperatori, an exercitui charior esset. Neque milites alio duce plus confidere, aut audere : plurimum audaciae ad pericula capeffenda, plurimum consilij inter ipsa pericula erat. Nullo labore, aut corpus fatigari, aut animus uinci poterat. Caloris ac frigoris patientia par : cibi potionisq; desiderio naturali, non uoluptate modus finitus : uigiliarum somniq; nec die, nec nocte discriminata tempora : id quod agendis rebus superesset, quieti datum. Ea neque molli strato, neque silentio accersita. Multi saepe militari sagulo opertum humi iacentem inter custodias stationesq; militum conspexerunt. Vestitus nihil inter aequales excellens : arma atque equi conspiciebantur. Equitum peditumq; idem longe primus erat. Princeps praelium inibat : ultimus conferto praelio excedebat. Has tantas uiri uirtutes ingentia uitia aequabant : inhumana crudelitas : perfidia plus quam punica, nihil ueri, nihil sancti, nullius Dei metus, nullum iusiurandum, nulla religio.

Hactenus mores, ingeniumq; descripsit: quæ quidem  
 omnia ab eo, qui rem nudè explicare uoluisset, omitti  
 potuissent. Subijcit autem ex adiunctorum loco; his uer-  
 33 bis: Cum hac indole uirtutum ac uitiorum triennio sub  
 33 Asdrubale Imperatore militauit, nulla re, quæ agenda  
 33 audendaq; magno futuro duci esset, prætermissa. Hæc  
 quidem, cum illud tempus præcedant, quo belli dux de-  
 claratus est, omitti potuissent. Quæ sequuntur ex ad-  
 iunctorum, seu qui inde nascitur causarum & cuento-  
 rum loco sumuntur: cur uidelicet Annibal in suscipien-  
 do bello, nihil prolatandum arbitretur; & dum Sagun-  
 tinos petit, in Olcadum fines exercitum ducat. sic ille:  
 Cæterum ex quo die dux est declaratus, uelut Italia ei  
 33 ei prouincia decreta, bellumq; Romanum mandatum  
 33 esset, nihil prolatandum ratus, ne se quoque, ut patrem  
 33 Amilcarem, deinde Asdrubalem cunctantem casus ali-  
 33 quis opprimeret: Saguntinis inferre bellum statuit. Qui-  
 33 bus expugnandis, quia haud dubie Romana arma mo-  
 33 uebantur, in Olcadum fines prius ultra Iberum ea gens  
 33 in parte magis, quàm in ditione Carthaginensium erat,  
 33 induxit exercitum: ut non petisse Saguntinos, sed re-  
 33 rum serie finitimis domitis gentibus, iungendoq;, tra-  
 ctus ad id bellum uideri posset. His demum subijcit euen-  
 33 ta, gestæq; rei narrationem. Carteiam urbem opulen-  
 33 tam, caput eius gentis expugnat, diripitq;: quo metu  
 33 percussæ minores ciuitates, stipendio imposito imperium  
 33 acceperunt. Victor exercitus, opulentusque præda,  
 33 Carthaginem nouam in hyberna est deductus. Ibi lar-  
 33 ge partiendo prædam, præterita cum fide exoluendo,  
 cunctis

cunctis ciuium suorum sociorumq; animis in se firmatis, uere primo in Vacceos motum bellum. Nuda hæc satis narratio est : nisi quòd obiter petitas ab adiunctis circumstantias inserat nonnullas : quod genus sunt, urbem esse Cartelam opulentam, & suæ gentis caput : tum exercitum opulentum præda deductum esse. Prosequitur autem narrationem temporis, cuius mentionem facit, seruatò ordine. Hermantica & Arbacala Cartorum urbes, uel captæ. Arbacala & uirtute, & multitudine oppidanorum diu defensa. Ab Hermantica profugi, exulibus Olcadum priore æstate domitæ gentis, cum se iunxissent, concitant Carpentanos : adorti q; Annibalem regressum ex Vacceis, non procul Tago flumine agmen graue præda turbauere. Pura hæc, nudaq; sunt omnia : nisi quòd ab adiunctis est, oppidanorum uirtute, & multitudine, Arbacalam diutius esse defensam : neque procul Tago impetum in Annibalis agmen esse factum. Quæ sequuntur, paulò copiosiora sunt. Nam & consilia Annibalis aperit, propterea amnem traiecientis, ut in transitu fluminis hostes inuaderet : & causas ferociæ hostium Carpentanorum, tum sua multitudine, tum fuga Annibalis minus timentium. Atque hic Liuius, & à suo obiter testimonio amplificauit : dum inuictam aciem dicit, si æquo certaretur campo : sic ille. Annibal prælio abstinuit : castrisq; super ripam positis, cum prima quies silentiumq; ab hostibus fuit, agmen uado traiecit : ualloq; ita producto, ut locum ad transgrediendum hostes haberent, inuadere eos transeuntes statuit : equitibus præcepit, ut cum ingressos aquam uiderent

„ derent, adorirentur. Peditum agmen in ripa elephantes  
 „ quadraginta disposuit. Carpentanorum cum appendici-  
 „ bus Olcadum, Vacceorumq; centum millia fuere. In-  
 „ uicta acies, si æquo dimicaretur campo. Itaque & in-  
 „ genio feroces, & multitudine freti, & quòd metu di-  
 „ scessisse credebant hostem : id morari uictoriam rati,  
 „ quòd interesset amnis : clamore sublato, passim, sine ul-  
 „ lius imperio, quà cuique proximum erat , in amnem  
 „ ruunt. Hactenus consilia causasq; exposuit, quibus su-  
 „ biicit euenta : nempe infelicem Carpentanorū pugnam,  
 „ & deditionem. Et hæc quidem ipsa, satis à circunstan-  
 „ tijs, quas explicat, illustrat his uerbis : Et ex parte al-  
 „ tera ripæ, uis ingens equitum in flumen immissa, me-  
 „ dioq; alueo, haud quaquam pari certamine concursum.  
 „ Quippe ubi pedes instabilis, & uix uado fidens, uel in-  
 „ ermi equite, equo temere acto peruerti posset : eques  
 „ corpore armisq; liber, equo uel per medios gurgites sta-  
 „ bili, cominus eminusq; rem gereret. Pars magna flumi-  
 „ ne absumpta : quidam uerticoso amni delati in hostes,  
 „ ab elephantis obtriti sunt. Postremi, quibus ingressus  
 „ in suam ripam tutior fuit, ex uaria trepidatione cum in  
 „ unum colligerentur, priusquam ex tanto pauore recipe-  
 „ rent animos, Annibal agmine quadrato amnem ingres-  
 „ sus, fugam ex ripa fecit : uastatisq; agris, intra paucos  
 „ dies Carpentanos quoq; in deditionem accepit. Hunc in  
 „ modum, reliqua toto corpore alia magis, alia minus,  
 „ ut quæque res postulat, his ipsis ex locis extenduntur.  
 „ Rariores autem comparationes sunt : locus in hoc præ-  
 „ sertim genere, omnino ad ornatum amplificationemq;

accomme

accommodatissimus : unde poëtis, rhetoribusq; copiam sequentibus crebrior, historicis, ne ad ornandum magis, quam ad narrandum orationem sumpsisse uideantur, minus familiaris. Porro Sagunti oppugnationes, excidiumq; quod proxime sequitur, pluribus adiectis peristasis copiosissime explicatur. Verum hæc ipsa Liuidæna, ex locis aucta, amplificatæque, nuda, omni ornatu, quasi uestitu spoliata, ob oculos ponamus : unde quid inter iciunam, necessariamq; narrationem, & copiosam locupletemq; intersit, cognosci potest. Missus Annibal in Hispaniam, postquam mortuo Asdrubale dux belli est declaratus, Saguntinos bello petit. Quod dum facit, in Olcadum fines exercitum ducit. Carteiam urbem expugnat, diripitq;. Minoribus deinde ciuitatibus metu subactis, exercitum Carthaginem nouam in hyberna deducit. Hic large prædam partiendo, præteritaq; cum fide exoluendo, cunctis ciuium suorum, sociorumq; animis in se firmatis, uere primo in Vacceos motum bellum. Hermandica & Arbacala Carteiorum urbes, ui captæ. Ab Hermandica autem profugi, exulibus Olcadum, cum se iunxissent, concitant Carpentanos : adorti q; Annibalem regressum ex Vacceis, non procul Tago flumine agmen turbauere. Annibal autem traiecto amni, temere insequentes hostes ad centum milia partim equitatu in flumine oppressit, partim in fugam conuertit : uastatisq; agris, & Carpentanos paucos intra dies in deditionem accepit. Breuis hæc, nudaq; narratio est, quam ut uir ille eloquentissimus ex locis locupletarit, iam uisum est.

Nullis non ex locis heroicos uates augere.

C A P.

X X V.

**I**Am uero quanto heroici uates nullis non ex locis  
omnia magis illuminent, & quasi depicta ob oculos  
ponant, hic spectemus. Cum T. Liuius narrationem re-  
rum ab urbe condita, ab excidio Troiano orditur, pau-  
cis Aeneæ in Italiam nauigationem, & bella ab eo in  
Italia gesta enarrat: in quibus describendis, quantam  
Vergilius moram trahit? nunc loca, personasq; descri-  
bendo: nunc alijs atque alijs orationes tribuendo: nunc  
explicatis omnibus circumstantijs, copiose res narran-  
do: comparationibusq; dilatando: adeo, ut hæc ipsa,  
quæ ille paucis, uix duodecim absoluat libris. Non enim  
ante, quàm res tota exposita oculis sit, progreditur.  
Quare & ante pugnam, eorum, qui arma sumpserunt  
catalogum adiicit: ducum nomina, copiasq; recenset: in  
quo tamen Homerus, quanto deum immortalem hoc no-  
stro est uberior? Hic, antequam in pugnam iretur, non  
satis esse putauit, Græcorum omnium principum nomi-  
na, regna, & quantas quisque copias adduxisset, fusi-  
sime recensuisse: insuper & senes Heroas in mœnia tur-  
resq; ducit: inde oculis totum hostium exercitum per-  
lustrare: accersitamq; Helenam de unoquoque Græco-  
rum principe percunctari: ut ex ea, quæ probe nossent,  
& quæ cuiusque forma, statura robur corporis, inge-  
niumq; esset, cognosci posset. Nec hac modo copia, uno  
altero ue in loco est usus, sed facta ubique mora, omnia  
fusiſſime extendit: & quasi penicillo depicta ob oculos  
ponit. Quare huius poëma, omnium maxime loquentem  
picturam

picturam esse recte dixerimus.

Eadem uituperandi facta, quæ laudandi ratio.

CAP. XXVI.

**Q**Uæ autem facta reprehendendi ratio sit, ex laude facile intelligi potest: contraria namque omnia uituperari debent. Quod si forte plura numero flagitia existant, temporis commode seruatur ordo: quod Ciceronem scriptis in Vatinius, et L. Pisonem orationibus fecisse uidemus. Hæc de personarum, urbium, factorumque laude: unde et quis cæteris in rebus laudandis, atque extendendis, quas persequi infinitum foret, locorum sit usus, colligi facile potest.

De dispositione, ipsoque exordio: & unde locorum sumatur.

CAP. XXVII.

**I**Am uero cum ita natura comparatum sit, ut copiose inuenisse nihil sit, nisi et hæc ipsa recte disponamus: quæ et hoc in genere collocandi ratio sit, paucis perstringemus. Summis rhetorum placuit, quatuor orationis constituere partes: Exordium: Narrationem: Confirmationem: et Epilogum. Exordio auditorum animos esse conciliandos: et quasi uiam ad ipsam causam esse sternendam: id autem commode fieri, si ipsos apud quos dicimus, nobis beneuolos, dociles, attentosque reddamus. Narratione autem ipsa, quæ uolumus exponenda esse atque docenda. Confirmatione subinde, nostra omnia quibus poterimus argumentis, firma certaque esse facienda: et aduersariorum obiecta diluenda. Postrema parte, epilogo ipso, pondera rerum esse repetenda: affectusque mouendos.



Hæc ita fieri oportere, cum summorum hominum præcepta, tum ipsa nobis ratio præscribit. Verum hic in laude, ubi non dubia confirmanda, sed certa laudanda extollendaq; erunt, nihil tertia illa parte confirmatione opus erit. Quinetiam, si aut unius, aut plurium personarum multas, præclareq; res gestas describendas suscipias, ipse omitti epilogus potest. Neque enim heroici uates, historiciq;, quæ pluribus enarrant, repetenda sibi, claudendaque esse arbitrantur: adeo, ut exordium interim omittatur. Nam Cæsar res suas gestas, statim à Galliæ descriptione narrare cœpit. Sed hunc excusat, & quod de se ipse scripsit, ubi scribendi causas consiliaq; aperire forte inuidiosum fuisset, & quod commentarios, capitaq; saltem rerum suarum literis mandavit, ut qui uellet, hæc ipsa postea fusius splendidiusq; tractaret. Cum igitur exordio sternenda uia sit, ad ea, quæ sumus dicturi, ut beneuole, intelligenter, attenteq; audiamur, sæpeq; uel rebus iam copiose inuentis nondum quod commodè summas appareat, unde duci debeat, erit indicandum. Porro beneuolentiam, aut à personis, aut à rebus esse petendam, rhetores passim docent. Alia autem nonnulla, unde præterea duci usu receptum Fabius uidit, partim personis, partim rebus attribuit. Verum plurima sunt, quibus animi moueri, beneuoliq; nobis reddi possunt. Nam & à meritis nostris id consequimur: unde Cicero exorsus suam ad Quirites orationem antequam iret in exilium: ab officio, unde pro Archia poëta: à tempore, unde pro M. Cælio, & Mar

& Marcello : à loco , unde pars exordij pro Deiotaro : ab ipsis item, quas causæ aliæ alias, & subinde novas adferunt circumstantijs , quæ certis tradi præceptis nequeunt. Quare pro Milone , ab ipso armorum habitu est exorsus. Quæ cum ita sint , & hæc captandæ benevolentiae ratio, ab illis, unde omnia , quos supra exposuimus generalibus locis recte petatur. Itaque unus adiunctorum locus , omnium horum , quæ traderunt, & plurium quidem nos admonet. Neque enim hæc solum dicenti adiuncta sunt , unde benevolentiam captet , suum ipsius officium , & meritum , aliâq; id genus à se sumpta , auditores item ipsi, tum aduersariorum, cuiusq; pro quo perorat persona, sed & tempus, locusq; , in quo dicit : & ipsa denique causa : quæ cum alia alias latebras , recessusq; habeat, introspiciendi dicturo omnes diligenter erunt : eaq; elicienda , quæ ad exordium emerendumq; fauorem accommodata putet. Itaque Cicero Deiotarum defensurus , ab his causæ circumstantijs , quibus se moueri dixit , uarie sibi Cæsaris animum conciliauit. Primum à persona Deiotari, qui rex præter morem in uitæ discrimen uocatus esset : Deinde à perpetuis regis in Rempub. Romanam meritis : tum à crudelitate, atque indignitate accusantium : tum à persona Cæsaris , in sua ipsius causa iudicis : Postremò à loci , in quo dixit insolentia. Quare & nobis hoc in genere incepturis, quæ ad comparandum fauorem pertinebunt, ex adiunctorum loco petenda erunt : qui pro rerum ornandarum , uituperandarumue uarietate, subinde alia atque alia suppeditabit. Vt si forte am

te amplum & principem uirum laudaturus uenias, huiusq; magna perpetuaq; in eos, apud quos dicturus es merita constare intelligas, commodè ab huius meritis principium sumas in hanc sententiam. Non uereri te, quin equas tibi aures præbituri sint, huius de laudibus dicturo, cuius in eos, cum perpetua, tum maxima merita constare uideas. Quin & ab eorum uicissim in hunc declarato sæpius officio exordiaris licebit in hunc modum. Gaudere te, amplissimum, fortissimumq; uirum, apud eos laudandum suscepisse, quos pro multis summisq; in se meritis, maximos uicissim honores huic detulisse, officiisque præstitisse non ignores. Quod si & huic ipse debeas, hinc incipias licet. Ingratum te ciuem fore, nisi cum, quibus posses laudibus ornare, quem cum uniuersi ob plurimas singularesque uirtutes maximi pendant, imprimisq; prædicent, tum te omnium maxime oportere, cuius aut hortatu, aut beneficio, literarum studia ingressum, ea quæ dicendo possis, consequutum intelligas. A loco item exordium ducas. Lætari te, de celeberrimi hominis bene gestis rebus, eo ipso in loco dicturum, ubi non modo ipsius uita, fidesq; sanctissima satis spectata, sed & multa pro Repub. præclare facta, omnibus cognita perspectaq; essent. A tempore ita exorsus est Cicero pro M. Marcello. Diuturni silentij P. C. quo eram his temporibus usus, non timore aliquo, sed partim dolore, partim uerecundia, finem hodiernus dies attulit: idemq; initium, quæ uellem, quæq; sentirem, meo pristino more dicendi. A sententia etiam aliqua principium sumere li-

et. Si uirtus in animis bonorum plurimum semper ualuit, is omnibus laudibus uehendus extollendusque erit, qui à teneris ita uitam instituit, ut iam adulta uiriliq; ætate, in omni uirtutum genere maxime claruisse, cognitum sit atque perspectum. Titus Liuius scripturus res Romanorum ab urbe condita, beneuolentiam statim captauit suas in scribendo uires extenuando, eleuandoq; , præ illorum splendore, qui ante se scripsissent. Omnium horum unus adiunctorum locus nos admonet: & plurium quidem, quàm hic enumerari aut possint, aut debeant. Atque hic animaduertendum est, hæc ab adiunctis sumpta, ut cætera, & reliquis ex locis extendi atque augeri posse. Atqui & ex alijs ordiri licebit locis. An non exordium hoc Ciceronis pro Deiotaro, cuius iam mentionem fecimus, si diligentius introspeciamus, totum à caussarum euentorumq; loco sumptum nos fateri necessum est? Siquidem sue perturbationis Cicero, timorisq; , qui sibi dicturo euenerat, causas complures adfert. Primum à persona regis capitis accusati: Deinde à perpetuis eius in Romanos meritis: tum ab accusatorum & crudelitate, & indignitate: tum à persona Cæsaris in suo ipsius negotio iudicis; Postremo à loci insolentia, ubi dicere non consuesset. His de causis Ciceroni animi perturbatio, timorq; euenerat. Quare, quanquam non male dicimus à personis hic, atque adco ab adiunctorum loco captatam esse beneuolentiam, sunt nanque dicenti adiuncta hæc omnia, personæ eorum omnium apud quos dicit, tempus item, & locus, causæq; circumstantiæ:

tamen

tamen, cum ut supra diximus ab adiunctis tum causa-  
rum euentorumq; locus nascatur, cum causæ ad euen-  
ta, & hæc uicissim ad illas referantur, rectius, magisq;  
proprie, à causis & euentis, quàm ab adiunctis peti-  
tum exordium esse dicemus. Quin & Ciceronis pro le-  
ge Manilia, & C. Rabirio exordia, à causis & euen-  
tis sunt ducta. Ibi cur ita acciderit, ut ante eum diem  
è rostris ad populum non sit concionatus causas plu-  
res, ut honestas, ita ad emerendum fauorem maxime ac-  
commodatas adfert: hic facti sui, cur ad defendendum  
uenisset patronus, causas commemorat, cum uetustam  
suam cum C. Rabirio amicitiam, tum ipsius dignita-  
tem, tum humanitatem, tum denique perpetuam suæ  
uitæ consuetudinem. Quid? an non & ex compara-  
tionis loco pro domo sua ad Pontifices principium his  
uerbis duxit? Cum multa diuinitus Pontifices à ma-  
ioribus nostris inuenta atque instituta sunt, tum nihil  
præclarius, quàm quod uos eosdem, & religionibus  
deorum immortalium & summæ Reipub. præesse uolue-  
runt: ut amplissimi & clarissimi ciues Rempub. bene-  
gerendo, Pontifices religiones sapienter interpretan-  
do, Rempub. conseruarent. Hic orator, hic ipso,  
quòd nihil præclarius à maioribus inuentum atque in-  
stitutum dicit, cum multa diuinitus inuenerint insti-  
tuerintq;, quàm Pontifices & religionibus deorum,  
& summæ Reipub. præesse uoluisse, mirum in mo-  
dum ipsorum sibi animos conciliat. Ducuntur & ex  
definitionis loco. Siquidem à sententia insigniori sæpe  
exordimur: quæ ferè uires suas inde sumere solet: &

Cicero

Cicero ex descriptionis loco in Catilinam est exorsus. Rempub. Quirites, uitamq; omnium uestrum, bona, fortunas, coniuges, liberosq; uestros, atque hoc domicilium clarissimi imperij, fortunatissimam pulcherri-  
mamq; urbem, hodierno die deorum immortalium erga uos summo amore, laboribus, consilijs, periculisq; meis, ex flamma atque ferro, ac penè ex faucibus fàti ere-  
ptam, & uobis conseruatam ac restitutam uidetis. Sed & ex reliquis locis omnibus hæc trahi possunt: quod nisi hinc liquere putarem, persequi non grauarer. Qua-  
re cum illis ex locis omnia ad fidem, amplificandum, affectusq; mouendos, quod suo docebitur loco ducan-  
tur, & hæc exordia, quibus dum conciliamus motum hominum animis adferimus, inde petenda esse nemo du-  
bitabit. Quod autem rhetores à personis nostris, aduer-  
siorum, iudicum, ipsaq; causa sumenda esse scriptum reliquerint, remq; latissime patentem exiguis termi-  
nis circumscripserunt, inde esse puto, quòd in iudicio dicturos, quibus ferè solis scribebant, hinc commodè ducere, & posse, & solere intelligerent. Ad hos igitur locos tanquam fontes ducendi sumus: unde cum omnia, & hæc quoque sumi oportet: & hoc quidem magis, quòd his in generibus, ubi à iudice nihil petitur, libe-  
riora sint exordia: interim nulla. Neq; enim ab aliena-  
ti, aut parum æqui conciliandi hic nobis sunt animi. Sal-  
ustius Catilinarij & Iugurthini belli principia altius duxit: illud ab officio hominis, hoc à querela naturæ hu-  
manæ: neutrum, aut captandæ beneuolentiæ, aut nar-  
randis rebus multum accommodatum. Heroici uir-  
tes

tes, rem paucis proponendo, dociles attentosq; magis, quam beneuolos lectores faciunt: quanquam Musarum inuocatione, & id consequi, quod Fabio de Homero placuit, uideri possunt. Attentos autem docilesq; quæ serè coniuncta sunt reddimus, si magna, noua, incredibilia, seu ipsis auditoribus ad exemplum, seu ad Reipub. religionisq; statum pertinentia, te allaturum, aut his similia dicas. Itaque T. Liuius postquam beneuolum sibi, ut diximus, lectorem reddidit, attentum docilemq; fecit, dum dixit, non se laborare, si quis minus credat quæ ante urbem conditam facta sint, & proxima originibus: modò spectet, quibus artibus Romana Respub. creuerit: atque ex ea, quæ exemplorum ditissima esset, quid sibi suæq; Reipub. imitandum declinandumq; esset, capiendum esse putet. Quin etiam id assequaris, si paucis summam rerum exponendarum complectaris, ut Homerus & Vergilius, reliquiq; uates principio operum suorum faciunt: si & statim describas: quod Cicero, ut supra diximus, exordio in Catilinam fecit: & hic in laudandis personis, urbibus, factis, cæterisq; rebus non incommode fiat: si item diuidas: & quo ordine dicturus sis aperias: atq; id ipsum, aut principio facias: ut Cicero pro A. Cluentio. Animaduerti iudices omnem accusatoris orationem, in duas diuisam esse partes: quarum altera mihi niti, & magnopere cōfidere uidebatur, inuidia iam inueterata iudicij Iuniani: altera tantūmodo cōsuetudinis caussa timide, & diffidenter attingere rationem ueneficij criminū: qua de re, lege est hæc quæstio constituta. Aut postquam  
exordio



exordio animos hominum iam tibi conciliaueris. Cicero pro lege Manilia, causa iam breuiter exposita, quòd ita rerum natura poscebat, diuisione usus est. Primū mihi uidetur de genere belli, deinde de magnitudine, tum de Imperatore deligendo esse dicendum. Hunc in modum si hominem ornaturus uenias, primum te de externis eius bonis, patria, parentibus, & fortunis, deinde de corporis, forma, & ualetudine: postremo de animi bonis, uirtutibus, & recte factis dicturum esse dicas. Porro attentio atq; docilitas, non ex locis, quemadmodum beneuolentia, petenda est: propterea, quòd dum beneuolos facimus, motum animis adferimus: quod ipsum ex locis petatur necessum est: attentos autem, docilesq; uel hoc solo reddimus, quòd quas res, quantas, quàm utiles, & quo ordine dicturi sumus, saltem proponamus, atq; indicemus. Hæc de exordijs: quibus ubi auditorem, lectorem uel præparauerimus, res ipsa erit exponenda.

De narratione, & cur Homerus & Maro à fine narrare cœperint. CAP. XXVIII.

**I**N narrando igitur quæ copiose inuenimus, commode de temporis ordinē sequimur: & quidem quo supra in personarum, urbium, factorumq; laude, atque amplificatione usi sumus. Cæterum licet & neglecto temporis gradu, in sua quæque uirtutum genera, facta distribuere: & parua magnis, obscura perspicuis, iucunda tristibus, minus uerisimilia certis inserere. Quinetiam quemadmodum commodissime à minoribus ad maiora ascendimus, ita & interim à maioribus ad minora de-

h scen

scendere licet. Quæ collatio est in laudando, eadem & in uituperando. Porro historicis hic minus licet: ut quibus in narrando temporis ordo seruandus est semper. Poëtæ autem nullis hic omnino legibus tenentur. Itaque nunc à principio, nunc è medio, nunc è fine narrare incipiunt. Homerus rerum à Græcis ad Troiam gestarum narrationem à decimo demum anno, & prope modum sine laborum orditur: idem facit & in *Odyssæa*. Hunc sequutus noster Maro, errorum *Aenææ* narrationem à septimo demum auspiciatur anno, quo in *Siciliensibus* undis iactabatur:

Vix è conspectu Siculæ telluris in altum  
Vela dabant leti, & cætera.

Temporis autem gradum Naso, in exponenda rerum uariarum metamorphosi sequitur. Causas autem *Homerice* dispositionis, ubi nec principium, nec finis conspicitur, introspiciamus. Neque enim, cum ab ira *Achillis*, qui decimo demum anno *Agamemnoni* irasci cœpit expositionem incipit, aut quæ ante id tempus per nouem annos ad Troiam sint gesta, aut ipsius excidium urbis explicat. *Aristoteles*, cum commentatores hic ferè cæcutiant, & uatis consilium minus uideant, hanc rem scripto de poëtica libello diligenter ut omnia intuetur: dicitq; à diuino id uate propterea factum, ne, dum pro magnitudine rerum copiose omnia depingi uoluit, nimis magnum opus obscurumq; redderetur. Quod si profecto seruato temporis ordine, & cætera, omnibus ut solet explicatis circumstantijs explicanda suscepisset, non *Iliada*, sed *Chiliada* scripturus fuisset.

Nec

Nec finem inuenisset, si errores Vlyſſis, caſusq; , à principio ad finem uſque tam copioſe, ut quinto libro cœpit ipſe perſequi uoluisset. Quare poëta, poſtquam nonnulla ipſe non tam enarraſſet, quàm facta mora depinxisset, cætera omnia Vlyſſem ipſum Phæacum regi celerius narrare uoluit. Sequutus & noſter diuini uatſ conſilium, poſtquam per paucos dies exauſtos in Siculo mari Aeneæ labores fuſiſſime ipſe expreſſiſſet, ipſum deinde ad Didonem deduxit, cui breuiter, & Troiæ excidium, & quæ per totum ipſe ſeptennium mari perpeſſus eſſet, enarraſſet. Quibus autem ex locis narratio ſumatur ſupra uiſum eſt.

De Confirmatione & Epilogo. CAP. XXIX.

Confirmationem laus nullam habet: neque enim hic dubia, ſed certa cognitaq; prædicantur. Attamen interdum incidere nonnulla poſſunt, quæ ſuam probationem requirant. Ne epilogo quidem, quo rerum capita repetuntur, heroici uates hiſtoriciq; utuntur. Neq; enim plures numero res repeti reuocariq; poſſent. Orationi autem, ad confirmandam auditorum memoriam, augendamq; delectationem, perquam utilis. Cum autem epilogus, repetitio ſit rerum ante ad laudem, ſeu uituperium adductarum, quibus ſumatur ex locis nemini obſcurum eſſe poteſt.

De Eloquutione ſeu Exornatione.

CAP. XXX.

Diximus de locis, & quæ in laude inde inueniendi, & amplificandi, tum diſponendi ratio eſſet: dicendum ſubinde erit de eloquutione, ſeu exornatione:

ubi copiose inuenta, recteq; disposita, erunt exornanda et quasi quibusdam coloribus uarianda. Totum quidem orationis corpus, sed rude, ex locis erat sumendum: quod idem hic uestiendum, & figuris, quasi coloribus quibusdam, ut gratiam ueneresq; habeat oratio, illuminandum erit. Atque hic, cum hoc ipso, quod uestiatur illustreturq; simul & augeatur dilateturq; oratio, quibus ex locis, unde omnia sumenda esse diximus, figuræ item affectusq; trahantur, indicabimus. Porro rebus copiose inuentis, atque dispositis, nihil perinde consequens necessariumq; quàm siue dicturus, scripturus uel sis, ita exornare, ut auditorem, seu lectorem doceas, delectes, & moueas. Tria nanque hæc oratorum officia sunt: quæ ut quisque maxime præstat, ita optimus rhetor est censendus. Docebimus autem, delectabimusq; si dilucida, numerosa, & figuris illustrata erit oratio. Mouebimus autem, si pro causæ conditione, nunc leniores, nunc uehementiores affectus concitemus. De his igitur singulis breuiter nobis dicendum erit.

### De Perspicuitate, ipsaq; Periodo.

CAP.

XXXI.

**D**ilucida igitur & perspicua erit narratio, atque adeo totius orationis corpus, si cum uerbis constet simplicibus, atque coniunctis, simplicia latina sint, propria, atq; usitata: coniuncta uero recte locata, nec iusto longiore circumducta periodo. Porro latina ut sint omnia, quemadmodum imprimis est præstandum, summamq; perspicuitatem adfert, ita id ignoranti hic serius præcipitur

pitur. Propria autem sunt, atque usitata, illa, quibus cuiusq; rei uis proprietasq; maxime explanatur, hæc quæ à classicis quibusq; autoribus sæpius sunt usurpata. De translatis autem uerbis, quæ & gratiam habent maximam, mox suo dicetur loco. In coniunctis danda est opera, ne aut asperos habeant cōcursus, ut si dicas, rex Xerxes, durum id quidem, lenius autem minusq; asperū erit, si inferas aliquid in hunc modum, Rex autem Xerxes: aut ipso uocalium concursu quandam hiantiam atq; dis iunctionem: ut bacce æneæ amœnissimæ impendebant: aut nimiam eiusdem literæ repetitionem: quale est: O Tite tute Tati tibi tanta Tyrāne tulisti. Hæc aut his similia uitia, dilucide dicturis scripturis ue, magnopere fugienda erunt. Danda item in contextu opera est, ne minus significantia, plus significantibus uerbis postponantur: sed hæc illis: ut Cicero in Antonium. Tu inquit istis faucibus, istis lateribus, ista gladiatoria totius corporis firmitate. Hic si uerborum ordo inuertatur, cum insurgere debeat oratio, ridicula, minusq; dilucida collocatio foret. Quinetiam commodissime uerbis sensum claudimus: inest enim ijs maior quædam uis, quæ in claudendo consistendoq;, animis hominum imprimitur maxime: quemadmodum Cicero his in Antonium uerbis: Vt tibi necesse esset, in conspectu populi Ro. uomere. Hunc si ordinem inuertas, uerbumq; transferas, minus uirium habebit oratio. Verum si durius forte uerbū existat, et hic, ut passim, numeris erit seruiendum. Plurimum ad perspicuitatem momenti, & in ducenda periodo positum est: quæ si longius ducatur, quàm uno spiritu pronuntie-

mus, periculum, ne minus auditor intellectu sequatur. Hanc Cicero de oratore, quatuor hexametrorum uersuum modo dicit constare. Verum id de iusta & medio-cri, cum saepe ultra citraq; consistatur, accipiendum est. In breuiori ambitu, ne breuitas aures defraudet, in longiori, ne obtundat danda opera erit. Conflatur autem commatis & colis periodus. Comma, quod nostra lingua incisum est, id esse dicimus, cum in dicendo, sententia omnino imperfecta breuem moram facimus: quæ & in scripto, quo res magis dilucida existat, notari solet. Colon autem est, quod membrum nos dicimus, cum ut-  
cunque perfecta sententia, moram facimus: quam & suis notis signant scriptores. Huius rei Hoc sit exemplum. Cum in amicorū urbem uenissem, nihil prius duxi, quàm mei amantiſſimos statim conuenire. Hic duo sunt com-  
mata, post uerbum uenissem, & duxi, colon autem, post conuenire, ubi sensus quidem est expletus, sed tamen cui adijci commodè possit: quod si fiat, excedet in pe-  
riodum, quæ constat commatis & colis. Ex pluribus saepe, & solis commatis conficitur periodus: qualis est hæc Ciceronis. Quanquam mihi semper frequens con-  
spectus uester multo iucundissimus, hic autem locus ad agendum ampliſſimus, ad dicendum ornatissimus est uisus Quirites, tamen hoc aditu laudis, qui semper optimo cuique maxime patuit, non mea me uolun-  
tas, sed meæ uitæ rationes ab ineunte ætate susceptæ prohibuerunt. Cæſim hic dixit Cicero: quando postre-  
mum tandem uerbum, totam complectitur sententiam. Cæſim autem & membratim idem statim pro Cluen-  
tio:

io: Animaduerti iudices, omnem accusatoris orationem, in duas diuisam esse partes: quarum altera mihi niti, & magnopere confidere uidebatur inuidia iam inueterata iudicij Iuniani: altera tantummodo consuetudinis causa, timide, & diffidenter attingere rationem ueneficij criminum: qua de re lege est hæc constituta quaestio. Hæc periodus tribus constat membris, nempe post, partes, Iuniani, & criminum: reliqua incisa sunt omnia. Est ubi ex pluribus commatis & colis constat: & his quidem præcedentibus, illis sequentibus. Quousque tandem Catilina abutere patientia nostra? quandiu nos etiam furor iste tuus eludet? quem ad finem sese effrenata iactabit audacia? nihil ne te nocturnum præsidium palatij, nihil ne urbis uigiliæ, nihil timor populi, nihil concursus bonorum omnium, nihil hic munitissimus habendi senatus locus, nihil horum ora, uultusq; mouerunt? Est ubi ex uno atque altero commate saltem constat: ut cuiusdem contra Rullum Tribunum plebis exordium. Commodius fecissent Tribuni plebis Quirites, si quæ apud uos de me deferunt, ea coram potius me præsentem dixissent. Quemadmodum ex uno commate, quòd sententia desideretur confici periodus nequit, ita cur ex solo membro non possit, nihil uetat: cuius rei scripta à Cicerone ad Terentiam suam epistola, nobis sit documento. Valetudinem tuam uelim cures diligentissime. Colon id est, quod membrum nos dicimus, atque ab ijs, quæ subiicit omnino seiunctū: subiicit autem. Nam mihi & scriptū, & nuntiatum est, te in febrim subito incidisse. Huiusmodi



periodis idem, cum & alibi passim, & scripta ad L. Lu-  
ceium epistola est usus. Coram me tecum hæc eadē age-  
re sæpe conantem deterruit pudor quidam penè subru-  
sticus, quæ nunc expromam absens audacius. Membrum  
est, atque adeo periodus: ut quæ ab ijs, quæ sequuntur,  
seclusa omnino est, atque seiuncta. Interdū singulis uer-  
bis constat: ut diximus, testes dare uolumus. Hæc, & his  
similia, cum undique libera existant, incisaq; & mem-  
bra propterea dici nequeant, quòd sui ambitus partes  
hæc esse intelligātur: periodos certe breues, simplicesq;  
quarum Cicero, dum breuissimas duobus ex membris cō-  
stare disputat non meminit, cum Aristotele appellandas  
esse puto. Is nanque tertio rhetoricorum, ipsam perio-  
dum, aut ex pluribus colis, aut ex uno tantum constare di-  
cit: quam ἀφελή, & μονόκωλον ille, nos simplicem & uni-  
membrem uocemus. Verum nō pugno, si quis cola, mem-  
braq; dici malit. Sæpenumero profecto simplex hæc, clas-  
sici in autoribus deprehenditur: præsertim ubi narrant.  
Quare non in epistolis modò, sed & in historia, ijsq;  
in orationis locis, ubi aut narrat, aut argumentis pu-  
gnat orator, sæpius occurret. Siue igitur breuior hæc,  
longiorue existat, diligenter semper dicturis, scriptu-  
risq;, illis respirandi mora, his scripturæ nota distingen-  
da erit: quod si ulla alia, hac maxime re, dilucida per-  
spicuaq; reddatur oratio. Nisi enim his discrimine-  
tur notis, obscura perplexaq; sit, ubi passim impingas,  
necessum est: qualem Herodoti, Thuriij, cæterorumq;  
omnium uetustiorum, temporis uitio fuisse Aristoteles  
tradit.

## De numeris &amp; pedibus in oratione

seruandis.

CAP. XXXII.

**N**Vmeros etiam, pedesq; in oratione, quo magis delectet, seruandos esse autores tradunt. Huius autem rei Isocratem primum doctorem, Thrasimachiq; & Gorgiæ, qui ante eum infelicitè inchoassent, reprehensorem extitisse, Cicero de oratore testatur. Seruandos autem esse uolunt, cum in principio, & medio, tum maxime in fine periodi: ubi moram trahit orator. Aristoteles paucos admittit, heroum nempe, & duos pæonas: quorum alterum, qui ex prima longa, & tribus breuibus constat, ut hoc uerbum, incipite, initijs aptum, alterum, ex tribus primis breuibus, & ultima longa, ut hoc uerbum, domuerant, clausulis accommodatum esse tradidit. Iambum autem, quem uulgarem, & trochæum, quem *ῥεσσαικιστὸς πορ* appellat, minus probat. Noster Cicero, cui & astipulatur Fabius, quemadmodum quos Aristoteles reijcit, pedes admittit, ita & pæonibus, quos ille maxime probauit, alios utiliores esse contendit. Creticum nanq; cum initijs, & clausulis bonum, tum dichoreo, quem & ditrochæum uocamus, optime cludi posse docet. Hinc statim scriptum de oratore ad Quintum fratrem dialogum orditur: Cogitanti mihi sæpenumero, & memoria uetera repetenti, perbeat Quinte frater, illi uideri solent, qui in optima Republica & honoribus, & rerum gestarum gloria florent, eum uitæ cursum tenere potuerunt, ut uel in negotio sine periculo, uel in otio cum in dignitate esse possent. Principium creticus est: finis, cum ultimam Cicero indifferen-

tem haberi uult, ditrochæus: seu trochæus & spondeus. Proxima item periodus à cretico incepta, & ditrochæo est finita. Ac fuit tempus illud, cum mihi quoque initium requiescendi, atque animum ad utriusque nostrum præclara studia referendi, fore iustum, & propè ab omnibus concessum esse arbitrarer: si infinitus fœrensium rerum labor, & ambitionis occupatio, decursu honorũ, etiam ætatis flexu conslitisset. Sed quos quo in loco pedes nosiri locandos esse uoluerint, ostendamus. Scripto ad Quintum fratrem de Oratore dialogo Cicero principijs pedes tribuit heroos, spondcum, pæonem illum, qui ex prima longa, & tribus sequentibus breuibus constat, & creticum. Clausulis autem choreos, hoc est dichoreum, seu ditrochæum, heroos, pæonem alterum, qui ex primis tribus breuibus, ultima longa fiat, & item creticum, qui prima & ultima longis, breuem habet mediam, assignat. Idem autem Cicero de Oratore libro, præter hos ipsos, quibus cludendum esse uoluit, iambum etiam, & tribrachum clausulis, ubi maxime animaduertenterentur, attribuit. Porro Fabius Quintilianus hunc sequutus, nullos non pedes cadere in orationem meo quidem iudicio non male disputat: miraturq; auctores certos quosdam præscripsisse: quasi essent, quos arceri ab oratione oporteret. Nam cum oratio soluta esse debeat, certis astringi pedibus non debet: quod qui ex Græcis facere cœperunt, suo iure sunt derisi. Et ex nostris C. Carbo Tribunus plebis, ut de Oratore testatur Cicero, cum pro concione diceret, sæpiusq; dichoreo uteretur, si repitu clamoreq; à multitudine excitato, est inter

est intorturbatus. Cæterum Fabius, dum omnes pedes in orationem cadere recte quidem docet, hoc ipso mihi peccare uidetur, quòd, cum uideret Ciceronem præcepisse, proximos postremis, unum, aut duos superiores esse spectandos, nec tamen hos indicasse, ipse, qui penultimi essent, certos quosdam præscribere nobis coeperit. Nam penultimos esse quærendos, ultimis, ubi maxime numerus sentiatur liberis, non puto: neque ibi magis seruitutem, quàm hic, cum ipse præsertim nullam admittat, esse oportere. Cum igitur omnes in orationem pedes cadant, nec certis ex his sæpius sit utendum, quod de industria crebro positi, atque iterati, satient & fastidium adferant, nemo profecto in quærendis locandisq; ijs sollicitus erit: quod ultro ipsis, quibus animi sensa explicantur uerbis inclusi, sese nobis, uel nō uocati offerant. Quare, si quod res est fatendum est, inanis propemodum omnis de ijs præceptio est. Nam cum omne uerbum, aut ex longis, & breuibus, aut ex his solis, aut illis constet, fieri non potest, quin uel rudissimi cuiusq; oratio numeros pedesq; habeat. Nec uero hos in Herodoto, qui nullius rei minus, atque huius curam habuit, desideramus. Equidem numerosam orationem esse oportere non negauerim, sed idem dixerim, ijs potius, quorum supra meminimus, & similibus confici: si latinis, proprijs, atque usitatis uerbis constet: si nec consonantium asperos, nec uocalium hiulcos habeat concursus: si non repetitionibus abundet: si non leuiores in contextu grauioribus postponantur, sed ut quæq; res postulet, apte oīa locentur: si non longior breuiorue,

uior'ue, quam conueniat, periodus ducatur: uerbisq;  
nisi asperitas obstet cludatur. Quod si fit, cum uerbis,  
quibus mentis concepta explicamus inclusi numeri sint,  
hoc assequemur, ut nec numerus desideretur, nec re-  
bus cognoscendis intentum auditorem, lectorem'ue  
frustremur.

De figuris, quæ duo in genera, uerborum  
& sententiarum sparguntur.

C A P. XXXIII.

**D**icendum subinde de figuris erit: quibus non modo  
amplificatur oratio, sed & exornatur maxime.  
Schemata autem alia λέξεις esse, hoc est uerborum, alia  
διανοίας. hoc est sententiarum, sensuumq; tum Græcis,  
tum nostris placuisse uideo. Inter hæc autem, hoc discrimi-  
nis Cicero tertio de Oratore, & Aquila Romanus  
esse dicunt, quòd uerborum figura tollatur, ipsa si uerba  
aut mutes, aut aliò transferas: sententiarum uero per-  
maneant, quibuscunq; uerbis uti uelis. Cum igitur schema-  
ta aut in uerbis, aut in sensu consistant, primum de uer-  
borum schematis dicemus: quæ quòd uerbis tantum acci-  
dant, parum corpus orationis extendunt: deinde quæ  
sententiarum sunt subiiciemus: quibus, cum non modò  
oratio augeatur, sed & plurimum exornetur, quòd non  
nisi ex locis fieri iam dudum docetur, quæ quibus ex  
locis sumpta sunt ostendemus. Singula porro ad eos,  
quos supra exposuimus locos, quo magis ipsorum uis  
declaretur exigemus.

De uerborum figuris. C A P. XXXIIII.

Inter

**I**Nter uerborum igitur schemata, maximam gratiam habent, quos Græci *πρόωυς* uocāt. Sunt autem *πρόωυι*. cum nunc uerbi, nunc sermonis natiua propriaq; significatio, in non propriam transfertur.

Huius generis sunt

Μεταφορά,  
Συνεκδοχή.  
Μετωνυμία.  
Μετάληψις.  
Ἀνωνομασία.  
ὀνομασπορεύια.  
Κατὰ χρῆσιν.  
Ἀλληγορία.  
Ἰπερβολή.

**METAPHORA** est, cum uerbi, seu nominis propria significatio, in non propriam transfertur. Fieri autem id autores dicunt, nunc uocabulorum penuria, nunc explicandæ augendæq; rei causa. Penuria dicimus, generosum equum: durum hominem: et in uitibus gemmam: pascere apes: luxuriare, et sitire agrum: gemmare uitem: et equitare eum, qui asino insidet: quæ, et his similia, alijs uerbis reddere non possumus. Explicandæ autem, atque augendæ rei causa, dicimus aliquem ira accensum: lumen eloquentiæ: belli fulmen. Atque hoc genus metaphorarum, quando aliqua ex parte orationem extendit, ex comparisonis seu similitudinis loco sumitur. Siue enim dicas, Cicero est ueluti lumen eloquentiæ, quæ similitudo est: siue est lumen eloquentiæ, idem est. Verum quod breue, contractumq; id sit, et à nostris breuis est similitudo uocata. Sumitur uarie

rie metaphora : à bruto ad hominem : ut si gannire, pro ineptire, & oblatrare, pro aduersari dicas: aut contra, si uulpem, perfidum: & cygnum, canorum appelles. Sumitur & magna cum gratia ab animali, ad inanimatum: ut terris irascitur aër : & ponto nox incubat atra. Aut contra: ut, florida ætas : uiridisq; iuuenta. Ducitur & ab animali ad animal : ut si equum incedere, aut currere, quod hominum est, aut uolare, quod auium est, dicas: & pascere apes. Iam & ab inanimato ad inanimatum: ut si orationem fluere, & odium suppullulascere dicas. Porro summum lumen orationi adfert recte accommodata, plurimumq;, cum oratores, tum poëtæ hac maxime re delectant. Danda autem opera est, ne aut dura, aut longius petita, sordidaq; sit: quali ille est usus, qui Scipionis morte, castratam Rempub. dixit.

SYNECDOCHE est admodum autoribus familiaris tropus, cum pars pro toto accipitur : ut tecta, pro ædificijs. Totum pro parte: ut apud Poëtam: ingens à uertice pontus. Numerus pro numero : ut Romanus prælio uicit, pro Romani: & oratores uisi sumus, de se solo Cicero dixit. Species pro genere : ut pocula Achæloia poëta pro quauis aqua dixit. Genus pro specie : ut ferrum pro gladio. Continens pro contento : ut Roma olim caput rerum, pro Romani. Denique quotiescunq; aliud est ex alio intelligendum.

METONYMIA superiori uicina est, cum inuentorem, pro re inuenta, aut cui præsidet ponimus : ut Bacchum pro uino: Cererem pro frumento : Neptunum pro mari : Martem pro bello.



**METALEPSIS** est, cum à causis efficientibus, effecta indicamus: ut pallida mors. Pallentesq; habitant morbi, tristesq; senectæ. Morbi nanq;, & senectæ, pallentes & tristes reddunt.

**ANTONOMASIA** est, cum breui uerborum circuitione, & descriptione, personam significamus: ut Troiani belli scriptorem, pro Homero, & eloquentiæ principem, pro Cicerone dicamus.

**ONOMATOPEIA** est nominis fictio, nobis non iuxta ac Græcis concessa. Huius generis sunt, mugitus, sibilus, & hinc uerba mugire, sibilare, conficta ex inanimantium uoce. Hunc in modum & personatos, laratos, nummatus, laureatosq; dicimus: quæ quanquam uerbis deducta participia uideantur, tamen unde cantant, uerba desiderantur. Et hoc tempore bellicum instrumentum, bombardam uocamus.

**CATACHRESIS** est uocabuli abusio: ut si hominis uires breues, & longum consilium dicamus. Quin & per hanc figuram, pro uirtutibus uicina uitia accipimus: dum audaciam, fortitudinem: prodigalitatem, liberalitatem dicimus.

**ALLEGORIA** est, cum aliud, quàm uerba præ se ferunt intelligi uolumus: hac, omiſſa altera collationis parte, nunc similitudinem, nunc contrarium significamus. Similitudinem hoc pacto: si canes fungantur officijs luporum, cuius præsidio pecuaria credemus? Huius generis & illa sunt, pedem conferre: pro eo quod est argumentis confutare: & iugulum petere: pro eo quod est firmis argumentis aggredi. Contrarium



autem

autem innuimus, si impium, qui patrem uerberauerit  
Aeneam uocemus, quem in patrem piissimum extitiss  
constat. Verum hoc postremum, Ironiam licet uoces  
quam allegoriæ subijciunt.

MIMHΣIΣ cognata ironiæ est, quando alterius  
uerba, seu gestum imitatur: quod fr̃e deridentes im-  
probantesq; facimus. Hac usus figura Phadria Teren-  
tianus, dum Thaida suam corripit his uerbis.

At ego nesciebam quorsum tu ires: paruula  
Hinc est abrepta: eduxit mater pro sua:  
Soror est dicta: cupio abducere, ut reddam suis.

AENIGMA allegoriæ quoq; adiiciunt. Est nãq;  
perplexa allegoria: atque adeo, nisi suo loco positum,  
omnino uitium.

Dic quibus in terris, & eris mihi magnus Apollo,  
Treis pateat cœli spatium, non amplius ulnas.

HYPERBOLEN tropis attribuunt: qua quæ  
uolumus, nunc attollimus, nunc diminuimus. Hac figura,  
quanquam corpus orationis nonnihil augeatur, tamen  
cum ornatus is in uerbis sit, quibus grauioribus hic,  
quàm ueritas requirat utamur, à tropis non separandam  
putauī. Huius generis sunt: ferit aurea sidera clamor:  
uix osibus hæret: geminiq; munantur in cœlum scopuli.  
Interdum nonnihil uirium ex comparisonis loco sumit:  
ut, Nestoris ab ore sermo melle dulcior fluebat.

ΑΙΞΗΣΙΣ superiori uicina, cum pro proprio, gra-  
uiori uerbo utimur: ut si improbum, latronem: læsum  
uulneratum dicas.

Haftenus de ijs λέξεις figuris, quas τῶπος illi uo-  
cant.

ant : quæ sequuntur, grammatices præcepta sapiunt, unde petendæ sunt. Quod genus sunt, Syncope, Epen-thesis, Aphæresis, Anastrophe, Hyperbaton, Eclypsis, Apopsiopesis. Hypallage item huc pertinet, quæ poëtis permittitur : & est inuersa sententia : ut dare classibus auestros.

ὍΜΟΙΟΤΕΛΕΤΟΝ, quo & ὁμοιοτέλετον, quod in casibus fit accipitur, est quando in similes casus, seu uerba, alias ue uoces desinit oratio: ut perditissima ratio est, amorē petere: pudorem fugere: diligere formam: negligere famam. Hoc exemplo utrunq; docetur, cum in similes casus & uerba desinat oratio.

ἈΣΥΝΔΕΤΟΝ est, quo festinātes utuntur, cum sine cōiunctionibus enuntiatur oratio: ut, Ferte citi flammæ, date tela, impellite remos. Nostri Articulum uocāt.

ΑΝΑΦΟΡΑ est repetitio, quæ ut nunc in principio, nunc in fine, alijs atq; alijs modis fit, ita Græci uaria nomina dantes, tum πλεκῶ, tum παλινλαγίαν, tum ἀπανάληψιν, tum ἀναδιπλωσιν, tum προεπὸςδοσιν, tum ἀντιπροφῶν, tum συμπλεκῶ appellant. Quæ cum parum inter se differant, satis est, quoties aliquid suis de causis repetitur, Anaphoram uocare : ut, Verres calumniatorē oponebat : Verres de causa cognoscebat: Verres pronuntiabat. Item, quis legem tulit? Rullus : quis tribus sortitus est? Rullus : quis decemuiros creauit? Rullus.

De figuris sententiarum, quibusq; ex locis cadant.

C A P. XXXV.

Sententiarum autem schemata sunt, quibus oratio, ueluti corpus, grādescit & splēdescit maxime. Inter  
i      has insi

*has insigne amplificandi lumen descriptio est, quam ὑποῖπνωσις Græci uocant: qua res, omnibus explicatis circumstantijs ita depingitur, ut non narrari, sed geri uideatur. Describuntur autem, tum personæ, quas προσωπογραφίας illi uocant: quales sunt Annibalis apud T. Liuium: Thersitæ, & aliorum principum apud Homerū. Tum loca, quas ὑποχωρογραφίας uocant, si certa sint: ut regionum, urbium, portuum, aliarumq; id genus rerum descriptiones passim apud autores: si uero ficta, ὑποθεσίας: ut Cumæ Sybillæ antrum apud Maronem: & Regia solis apud Nasonem. Tum tempus, quam χρονογραφίαν dicunt illi: qualis est apud Maronem: Vere nouo gelidus, canis cum montibus humor Liquitur, & Zephyro putris se gleba resoluit: Denique describuntur res omnis generis: passimq; autores, copiosa descriptione, res ueluti ob oculos ponunt: ut T. Liuius primo libro, cum & alibi passim, certamen tergeminiū fratrum Horatiorum, & Curiatorum, in medio duorum exercituum confessu pro imperio, summāq; rerum dimicantium: & noster uates Troiæ excidium. Nam cum paucis urbem dolo à Græcis captam explicare Didoni potuisset, equum ligneum describit: Sinonem dolo instructum superinducit: quæ deinde urbis flammæ, quis ruentium ædium, templorumq; fragor, qui irruentium resistentiumq; animi, quæ passim fugientium, morientiumq; species extiterit, pluribus expressit. Sumitur autem ὑποῖπνωσις ex adiunctorum loco. Neque enim aliunde T. Liuius Annibalem nobis describere, quàm cum à corporis, tum animi uirtutibus uitijsq; potuit: nec aliunde*

aliunde regiam solis Naso, quàm ex quibus rebus constaret. Quare personarum, locorum, urbium, factorum, denique omnis generis rerum, præsertim quæ cerni, tan-  
giq; possunt, hoc ex loco, qui omnes complectitur cir-  
cunstancias, descriptiones petuntur. Verum uirtutes, ui-  
tiaq;, quæ cerni oculis nequeunt, à causarum & euento-  
rum loco, nempe ab ijs, quæ in animis hominũ efficiunt,  
cum aliunde non intelligamus, ferè describimus. Vt si iu-  
stitiam describas, quàm hæc uirtus homines in officio re-  
tineat, ne alij alijs suum eripiant, alij alios lædant, plu-  
ribus erit depingendum. Est nanque descriptio, rhetori-  
ca definitio : atque adco per se locus : qui tamen rerum  
copiam sumit ab adiunctis. Hinc Naso inuidiam, & Ma-  
ro liuorem ita descripsit:

*Liuior tabificum malis uenenum:*

*Intactis uorat ossibus medullas.*

Reddit enim tabidos liuior. Quod si uero quæ impen-  
deant, suisq; de causis futura sint diuinemus, & ab euen-  
tis descriptio sumetur : ut illa apud Ciceronẽ, cui & ex-  
primẽdæ rei causa, similitudo est admixta. Quod si istum  
iudices, uestris sententijs liberaueritis, statim, sicut ex ca-  
uea leo missus, aut aliqua teterrima belua, soluta ex ca-  
tenis uolitabit, & uagabitur in foro, acuens dentes mul-  
tos in cuiusq; fortunas : in omnes amicos, atq; inimicos,  
notos atq; ignotos incursans : aliorum famam depecu-  
lans : aliorum caput depugnans : aliorum domum, ac o-  
mnem familiam perfringens : Remp. funditus labefactã.  
Hic quæ euentura incommoda essent, si malum hominẽ  
iuis sententijs liberarent, multis describit uerbis.

INCREMENTVM est, cum grauioribus uerbis, insurgit increfcitq; oratio: ut Facinus est uincire ciuem Romanum: scelus uerberare: paricidium necare: quid dicam in crucem tollere? Id singulis interdum fit uerbis, ut ueni, uidi, uici. Sumitur autem schema hoc ex alijs atque alijs locis. Prius ex definitionis loco ductum est. Sunt nanque conglobatæ definitiones. Posterius ex adiunctorum loco: nempe factis, rebusq; gestis, quæ ijs, de quibus dicitur personis adiacent. Interdum & ex comparationis loco sumitur: ut illud Ciceronis in Verrem. Non enim furem, sed raptorem, non adulterum, sed expugnatorem pudicitiae, non sacrilegum, sed hostem sacrorum religionumq;, non sicarium, sed crudelissimum carnificem ciuium, sociorumq;, in uestrum iudicium aduximus.

CONGRIES, quam συνάρεσις illi uocant, est uerborum, sententiarumq; idem significantium coacervatio: & eadē cum expolitione. Huius rei, hoc nobis ex oratione pro Ligario sit exemplum. Quid enim tuus ille Tubero districtus in acie Pharsalica gladius agebat? cuius latus ille mucro petebat? qui sensus erat armorum tuorum? quæ tua mens? oculi? manus? ardor animi? quid cupiebas? quid optabas? Vno hic in loco, sententiaq; manetur: quæ alijs atq; alijs, idem ualentibus uerbis inculcatur. Sumitur autem sæpius ex adiunctorum loco: sed & ab alijs potest.

SENTENTIA etiam, quam γνώμη illi uocant, ornatur oratio. Vt amicitia est, idem nolle, & idem uelle. Mors miseria nulla est, sed ad mortem aditus. Sumptæ hæ sunt

hæ sunt ex definitionis loco : sed & ex alijs possunt. A causarum & euentorum loco illud est. Obsequium amicos, ueritas odium parit.

ACCLAMATIO, quam ἐπιφώνημα uocant illi, est qua amplificamus, dictorum clausula quædam breuis, superiori figuræ omnino uicina : ut, Tantæ molis erat Romanam condere gentem. Adeo in teneris assuescere multum est.

AETIOLOGIA est dictorum ratio, causaq; subiecta : ut si postquam dixeris, pauciores id temporis mathemata sequi, causam subijcias, non posse fieri, ut ea in re sibi quisquam elaborandum putet, cui nec honorẽ, nec præmia satis digna constituta esse intelligat. Sumitur, quod & ipsa uis uerbi dictat, à causarum loco.

DISTRIBUTIO, quæ ab illis μερισμός dicitur, est qua & mire augetur exornaturq; oratio, cum summam rei, totumq; in partes dispartimus : ut Tota ciuitas euersa est : deiecta mœnia : portarum turriumq; ruina impleta fossæ : ciuium tecta, deorumq; templa, partim flamma absumpta, partim manu subuersa, atque disiecta : deniq; omnia publica, priuataq; solo sunt æquata. Item totus monstrum est : os, humeri, uenter, manus, pedes : & cætera. Sumitur distributio à partium enumeratione, atque adeo ab adiunctis.

GRADATIO est, quæ ab illis κλίμαξ dicitur, cum à uerbis in uerba subinde grauiora ascendit oratio : ut Africano industria uirtutem, uirtus gloriam, gloria æmulos comparauit. Torua leana lupum sequitur : lupus ipse capellam. Item quæ reliqua spes libertatis ma-



net, si illis, & quod audent, & quod libet, licet, & quod licet, possunt, & quod possunt, audent, & quod audent, faciunt, & quod faciunt vobis molestum non est? Sumitur ferè ab adiunctis, & euentis : quod ipsum, & his declaratur exemplis.

CONTRARIUM, quam & contentionem nos, illi ἀντιθέτης uocant est, cum pugnantibus inter se rebus dilatatur oratio : ut, In otio tumultuarius, in tumultu solus es otiosus : in re frigidissima cales, in feruentissima friges : tacito cum opus est, clamas : cum loqui opus est, obmutescis : ades, abesse uis : abes, reuerti cupis : in pace bellum queritas, in bello pacem desideras : in concione de uirtute loqueris, in prælio per ignauiam tubæ sonitum perferre non potes. Quo autem ex loco ducatur ipsa uox indicat.

INVERSIO est, cum quæ contra nos adferuntur, pro nobis facere docemus : ut si alter Germanos parum religioni deditos disputet, quod in hac multa mutari uelint : alter autem, hoc ipso maxime pios esse contendat, quod abusum tolli uelint. A contrariorum hæc sumitur loco.

CORRECTIO est, quam illi ἐπανόρθωσις uocant, quæ quod dictum est tollit, atque aliud pro eo idoneum magis reponit : ut, si ille ab amicis petisset, quid dico petisset ? saltem fortunam suam indicasset, suis rebus optime consulisset. Sumitur autem ab adiunctis, nempe rerum circumstantia.

PARENTHESIS quoq; nulli non nota, augget aliqua ex parte orationem, dum periodis inseritur.

Sumit

Sumitur item ab adiunctis.

**ΔΙΑΣΥΡΜΟΣ** eleuatio est, qua grauiora in nos allata argumēta, quæ diluere labor est, eleuamus & contemnimus : nihil attinere ad ea respondere, quæ nihil ad rem facerent. Eleuanda autem res est ab adiunctis, à contrarijs, alijsq; ex locis.

**PRAETERITIO** παράλειψις ab illis dicta, cum dicimus nos præterire ea, quæ maxime dicimus : Vt non dico quàm fœde à puero uitam institueris : quàm parentes uerberaueris : quàm omnibus bonis posthabitis studijs, turpiſſimas quasque corporis uoluptates secutus sis. Sumitur schema, dum hominum facta insectamur, ab adiunctis.

**OCCVPATIO** illis προκατάληψις est, cum tacite obiectioni occurrimus : eaq; quæ obijci possent, præuenientes diluimus. Sæpius hac autores utuntur : & Cicero usus est in Pompeiana, cum aliàs passim, postquam à L. Lucullo Mithridatem regno pulsum dixisset, ne bellum, quod maximum uideri uoluit, cuiq; summum ducem Cn. Pompeium præfici uoluit, elcuasse uideretur, subiicit. Requiretur fortasse, quemadmodum, cum hæc ita sint, reliquum possit esse magnum bellum : & quæ sequuntur. Sumitur à causæ personarumq; circumstantia : hoc est ab adiunctis.

**CONCESSIO** est, qua aliquid concedimus, quo ea, quæ uolumus, magis aut impugnemus, aut recte facta defendamus. Cicero quidem concessit Milonem interfecisse Clodium, sed iure fecisse idem pluribus edocuit. Sumitur ut superior, ab adiunctis.

**COMPARATIO** grauiſſimum amplificandi lumen eſt. Quid enim comparatione non ſplendescit, increſcitq; plurimum? Totam ſerè pro Marcello orationem, hinc inſtructam eſſe diximus. Quantam autem & pro Muræna hinc copiam ſumpſit orator, iuriſſprudentiam cum re militari conferendo, argumento eſt ipſa oratio. Cum autem locus ſit, ſupra quæ hinc augendi ratio ſit, ſatis oſtendimus. Verum animaduertendum eſt, nunc ad exornandum ſolum, nunc ad probandum nos collationibus uti.

**SIMILITUDO** itidem ut comparatio, nunc ornandi ſolum, nunc confirmandi cauſa adhibetur: unde & exempla cadunt, quibus eodem pacto res, modò illuſtramus exornamusq; , modò ueriſimiliores probabilioresq; reddimus.

**PROSOPOPEIA** eſt, cum modo deſunctis excitatis, modo patriæ rebusq; inanimatis perſonā, orationemq; tribuimus: grauiſſimum ſchema, & ad ornandum, & ad commouendum. Cicero Patriam in Catilinam loquentem introduxit. Maro Famæ perſonam, uerbaq; Naſo ſuo de triſtibus libello tribuit. Sumitur autem ab adiunctis.

**INTERROGATIO** Græcis ἐρωτημα, non ſimplex ſchema eſt, orationemq; auget, ſed cum inſtandi cauſa plures conglobatæ admouētur: quale illud: Quid enim tuus ille Tubero diſtriſtus in acie Pharſalica gladius agebat? cuius latus ille mucro petebat? qui ſenſus erat armorum tuorum? quæ tua mens? Materiam ſumit ab adiunctis.

**EXCLAMATIO** est, quæ Græcis ἐκφώνησις, qua animi nostri dolorem indignationemq; significamus : qualis illa Ciceronis in Catilinam : O tempora : o mores : Senatus hoc intelligit : Consul uidet : hic tamen uiuit. Et hoc schema ab adiunctis res mutuatur.

**SUBIECTIO** est, quando quod obijci nobis potest, ipsi quærimus, & statim id subijcimus diluimusq; : quale illud est: Quid me facere conueniret, cum à tanta Gallorum multitudine circūfederer? an dimicarem? at cū parua manu tum prodiremus, locum quoq; inimiciſſimū habebamus. Sederem in castris? at neq; subsidium quod expectarem, habebamus, neq; erat quo uitam producere-mus. Castra relinquerem? at obsidebantur. Vitam militum negligerem? at eos uidebar accepisse ea conditio-ne, ut quoad possem incolumes patriæ & parentibus cōseruarem. Hostium conditionem repudiarem? at salus antiquior est militum, quàm impedimentorum. Prædicat hoc schema Cicero, ut quod multum acrimoniæ, & gra-uitatis ad exornandum adferat. Sumitur autem à rerum circumstantia : hoc est ab adiunctis.

**APOSTROPHE** est, cum ab eo, apud quem dicimus, ad alium orationem conuertimus : ita Cicero à Cæsare ad Tiberonem conuertit orationem. Habes igitur Tubero quod est accusatori maxime optandum, conſitentem reum : sed tamen hoc ita conſitentem, se in ea parte fuisse, qua te Tubero, qua uirū omni laude dignū patrem tuum. Materiam item ab adiunctis sumit. Inter-dum simplex est, parumq; orationem extendit.

**PROPOSITIO**, quanquā Cicero inter sentē-  
i 5 tiarum

tiarum figuras locet, schema non est. Neque enim quicquam exornat, sed quid dicetur, auditorem seu lectorem breuiter docet. Reddimus autem nobis attentos, & dociles, summam rei paucis proponendo. Quare non rhetores modò, sed & poëtae principio summam euentorū, quæ pluribus exposituri sunt, uel antequam causas explicant, paucis proponunt. Verum & toto orationis corpore, sæpe aliquid proponendum est. Titus Liuius passim serè, rerum gestarum euentorumq; summam, breuiter proponit. Quare hoc assequitur, ut semper rerum cognoscendarum quadam uoluptate, in legendo lectorem retineat.

TRANSITIO est, cum quid dixerimus, & subinde dicturi sumus, breuiter indicamus: ut, Satis mihi multa uerba fecisse uideor, quare hoc bellum esset genere ipso necessarium: magnitudine periculosum: restat, ut de Imperatore ad id bellum deligendo, ac tantis rebus præficiendo dicendum esse uideatur. De hac autem idem, quod de propositione iudico.

EGRESSIO, quam modò excursus, modò digressionem uocant, Græci παρ'εξβασις, mirum in modum orationem extendit. Est autem egressio autore Fabio, alienæ rei, sed ad utilitatem causæ pertinentis, extra ordinem excurrens tractatio. Excurrimus autem, nunc in personarum laudem: qualem Cn. Pompei pro L. Cornelio Balbo Cicronis oratio continet: nunc locorum, atque regionum, ut Siciliae apud eundem in Verrinis prædicatio. Denique in laudem omnis generis rerum digredimur. Pro Archia poëta Cicero, in commédationem studiorum

studiorum humanitatis, à causa est digressus. Nec in harum rerum laudem modò, sed & uituperium excursus adhibetur. Sæpe præterea adhibetur aut ornandi, aut delectandi, aut præparandi causa: ut illa T. Liuij de Lucumonis Tarquinij Romani commigrantis Patria, atque fortuna egressio, altiusq; petita oratio. Sumitur autem ex adiunctorum loco: qui omnium horum, personarum, rerumq; ab ijs gestarum, temporum præterea, locorumq; describendorum nos admonet. Verum cum & in locos communes excurramus, ne quis hos diuersos ab ijs, quos suprâ explicuimus, quibus ut omnia, simul & hi continentur, qui sint, & unde cadant dicendum est.

Quid loci communes, & unde cadant.

C A P.

X X X V I.

**I**N locos communes digredientes, mirum in modum orationem locupletamus. Aphthonius locum communem his definit uerbis: κοινός δὲ τόπος, λόγῳ αὐξήτις κὸς τῶν προσόντων τινὶ καλῶν ἢ κακῶν, hoc est, communis locus oratio est amplificatoria, existentium alicui bonorum, aut malorum. Dicit autem ita, idem subiicit, quòd communes omnibus sint eodem in negotio uersantibus. Si quidem in proditorem, sermo omnibus idem, eam agentibus causam conuenit. Bona igitur & mala, quæ hominibus adiacent, ut iustitia, prudentia, temperantia, fortitudo, innocentia, constantia, magnanimitas, misericordia, humanitas, pietas, clementia, luxuria, superbia, petulantia, ebrietas, ignauia, crapula, periurium, paricidium, proditio, cædes, perfidia, adulterium, sacrilegium

gium, aliaq; id genus innumerata, communes loci sunt. In his autem omnibus, & similibus, nihil dubij est. Nemo enim est, qui non uirtutes laudandas, & contra uitia uituperanda putet. Sunt & nonnulli controuersi, minusq; certi: ut testimonia, rumores, quaestiones, misericordia. Nam alter testimonijs, rumoribus, quaestionibusq; standum, alter nullam ijs fidem habendam esse disputet. Alter iudicem misericordia moueri oportere, alter in iudice misericordiae locum nullum putandum esse contendat: ut quem non ex affectu, sed lege agere conueniat. Cicero ad Herennium, item de inuentione, cuiusque causae propria argumenta proprios locos uocat: quae uero in omnes alias eiusdem generis causas, aut plerasque transferri possunt, communiâque sunt, communes locos secundo de inuentione libro his uerbis appellat: Omni autem in causa, pars argumentorum est adiuncta ei causae solum; quae dicitur: & ab ipsa ita ducta, ut ab ea separatim in omnes eiusdem generis causas transferri non satis commode possit. Pars autem est peruagatior: & aut in omnes eiusdem generis, aut in plerasque causas accommodata. Haec ergo argumenta, quae transferri in multas causas possunt, locos communes nominamus. Nam locus communis, aut certae rei quandam continet amplificationem, ut si quis hoc uelit ostendere, eum, qui parentem necarit, maximo supplicio esse dignum: quo loco, nisi perorata & probata causa, non est utendum. Aut dubiae, quae ex contrario quoque habeat probabiles rationes argumentandi: ut suspicionibus, credi oportere, & contra suspicionibus



spitionibus credi non oportere. Hic orator, non solum quid sit, sed & quando utendum docet. Idem hac de re, in eandem sententiam tertio de Oratore his uerbis differit. Consequentur etiam illi loci, qui quanquam proprij causarum, & inherentes in ipsorum nervis esse debent, tamen, quia de uniuersa re tractari solent, communes à ueteribus nominati sunt: quorum partim habent uitiorum acrem quandam cum amplificatione accusationem: aut querelam: contra quam dici nihil solet, nec potest: ut in depeculatorem: in proditorem: in paricidam: quibus uti confirmatis criminibus oportet: aliter enim ieiuni sunt, atque inanes. Alij autem habent deprecationem, aut miserationem: alij uero ancipites disputationes: in quibus de uniuerso genere, in utranq; partem differi copiose licet. Hactenus ille. Aphthonio igitur definitore, loci communes sunt adiuncta homini bona & mala: Cicerone uero, qui paulo latioribus uidetur circumscripsisse terminis, argumenta quædam causis inherencia, atque adeo aliquibus de rebus quædam hominum animis acceptæ opinioniones, persuasionesq;: quæ in omnes eiusdem generis causas, aut plerasque transferri possint: & modò omnino certæ, indubitæq;, modò ancipites, dubiæq; existant. De certis autem, dubijsq; iam dictum est. Sunt porrò omnes hi, philosophici loci: atque adeo citra certarum personarum complexum, infinitæ theses: dandaq; opera est, ut earum rerum, in quas digrediendo amplificamus, non uulgarem cognitionem habeamus. Neque enim de iustitia, temperantia, luxuria, inuidia, cæterisq; id genus rebus, is probabiliter

probabiliter dicet, qui quantum in animis hominum hi affectus, habitusq; ualeant, minus compertum habeat. Cum igitur loci communes personis, earumq; rerum de quibus agitur, quasi neruis adhæreant, nemo dubitet, omnes hos ex uno illo, quem supra explicuimus adiunctorum loco cadere: qui omnium horum, quæ rebus, de quibus dicitur, scribitur uel, adiuncta sunt, nos admonet. Hæc de figuris, & ornamentis orationis: quæ quibus ex locis sumantur, obiter indicauimus: quod, dum de amplificatione usuq; locorum scribimus, faciundum esse putauimus: & hoc quidem magis, quod Cicero, scripto ad filium de partitione oratoria dialogo, ubi de peroratione disputat, hæc rerum ornamenta amplificationesq;, & ex illis ipsis, unde argumenta ducuntur locis, sumenda esse, non tam commonstrauit, quam præcepit. Adhibentur autem, non modò ad amplificandum, illustrandumq;, sed & sæpe ad faciendam fidem, motusq; animorum concitandos. Sed affectus, quanquam hac ipsa rerum amplificatione concitentur maxime, seorsum tamen de ijs paucis nobis dicendum est.

Quid affectus, quot genera, & unde ducatur.

C A P.

X X X V I I.

CVM in eloquutione, tria potissimum oratori præstanda sint, ut doceat, delectet, & moueat, & de duobus primis dixerimus, de motu ut paucis dicamus restat. Quanquam ijs ipsis, de quibus diximus, dilucidata, numerosa, figurisq; exornata oratione hoc ipsum, motus ut animis adferatur, assequamur maxime. Quem enim miserabilium, indignarum, turpium, superbarumq; rerum

rerum, atque similium, perspicua copiosaq; de scriptio non commoueat? quem non similitudines ducant? quò non egressiones, comparationes, ipsæ denique pro= sopopœia, quocunque modo incumbant, animos im= pellant? Quæ, quanquam ita sint, dicendum tamen breuiter, quid affectus sit, quot genera, & unde du= catur. Affectus igitur meo iudicio dici potest, animi mo= tus ad iram, inuidiam, odium, metum, commiseratio= nem, cæterasq; id genus animorum affectiones. Irasci= mur autem offensi contemnentibus, iniuriaq; afficienti= bus aut nos, aut eos, quibus id fieri indignum putamus. Itaque iudices, partium contumacia, arrogantia, se= curitateq; dum se contemni putant, offenduntur ma= xime. Huic contrarius affectus est mansuetudo: qua amabiles nostros mores, quibus nihil inest turbulenti, ijs significamus, quos aut inuitos offendisse, aut fa= cti sui pœnitere, aut denique irascentibus humiles ces= sisse, locumq; dedisse intelligimus. Inuidemus autem fortunatioribus, & maxime equalibus, opes, honores, magnorumq; gratiam consequentibus: quorum de for= tuna dolemus. Huic contrarius affectus est fauor. Nam ut inuidia animi dolor est ex aliena felicitate, ita fauor eadem ex re animi gaudium est, atque uoluptas. Odium autem, ex turpitudine nascitur. Nam turpes, impro= bos, sceleratos, denique omnis generis uitia, atque ma= lè facta odimus. Odio rursus amor repugnat. Metui= mus autem, atque timemus, aut nobis, aut nobis maxi= me charis impendentia mala: nempe potentium iram: iniustorumq; omnium, quos & uelle, & posse nocere uidemus

uidemus. Timori contrarius affectus est fiducia. Commiseratio, præcipuus hic, plurimumq; in bonorum hominum animis ualens affectus est. Nascitur autem ex aliorum infortunijs, calamitatibusq; : quos maxime indigna pati arbitramur. Huius rei secundus Aeneidos liber exemplum esse potest. Quem non moueat dolis instructum Simonem Priamo, & grandæuo, & regi tam miserè imposuisse? qui hosti, unde sibi urbiq; perniciës struebatur, non modo pepercit, sed & insuper misericordia motus addidit,

Quisquis es, amissos hinc iam obliuiscere Graios,  
Noster eris.

Cui non Anchisæ senis, principisq; uiri oratio lachrymas excutiat, suis quidem, dum salutis rationem haberent fugam consulentis, suam uero ipsius uitam negligētis?

—Vos ò, quibus integer æui

Sanguis ait, solidæq; suo stant robore uires,

Vos agitate fugam—

Me si Coelicolæ uoluissent ducere uitam,

Has mihi seruassent sedes : satis una, superq;

Vidimus excidia, & captæ superauimus urbi.

Sic ò, sic positum affati discedite corpus:

Ipse manu mortem inueniam : miserebitur hostis:

Exuiasq; petet : facilis iactura sepulchri est.

Iam pridem inuisus diuis, & inutilis annos

Demoror, ex quo me diuûm pater, atq; hominum rex

Fulminis afflauit uentis : & contigit igni.

Sed plena sunt omnia affectibus, & commiseratione  
digna

digna. Porro affectuum duo genera sunt: alterum *πάθος* illi alterum *ἔθος* uocant: illud uehemens, concitatum, rapidumq; hoc lene, mansuetum, atq; amicabile: illo uehementer commouemur, hoc persuademur: illo impellimur, hoc inducimur. Huius postremi generis est epistola Penelopes apud Ouidium ad coniugem suum Vlysem. Tota nanq; *ἡθικὴ* est: ut qua beneuolum, mansuetumq; pudicæ coniugis ingenium, cui nihil turbulenti inest, fidesq; erga maritum depingitur. Superioris autem generis, apud eundem Poëtam Phillidis ad Demophoontem epistola est: quæ tota est pathetica. Concitatum nanq;, atq; amoris impatientissimum ingenium feminae, non modo conuitiantis, infamantisq;, sed & suam ipsius uitam, modo ueneno, modo laqueo, modo undis finire uolentis introducit. Ducuntur autem affectus, ex illis ipsis, quos supra exposuimus locis: unde ad fidem argumenta sumuntur. Neque enim potest fieri, quod & ipsum, cum Fabius, tum Cicero non uno in loco sentit, ut aliunde motum, quàm unde fidem, hominum animis adferas. Huius rei uel una illa Penelopes epistola nobis sit exemplum: ubi, postquam proposuisset, statim ex adiunctorum loco affectus mouet.

Troia iacet certe, Danaïs inuisa puellis:

Vix Priamus tanti, totaq; Troia fuit.

Deinde à causis & euentis, cōiugis animum commouet:

O' utinam tunc cum Lacedæmona classe petebat.

Obrutus insanis esset adulter aquis.

Non ego deserto iacuissem frigida lecto:

Nec quereretur tardos ire relictæ dies.

k

Nec

Nec mihi quærenti spatiosam fallere noctem,

Lassaret uiduas pendula tela manus.

Qui sequitur affectus, ex definitionis loco petitus est.

Quando ego non timui grauiora pericula ueris?

Res est solliciti, plena timoris amor.

Quin & ex comparationis loco coniugis animū mouit.

Diruta sunt alijs, uni mihi Pergama restant:

Incola captiuo, quæ boue uictor arat. & cætera.

Postquā enim euersa Troia Græcorum principes omnes rediisse, & nymphas dijs immortalibus gratias agere, resq; gestas à suis maritis cognoscere dixisset, mire sui commiserationem hac collatione mouit subiiciendo, cæteris omnibus quidem euersa, sibi uero soli Pergama restare: & uictorem uirum abesse. Hunc in modum non hic modò, sed & in omni scripto, atq; oratione, ex illis ipsis, unde ad fidem argumenta, & affectus sumuntur. Porro poëta, historici, oratores, omnis deniq; generis autores mire affectus mouent, copiosa omnibus explicatis circumstantijs, quas personarum negotiorumq; attributa Cicero uocat, rerum miseratione dignarum descriptione: cuius rei, secundus Aeneidos nobis exemplo esse liber potest. Sunt autem circumstantiæ, quis, quid, ubi, quando, quomodo, quamobrem, hoc est, persona, res, locus, tempus, modus, causa. Græci has περιστασεις propterea uocant, quòd personis, seu rebus, de quibus agitur, quasi circumstant. Vt si facta cædes, sit quemadmodum non sine loco, & tempore, ita ne sine percussore quidem fieri potuit. Percussor igitur, locus, tempusq; , quod interfectum quasi circumstant,

cunstant, circumstantiæ sunt: & præterea quo ordine, modoq; res sit gesta: tum causa, consiliumq; interficiendi, quod in percussore spectatur, huc pertinet. Has ergo circumstantias, si copiose omnes in persona, ut ætas, forma, ualetudo, fortuna, habitus, uox morientis, aliq; id genus: in loco: planus an montanus, celebris an desertus, publicus an ipsius, sacer an prophanus atq; his similia, hic, & in cæteris persequaris, mire affectus mouebis. Omnes autem circumstantias, unus ad iunctorum locus complectitur: quanquam modum, & causas, ad causarum euentorumq; locum referas: qui tamen, quemadmodum ab adiunctis nascatur, supra ostendimus. Recte Cicero de inuentione præcipit, locis communibus sternendam uiam esse ad affectus mouendos: atq; ijs, antè, quàm ad commouendum descendamus esse utendum. Nam cum θεῖς, nullam rem certam, definitamq; significet, non perinde animum hominis moucat, atque ὑπόθεσις, quæ res personasq; certas oculis subiicit. Quare communibus inductis locis, recte auditoris animum ad misericordiam nobis præparamus. Vt si de cæde facta commouendi hominum animi sunt, commode de uita humana, qui locus communis est, antè dixeris, quàm uarijs hæc fortunæ casibus, improborumq; hominum telis sit obnoxia: deinde de certo homine, quàm miserabiliter sit oppressus, dicere incipias. Hæc de ipsa exornandi ratione: quæ quidem satis esse possent. Diximus enim, quibus præstetur, ut doceamus, delectemur, & motum animis adferamus. Verum cum non quæuis causa omnem amplificationem,



exornationemq; requirat, gradusq; hic ab autoribus scrutati sint, dicendum nobis breuiter crit, de dicendi generibus: ut cognito, qui quibus, & quo in genere magis rhetoricati sint, nos de ijs, & melius iudicemus, & felicius imitemur.

De tribus dicendi generibus: & qui quo in genere autores uersentur.

C A P. XXXVIII.

**T**Ria uero dicendi genera sunt: humile, quod & subtile, mediocre seu floridum, sublime, quod & graue, atque grande uocant. Humile genus, oratio est pura, latina, & quotidiano sermoni proxima: nulli, nisi breuiter dilucideq; explicandæ rei deseruiens: nullisq;, nisi in uulgari usu positis ornata figuris. Quare hoc in genere, nullæ descriptiones: nullæ comparationes similitudinesque, nisi breuissimæ: nullæ omnino prosopopœiæ: nusquam excursus: lociq; communes: denique nihil earum figurarum, quibus oratio extendi exornariq; solet. Hoc in genere uersantur Ciceronis officia: eiusdemq; epistolæ: quanquam inter has, nonnullas exornatiores deprehendas. Terentianæ comœdiæ. Fabiana item, Ciceronianaq; de rhetorica præcepta. Iam & Caesaris Sallustijq; historiæ: quanquam hi pleniores uideri possunt: hic in exordijs concioribusq;, ille toto quidem orationis corpore: ut qui passim sui similis est. Nam quanquam rerum à se gestarum historias propterea commentarios inscripserit, ut qui uellent post se magis extenderent, exornarentq;, ita tamen omnia enarrauit, ut nihil ferè auxisse, sed parum omisisse

omississe uideri possit. Quandoquidem à causis, consilijs, loco, tempore, reliquisq; id genus circumstantijs, tum breuibus regionum, locorumq; descriptionibus, habitarumq; orationum capitibus, & rerum ponderibus ita narrationem locupletauit, ut quidem transcurrisse, sed omnem tamen rem ostendisse intelligatur. Huc & Maronis Bucolica, deniq; narrationes, confirmationes, confutationesq; pleraq; pertinent.

Mediocre genus est, ubi oratio copiosior, sententijs figurisq; ornatior instruitur, quam uulgaris loquendi usus requirat. Hoc in genere Maronis Georgica ponenda sunt: ubi rusticandi præcepta quæ dedit, ita uerborum rerumq; ornamentis illustrauit, ut legendi cognoscendiq; tedium omne sustulisse uideatur. Hoc item in genere & Ciceronis pleraque omnia de philosophia scripta uersantur: & nonnullæ orationes: ubi non omni amplificandi genere exarsit: qualis, ut & ipse testatur, pro lege Manilia oratio est. Præterea huius generis Ouidianæ epistolæ sunt: & eiusdem uatis pleraq; omnia: & Titi Liuij decades. Nam hic plus cæteris, consilia, causas, euenta, similitudines, comparationes, digressiones, descriptiones, loci, temporis, aliarumque rerum circumstantias, concionesq; crebriores, copiosioresq; admiscendo, historiam suam exornauit. Atqui hic tamen ita se gerit, ut historicum se meminisse uideri possit: cuius officium est, res gestas dilucide, & quanta fieri potest cum delectatione enarrare: non facta ubique mora, omni amplificandi genere exardere. Itaque & in concionibus, argumentis

est densior, quàm rerum ornamentis copiosior. Cuius rei, cum & pleræque aliæ, tum Q. Fabij Maximi de Pu. Scipionis in Africam traiectione oratio, nobis argumento esse potest.

Sublime genus, quo pedem figentes, omni uerborum rerumq; copia utimur: quo uerbis translatis, superlatis, denique omni ad fidem, motumq; animorum figurarum, amplificandiq; genere, orationem nostram exornamus. Hoc in genere pleræque Ciceronis orationes sunt constitutæ. Quanquam nulla ferè oratio sit, ubi non speciem aliquam, præsertim in narrationibus, & confirmationibus, mediocris, & interim subtilis illius generis deprehendas. Versantur & in sublimi caractere Vergilius noster, & Homerus. Verum apud hos, non modò graue illud, & sublime, sed & modò mediocris, modò subtilis illius generis uestigia reperiās. Nam modò breues, modò mediocres, modo graues atque sublimes conspiciuntur: ut iure hos in omni genere eloquentiæ clarissimos extitisse dicamus. Grauis huius, & sublimis generis, eiusmodi apud Ciceronem exemplum est. Nam quis est uestrum iudices, qui satis idoneam possit in eum pœnam excogitare, qui prodere hostibus patriam cogitauit? quod maleficium cum hoc scelere comparari? quod huic maleficio dignum supplicium potest inueniri? In ijs qui uiolasent ingenuam, matremfamuliās constuprassent, pulsassent aliquem, aut postremo necassent, maxima supplicia maiores nostri consumpserunt, huic truculentissimo ac nefario facinori singularem pœnam non reliquerunt?

Atque

Atque in alijs maleficijs ad singulos, aut ad paucos ex alieno peccato iniuria peruenit, huius sceleris qui sunt affines, uno consilio uniuersis ciuibus atrocissimas calamitates machinantur. O feros animos: O crudeles cogitationes: O derelictos ab humanitate homines. Quid agere ausi sunt, aut cogitare potuerunt? Quo pacto hostes reuulsis maiorum sepulchris, deiectis mœnibus, ouantes irruerent in ciuitatem? quomodo deum spoliatis templis, optimatibus trucidatis, alijs arreptis in seruitutem, matribus familiâs, & ingenuis sub hostilem libidinem subiectis, urbs acerbissimo concidat incendio conflagrata? qui se non putant id quod uoluerint ad exitum perduxisse, nisi sanctissimæ patriæ miserandum scelerati uiderint cinerem. Nequeo uerbis consequi iudices indignitatem rei: sed negligentius id fero, quia uos mei non indigetis. Vester enim uos animus amantissimus Reipub. facile edocet, ut eum qui fortunas omnium uoluerit prodere, præcipitem perturbetis ex ea ciuitate, quam iste spurcissimorum hostium dominatu nefario uoluit obruere. Hinc porrò, quæ huius generis uis, copiaq; sit, cognosci potest. Non autem committendum, ut si res priuata, leuisq; sit, omni figurarum affectuumq; genere exardescamus. Sublime nanque genus, leuia priuataq; ferè respuit: maiora grauioraq; se digna putat. Homerus tria hæc genera tribus in principibus nobis proposuit, Menelao breue, Nestori medium, Vlyssi sublime assignans. Verum & inter hæc rursum, media esse animaduertendum est. Inuenitur enim sæpe, quod inter tenue & mediocre, & inter

hoc rursum, & sublime, medium cursum seruet: quod is animaduertet facile, qui locorum usum, & amplificandi rationem tenet.

De actione & memoria. CAP. XXXIX.

**S**cripturis nobis de locis, & amplificatione oratoria, ipsa præscripsit ratio, quinque illas rhetorices partes, inuentionem, dispositionem, eloquutionem, actionem & memoriam breuiter simul esse explicandas. Nam communibus illis dialecticorum rhetorumq; locis explicatis, non solum quæ inde amplificandi augendiq; ratio esset, quod quemadmodum in laude, & in reliquis subinde generibus sumus ostensuri, indicandum erat, sed & ut copiose inuenta disponenda, atq; ita figuris exornanda essent, ut siue ad dicendum uenias, siue ad scribendum te conseras, docere, delectare, & commouere possis. Itaq; cum de tribus prioribus, quæ præcipuæ sunt diximus, de reliquis duabus, dicenti modo necessarijs, actione & memoria, subinde dicendum erit. Decora igitur actio, pronuntiatioq; quarum illa in gestu, hæc in uoce posita atq; eadem est, res dicenti tam necessaria, ut nonnulli clari homines palmam huic dederint. Nec hercle immerito: quid enim copiose inuenisse, beneq; disposuisse, tum nullis non figuris exornasse profuerit, nisi decens, rebusq; accommodata actio, pronuntiatioq; hæc commendet omnia? Verum cum foro, ubi regnare solebat, iam explosa sit eloquentia, & ne illi quidem omnes, qui tum foro probabantur, nostris id temporis placere gestus possint, prudenti consilio, pro loco, & tempore causæq; & auditorum respectu moderanda hæc erunt omnia.

omnia. Nusquam gentium à ueteribus pedum suppletionem acceptam esse puto: & in brachiorum iactu, plus apud Italos, quàm Germanos dicturis pmittitur. Quare hac de re in præsentia, nihil mihi præterea præcipiendum uidetur, quàm ut quisque, antequam ad dicendum prodeat, diligenter secum expendat, quæ actio, pronuntiatioq; conueniat: ne quid secus, quàm caussa & locus postulet, indecore fiat. Hoc uitij. forte à circulatoribus acceptum, quis deum immortalem non suo iure rideat, nonnullos hoc tempore, non tam dicere quàm canere? Huius rei, adeo non apud Romanos, autoresq; ullū uestigium reperiās, ut Iulius Cæsar, ne carmen quidem canendum, nedum prosam orationem putaret: diceretq;, si legis cantas, si cantas peccas. Nam quos à canente minime, à legente numeros, temporaq; accipias commode. De memoria quid dicemus? qua qui caret, ut ad nullam penè rem, ita ne ad dicendum quidem erit accommodatus. Iuuari tamen arte & hanc posse autores uoluerunt: si per loca, & quædam simulachra, aliaq; id genus signa animis impressa, rerum recordaremur. Quæ in reminiscendis rebus, ut fortasse aliqua ex parte memoriam iuuerunt, ita qui hac ipsa ratione singula uerba in memoriam reducere conati sunt, quod nonnulli Græci fecerunt, duplici cura ipsam onerarunt.

Diligens ad rem cogitatio, exercitatioq;, si qua res alia,  
plurimum certe  
hanc iuuabit.

## GERARDI BV

KOLDIANI DE INVENTIONE & Amplificatione Oratoria  
Liber Tertius.

Quid genus suasorium, & qui hoc in  
genere uersantur.

CAP. I.



OST QVAM cōmunes illos diale-  
cticorum rhetorumq; locos explicui-  
mus, quæ inde in genere demonstratiuo  
inueniendi, & amplificandi, deinde co-  
piose inuenta disponendi, tū omnia hæc  
figuris illustrādi, augendiq;, posiremo memoriter pro-  
nuntiandi ratio esset, ostendimus: idem & in suasorio  
hoc genere seruādus est ordo: ut patefiat, & hic in sua-  
dendo omnia, siue ad fidem breuiter, siue ad copiam, af-  
fectusq; mouendos adhibeantur, eisdem illis ex locis su-  
mi oportere. Suasorium genus, quod *ῥητορικὸν* illi, nos  
& deliberatiuum appellamus, esse diximus, quo ea, quæ  
futura sunt, cupimusq; seu nolumus fieri, suademus aut  
dissuademus. Versamur & hoc in genere, dum petimus,  
hortamur, dehortamur, consolamur, admonemus, eaq;  
docemus, quæ perplexiora argumentis confirmanda  
sunt. Nam reliqua, quæ certa non tam fidem, quàm ex-  
positionem desiderant, superioris generis sunt. Itaque  
Ciceronis de philosophia scripta, ubi res probationibus  
agitur, huius potius quàm superioris generis, qui cum  
multum commune habere suasorium hoc supra diximus,  
uideri possunt. Quin & Ciceronis nonnullæ orationes,  
& epi



et epistolæ propemodum omnes, huius sunt generis: ut quibus aut suadet, aut contrà dissuadet, petit, commendat, hortatur, aut dehortatur, consolatur, admonet, aut his similia facit, quæ huc spectant. Ovidianæ item epistolæ, deniq; omnium illorū scripta, qui in ijs, quæ diximus occupati sunt, hoc in genere uersantur.

Diuisio & explicatio eorum quæ suaderi, seu contrà dissuaderi oporteat.

## CAP. II.

**P**orro futurorum, atq; adeo expetendorum omniū, quæ suademus, alia honesta sunt, alia utilia, alia necessaria, alia aut ex duobus modò superioribus honestis atque utilibus, aut ex tribus his honestis, utilibus, atque necessarijs permixta. Honestæ sunt, quæ, quia per se laudabilia pulchrâq; uidentur, non emolumento aliquo, sed solo sui amore animos hominum alliciunt: ut uirtutes omnes: quarum genera sunt prudentia, iustitia, fortitudo, et temperantia: quæ singulæ, quòd late pateant, plures suo complectuntur gremio. Siquidem prudentia memoriam, intelligentiam, et prouidentiam: Iustitia religionem, pietatem, creditis in rebus fidem, gratiam, uindicationem, obseruantiam, et ueritatem: Fortitudo magnificentiam, fidentiam, patientiam, et perseuerantiam: Temperantia continentiam, clementiam, et modestiam continet. Cauendum hic maxime, ne uicina uirtutibus uitia, nobis imponant. Nam fortitudini audacia, perseuerantiæ pertinacia, iustitiæ acerbitas, religioni superstitio, denique alijs alia uicina sunt uitia.

Vtilia

Vtilia quæ sint, satis liquet, nempe ea omnia, quæ fructum nobis, utilitatemq; adferunt. Necessaria autē ipsa, partim absoluta sunt, partim cum quadam adiunctione. Absolutæ necessitudines sunt, quibus resisti nulla ratione potest, quo minus fiant : ut quodcunque natum est, necesse est aliquando emoriatur : & quodcunque manu factum est, temporis tractu depereat. De his sanè, non multum attinet dicere: quod uel nolentes, repugnantesq; trahant. Reliquæ quæ cum adiunctione sunt necessitudines, aut honestatis, aut incolumitatis, aut rerum fructuosarum utiliumq;, rationem habent. Honestatis, ut si suadeas obseßis ciuibus, necessum esse urbem ut defendant, datamq; principi fidem seruent, modò probi atque honesti haberi uelint. Incolumitatis, ut si suadeas Saguntinis, quod Alorcus fecit, necessum esse, ut Annibale uictore ita uolente, relictâ urbe, fortunisque omnibus, cum singulis uestimentis eò abeant, quò Annibali iuberet, modò incolumes esse & uiuere uelint. Rerum fructuosarum, ut si suadeas principi, necessum esse cum hoste ut congrediatur, nisi exuri agros, abduci pecora, captiuos trahi colonos perpeti uelit. Non me præterit, nonnullis placuisse, necessarium in suasorias non incidere: propterea, quòd de ijs quæ simplices & absolutæ necessitudines essent, nihil opus esset dicere, quod uel inuitos cogerent: & reliquæ omnes, quas adiunctionem, hoc est faciendi causam habere diximus, honestatis utilitatisq; quæstione continerentur. Verum mihi ad communem sensum & loquendi usum, uel maiorum hominum exemplo de ijs hic ita dicere libuit.

Permi

permixta autem ex duobus modò honestis atque utilibus, sunt libertas, gloria, amicitia, et his similia: quæ non modò honestate ipsa, sed & suo quodam utilitatis fructu, nos alliciunt atque ducunt. Quæ uero ex tribus illis, honestis, utilibus, atque necessarijs permiscuntur, eiusmodi sunt, tueri patriam, religionem, literasq; conseruare. Nam honestum est urbem, leges, libertatemq; à maioribus acceptam tueri: utile fortunas suas, publicasq; & priuata omnia, sine detrimento conseruare: necessarium, per ignauiam non committere, ut hoste irrumpe, omnia in eius ueniant potestatem: ut ciuium tecta, deorumq; templa incendijs delect: uirgines constupret: uiros alios trucidet, alios captiuos trahat. Eadem de religione, & literis conseruandis dici possunt. In his item omnibus spectandum, quid fieri possit, & quàm facile possit. Nam frustra honestum, utile, atque necessarium esse dixeris, si per difficultatem fieri nequeat. Possibilitas autem atque facilitas, à rerum, de quibus dicitur natura, circumstantijsq; ducitur: nempe auxilijs, facultatibus, loco, tempore, alijsq; id genus pro causa subinde nouis atq; nouis.

Quæ igitur suademus sunt: {  
 Honestum.  
 Utile.  
 Necessarium.  
 Possibile.  
 Facile.

Atque hinc facile colligi potest, quæ sint dissuadenda: nempe his contraria, turpia, inutilia, impossibilia, difficilia, quæ plurimum laboris & periculi habent.

Quæ

Quæ suadentur aut dissuadentur ab adiunctis  
quidem non male, sed potius à causarū  
& euentorum loco sumi posse,

## CAP. III.

**C**VM igitur hæc sint quæ suademus et dissuademus,  
Cuidendum subinde, quibus ex locis eorum, quos su-  
pra explicuimus cadant. Ostendimus supra, unum adiu-  
ntorum locum ea omnia nobis suppeditare, quæ laudari,  
& contrà uituperari debeant: qui idem & hic, quæ  
suaderi, dissuaderi uē oporteat, subministrare poterit.  
Nam quemadmodum ibi honeste, utiliterq; facta lauda-  
mus, & quæ contrà turpiter, inutiliterq; facta sunt ui-  
tuperamus, ita hic, ad honeste, utiliterq; faciendum, ani-  
mos hominum suadendo impellimus: & contrà turpia,  
atque inutilia, dissuadenda ducimus. Ibi recte facta ab  
adiunctis, qui locus omnium temporum est, laudamus,  
hic adhuc facienda, quæ recte fructuoseq; fieri puta-  
mus, suademus. Itaque honesta utiliaq; illi maxime, cui  
sequenda esse uolumus, sunt adiuncta. Necessaria quo-  
que ei maxime adsunt, uicinaq; sunt, quem urgent at-  
que impellunt. Iam & possibilitas, facilitasq;, an non  
hinc colligitur? nempe à parentum, amicorumq; ope-  
ra, ab ipsius ætate, ualetudine, copijs, facultatibusq;, à  
loco item, & tempore, & similibus circumstantijs, quæ  
pro causa aliæ atque aliæ semper existunt, eiq; cui sua-  
demus adiacent adiunctæq; sunt maxime. Hæc ita esse ne-  
gari quidem nulla ratione potest. Verum cum ita na-  
tura comparatum sit, ut nemo aliquid fieri uelit, aut  
suscipi nolit, sine causa, à causarum & euentorum po-  
tius

tius loco, quem ab adiunctis nasci diximus, suadere nos,  
 atque dissuadere uideri possumus. Nam honestas, utili-  
 tas, necessitas, ipsaq; faciendi possibilitas, atque facilitas,  
 causæ sunt, quæ animos hominum ad faciendum stimu-  
 lant, atque impellunt: ipsa autem laboris negotijq; susce-  
 ptio, euentum est putandum. Et quanquam dignitas, at-  
 que commoditas, post ipsum demum factum capiantur,  
 tamen cum hæc sperata hominum animos ad agendum  
 incitent, causæ efficientes, eaq; quæ fiunt, euēta effecta q;  
 sunt putanda. Licet enim rerum, quæ fiunt, finis sit hone-  
 stas utilitasq; quod cōmoda post facta primum sentian-  
 tur, suscipiendarum tamen, causæ antè extiterunt. Quæ  
 omnia hæc, honesta, utilia, necessaria, possibilia, faci-  
 lia, quæ suademus, & his contraria quæ dissuademus, re-  
 te quidem ex adiunctorū loco, qui complectitur omnia,  
 sed proprie magis à causis & euentis, quæ inde nascun-  
 tur, cadere dicimus. Adiuncta enim in causas conuertun-  
 tur, cum ad faciendum aliquid, animos hominum impel-  
 lunt. Sed harum rerum exempla subiiciamus. Quòd si  
 principibus & ciuitatum gubernatoribus suasurus ue-  
 ias, imprimis esse prospiciendum, literarum ut stu-  
 dia conferuentur: primum commode ab honesto pro-  
 ces. Vnum hoc esse literarum munus, à Dijs immorta-  
 bus hominibus datum, quo cæteris præstare brutis  
 possint, cognitis literis, mentis concepta, nunc splen-  
 dida longa q; oratione explicare, nunc stilo mandare,  
 modò aliorum scripta de Repub. administranda, modò  
 de religione conseruanda legendo, cognoscendo q; opti-  
 me sibi in futurum consulere: rerumq; publicarum sta-  
 tus

tus feliciter retinere: quæ uel sola re, ut maxime cæteris animantibus antecellere, ita Dijs immortalibus proxime accedere uideri possunt. Ab utili: literis animos hominũ natura ferociores ad humanitatem effingi, atque excolli: fieri q; ut cum quisq; literarum beneficio suum officium quod sit intelligat, suum dignitate præcellentibus honorem tribuat, & Reipub. principibusq; quod debet, haud grauate pendat. A necessario: futurum breui, si literæ negligantur, ut homines omnino obbrutescant, ipsaq; religio, & Reip. status, atque adeo diuina humanaq; omnia quæ his conseruantur labefactata concidant. A facili: Posse iam eos facile his rebus consulere, sua si præmia, suosq; honores rectis studijs constituent: & amicum monendo, iubendoq; dent operam, ut ij, in quos imperium habent, suos ad literarum studia liberos alant. Hi itaque omnia hæc, dignitas, commoditas, necessitudo, facilitasq;, causæ principibus sunt, cur in conseruanda literarum studia incumbant.

Quæ ab adiunctis seu causis inuenta, ad maiorem animorum motum cæteris ex locis amplificandi sit ratio, & primũ honestũ per locos ducitur. CAP. IIII

**Q**uæ suaderi aut contrà dissuaderi oporteat, & quibus ex locis cadant diximus: dicendũ est subinde, & quibus ex locis hæc ipsa amplificanda sint, atque extendenda: quod ex omnibus fieri potest. Nam cum in singulis his generibus tota uersetur rhetorica, omnium & locorum incidet usus. Animaduertendum autem, cum omnia hic ad faciendã fidem dirigantur, amplificatione

esse, quæ motu animorum fidem faciat. Hanc Cicero de  
 Partitione oratoria, nunc uehementem quandam argu-  
 mentationem uocat, nunc grauiorem quandam affirma-  
 tionem, quæ motu animorum conciliet in dicendo fidem.  
 Quod quidem non de superiori, sed de his rhetorices ge-  
 neribus, ubi ad fidem spectant omnia, dici recte potest.  
 Amplificandi autem quæ hic ratio sit, exemplis declare-  
 mus. Suadeamus Cæsari nostro, ut infestissimum, & com-  
 munem omnium Christianorum hostem Turcam Asia-  
 ticam, Græcia, quam post hominum memoriam occupa-  
 tam tenet rursus depellat. Causæ autem pellendi hostis  
 & hic sunt, honestas, utilitas, necessitas, quæ quidem o-  
 mnes nullæ essent, si præ difficultate res fieri minus pos-  
 set. Quare & possibilitas ab ipsius potentia, & socio-  
 rum principum auxilijs petenda est: quæ & ipsa expo-  
 sita, causa Cæsari expellendi hostis erit. Hæc autem sin-  
 gula ex alijs atque alijs locis explicanda, atque exagge-  
 randa erunt. Nam si paucis modò, ut in superiori de con-  
 seruandis literis exemplo, perstringantur, non ita ma-  
 gnâ fidem, animorumq; motum faciant: exaggerata  
 valent: ut maior uis hominum, quacunque incumbat im-  
 pressionem facit, atque perrumpit, ita & hæc amplificata,  
 secum uel inuitum trahunt. Primum itaque ex adiun-  
 ctorum, seu qui inde nascitur ex causarum potius loco  
 honestas, ratioq; pellendi hostis explicanda est: decere  
 eum, qui Cæsar princepsq; Christianorum omnium crea-  
 tus sit, in id omnium maxime incumbere, ut is hostis re-  
 bellatur, qui ex Asia ueniens, totam Græciam inuasit:  
 Christianam religionem oppressit: leges proculcarit:

l

omnem



omnem Græciæ statum, & Christianum conuictum sustulerit: atque pro his, luxum Asiaticum, libidinum genera multa, fœdâq; imperium uero in omnium uitam atque fortunas maxime intolerabile inuexerit: nec modo eo contentus sit, quod totam Græciam oppressam occupet, deuastarit, subiugaritq; Pannoniam: & in Germaniam usque uictor perrexerit. Huius furorem quamprimum reprimi, audaciam frenari, quid magis Cæsarem, cuius fidei commissa sunt omnia decere potest? quid Christiano Principi honestius? Imperatori ad gloriam, & sempiternam nominis memoriam consequendam maius? Sed cum hæc nuda minus, amplificata autem ad motum animorum plurimum ualeant, adiunctorum locus introspiciendus est: qui personis & rebus de quibus agitur adiunctus, rerum nobis copiam suppeditat: præteritaq; præsentia & futura, unde hic suadendum, intuenda esse nos admonet. Ex his autem non quæuis sine delectu, sed ea saltem sumenda sunt, quæ honestam pellendi hostis causam Cæsari præbent. Ex præterito igitur Cæsari adiuncta sunt cum sua dicta factaq; tum ea, unde hic maxime suadeas, quæ ipsi & à suis pellendi Asiatici hostis causa ad gloriam, & ab hoste ad ignominiam acciderunt. Gloriosum autem, amplumq; Cæsari, omnium eum Principem, & Romani imperij Imperatorem aduersus infestissimum hostem esse creatum: ignominiosum uero, breui tempore tantum in Europa imperium Turcam esse consequutum: eiusq; uires indies magis ac magis in Christianorum omnium perniciem inualescere. Itaque primum hic copiose exponas, quæ

quæ crudeliter, impieq; ex quo primum in Europam  
 uenit, egerit : quo milite, & technis Græciam oppres-  
 serit. Atque hic & ex descriptionis loco ipsa depingi  
 prouincia poterit : quot urbes, & quàm potentes, quo-  
 que in loco positas habeat : qui hominum mores, reli-  
 gioq; ante hostis incursum fuerit. Quo autem maior &  
 insignior sit, magisq; integros mores, & puram reli-  
 gionem habuerit, hoc grauior Cæsari eam recuperandi,  
 omniaq; suo loco restituendi causa uideri debet. In expo-  
 nendo autem, ut quasque urbes ceperit, temporis seruan-  
 dus est ordo : omnibusq; circumstantijs locorum, tem-  
 porum, rerumq; gestarum explicatis, copiose quæque,  
 quo miserabiliora uideantur erunt enarranda : quod in  
 ijs, quæ proximis his annis gesta sunt, dum totam Pan-  
 noniam deuastat, & in Germaniam usque uictor pene-  
 trat, faciendum erit maxime. Recentiora enim mala ma-  
 gis hominum animos commouere solent. Itaque pluri-  
 bus exponendum, qua tyrannide omnia egerit : quàm  
 late omnia deuastarit : castella euerterit : urbes incen-  
 derit : infantes, senésque trucidarit : mediæ autem æta-  
 tis homines, alios ad libidinem, alios in miseram per-  
 petuamq; seruitutem captiuos abduxerit : denique diui-  
 na, humanaq; omnia proculcarit. Atque hæc & ex com-  
 parationis loco plurimum extendi possunt, si nationes,  
 urbesq; deuastatas, aut occupatas, religionem item, mo-  
 resq; hominum qui fuerant, cum nostris conferendo  
 ostendas, aut paria, aut maiora melioraq; nostris fuisse  
 omnia. Quin & magna imposita uectigalia, superbumq;  
 in uictos imperium insignius reddas, cum illorum ser-

uitute comparando, quibus superbe crudeliterq; imperatum esse constet: & hæc quidem suo quæque loco sunt facienda. Postquam autem amplificando hunc in modum miserabiliora omnia, indignioraq; reddiderimus, sui Cæsarem officij admonebimus, quem cum omnium Principem, Romaniq; imperij Imperatorem eo consilio creatum esse intelligamus, ut Christianam Rempub. atq; conuietum ab hoste crudelissimo defendat, diuinamq; & humana omnia integra conseruet, ereptaq; recuperet. imprimis hinc admonendus erit, ut quæ hominibus ipsum Imperatorem creandi causa est potissima uisa, eadem ei & pellendi hostis honestissima uideatur. Iam si quid huius dixerit, promiseritq;, non erit prætermittendum. Ex factis autem ipsius, nihil ferè præterea huc adferas, nisi ut adhorteris, rem inceptam non abijciat, & semel sumpta in Turcam arma, non ante, quam pulsus fugatusq; ille sit, deponat. Huiusmodi sunt præteriti temporis adiuncta, unde suadeas. Præsentis uero temporis ea sunt omnia, quæ Cæsari ab hoste, suisq; subditis accidunt atque fiunt. Quæcunque igitur animo hostis agitet, moliturq; in Cæsaris, Christianorumq; omnium perniciem, aut arma in belli usum parando, aut milites copiasq; contrahendo, copiose omnia consilijs, causisq; explicatis, erunt exponenda. Quod si uero contritas copias esse constet, armorum militumq; genus ex descriptionis loco depingi, & per comparisonem deinde extendi augeriq; potest. Hunc in modum & ab ijs, quæ à subditis fiunt, commouendus est animus. Itaque dicendum, quæ uniuersorum uota, quantaq; expectatio sit, co-

duce, atque Imperatore, recuperandam Pannoniam & Græciam esse : finemq; miseriarum, calamitatumq; omnium propemodum futurum. Atque hic eorum omnium, qui summo in periculo, aut seruitute uiuunt, opemq; Cæsaris unicam suam putantes implorant, conditio, luctusq; pluribus erit explicandus. Iam & fratris Ferdinandi, summo in periculi constituti honesta, & pia petitio, fidem fraternam in crudelissimum hostem implorantis : quem suæ, suorumq; ceruicibus, cum maximis copijs imminentem prospiciat. Possunt autem hæc & exemplis ex comparatione maiorum, minorumq; adductis, dilatarsi maxime. Quod si uicinis & amicis, suam in periculo opem expetentibus officium omnino deferendum putet, quanto magis fratri plurimum laboranti succurrendum esse ducet ? Et si intelligat, Alexandrum illum magnum, & Romanos, non religionis suæ conseruandæ causâ, & aliqua in Deos pietate, sed sola dominandi cupidine, & augendi nominis gloria inductos in tot, tantasq; dimicationes periculose se conicisse, & aliena interim appetiuisse, quanto honestius erepta modo sibi repetenda esse putabit, ad quod eum & religio, & in Deum fratremq; pietas inuitat maxime ? Futuri autem temporis adiuncta ea sunt, quæ turpia, ignominiosaq; Cæsari, si hostem negligat, magna uero, amplaq; ad nominis gloriam si sumptis armis reprimat, euentura esse uideantur. Siquidem in foribus hæc esse uidentur, ut oppressis uicinis gentibus, religionem, omnemq; Christianæ Reipub. statum penitus hostis euertat : luxum autem, & libidinem Asiaticam in hæc loca inue-

hat. Atque hic copiose describi, quæ rerum diuinarum,  
 humanarumq; confusio futura esset, quæ seruitutis libi-  
 dinumq; species. Quin & ex contrariorum loco rei  
 indignitatem exaggeres, affectusq; moucas, si his in lo-  
 cis homines nunc pijsime uiuere, mox impijsime uictu-  
 ros esse dicas : nunc summa in libertate, propediem ma-  
 xima in seruitute : nunc honestissime, mox turpissime :  
 nunc optimis legibus moribusq; bene constitutam Rem-  
 pub. habere, breui omnibus ijs spoliata, scelere, rapi-  
 nis, omniq; uitiorum genere inquinatissimam habitu-  
 ros. Quæ omnia, ut misera, maximeq; indigna futura  
 essent, ita imprimis excitare Cæsaris animum debent, ho-  
 nestissimeq; causæ uideri, cur is, unde hæc immineant,  
 quamprimum pellendus sit atque fugandus. Iam uero  
 contra si hostem reprimat, quantam nominis gloriam,  
 omniumq; gentium fauorem, & gratulationem, maxi-  
 me eorum, qui in seruitute, aut metu seruitutis uixerunt  
 consequuturus sit, erit exponendum. Quin & com-  
 moda ex fugato hoste ad Cæsarem redirent : ut cui eæ  
 gentes omnes, quæ iam Turcæ, uectigales essent futu-  
 ræ. Verum nondum de utilitate nobis oratio est. Quod  
 si igitur uoles, & hæc ex comparationis loco extendas  
 plurimum, si hanc ipsius de Turca futuram uictoriam,  
 cum maximorum quorumque Romanorum Imperato-  
 rum rebus gestis conferas, atque ostendas, magnitudine  
 rerum, hominumq; gratulatione aut parem, aut multo  
 etiam maiorem fore. Quemadmodum honestum ab ad-  
 iunctis præteriti, præsentis, futuriq; temporis tractandū,  
 cæterisq; ex locis ad motum animorum extendendum  
 sit, paucis

fit, paucis perstrinximus. Atque hic quidem, & ex minoribus illis locis, copiam petere licuisset: ab etymologia nominis: & à coniugatis: ut cum & Augustus dicatur, uirtute efficiendum ei esse, ut augendo imperium, minus inuidiosum hoc nomen uideri possit. A coniugatis: cum nullis non in rebus suam in Deum pietatem semper declararit, non esse ei committendū, ut ferendo Turcam nostram proculcare religionem, minus pius existimari possit. Verum cum hi loci, et maioribus illis adiunctorum caussarumq; locis, ut supra annotauimus comprehendantur, hinc iuxta argumenta, copiamq; petendi rationem sæpius ostendere, nihil attinet.

Vtilia ut ex locis extendantur.

C A P.

V.

**D**iximus de honestate, dicendum subinde est de utilitate: quæ quibus ex locis cadat, diximus, nempe ab adiunctis seu causis. In has enim adiuncta, & ex reliquis ducta locis dum suademus, aut dissuademus, conuertere solent: quod iterare sæpius non grauior, quo locorum natura magis patefiat. Dicendum igitur, Cæsari maxime fructuosum fore, si recuperata Græcia, atque Pannonia, omnes eas nationes urbesq; uectigales ipse habeat, quæ in præsentia Turcarum regi pendunt. Atque hic ex descriptionis loco regiones, urbes, portus, uectigalia item quot, quantaq; sint, additis causis describi possunt. Eadem hæc omnia & ex comparationis loco latius spargas, si cum Italiæ, Hispaniæ, & maximis aliarum nationum uectigalibus conferas, atq; probes, aut paria,

l 4 aut

aut maiora duci oportere. Quin & ex testimoniorū loco, quæ comparando extuleris comprobēs: si aut uniuerſi, aut ij, qui his de rebus iudicare poſſunt idem ſentiant. Docendū item, harum nationum adiectione eò uires eius incrementum capere, ut non modo in Europa, ſed ne in Aſia quidem, atque Aphrica, quenquam metuat: quod ipſum eadem ratione & per locos duci poteſt.

Necceſſariū ut per locos ducendū. CAP. VI.

**N**Eceſſitudo item ex adiunctorum loco cadit. Quid enim homini magis adiunctū, ac id, quod idipſum cogit? Sed ut ſuperiora, & hæc in ſuadendo in cauſſarum uertitur locum: eſtq; faciendi cauſſa ipſa neceſſitas. Neceſſum igitur Cæſarem in id totis uiribus incumbere, ut Aſiaticum hoſtem Europa quamprimū expellat: qui, ex quo Græciam inuaſit, oppreſſis ſubiugatisq; uicinis gentibus, ſui imperij fines ſemper proſerat: hocq; dies nō eſesq; cogitet, hoc agat, ut armis, uel inuitis omnibus totius Europæ imperium conſequatur: & unus rerum omnium Dominus, Princepsq; exiſtat. Atque hic copioſe explicandum, quantum regnum totam Pannoniam proximis annis deaſtarit, ſubiugaritq;: & in Germaniam uſq; armatus deſcenderit: quam, ſi qua uia ſuo adijcere regno poſſet, ſerius in eum arma ſumi. Deſcribenda autem res erit ex deſcriptionis loco, Romani imperij occaſus, omnium Chriſtianorum ſeruitus, religionis legumq; interitus. Denique ea omnia mala, quæ niſi maturè his rebus proſpiciatur euentura uideantur, pluribus erunt enarranda: exemplisq;, quæ plurimum in hoc genere ualent, & ex ſimilitudinis comparationisq; loco ſumuntur,



muntur, corroboranda. Iulium Cæsarem, cum Galliam prouinciam Senatus permissu plures annos obtinisset, tantos inde spiritus uiresq; sumpsisse, ut cum postea quæ uellet per Senatum obtinere non posset, sumptis armis principem orbis terrarum Senatum oppresserit: eamq; democratiam, quæ omnium longe maxima fuit, in suam monarchiam conuerterit. Cuius crescentem potentiam si obseruassent, & in tempore fre-gissent, dignitatem suam Senatus, summumq; imperium retinisset: nec uniuerſi ciues, ab uno fracti, domitiq; fuissent. Nihil initio regibus olim, magnisq; ciuitatibus minus periculosum esse potuit pyratis illis, marinis prædonibus, qui tamen dum negligebantur, ferebanturq;, eò numero uiribusq; creuerunt, ut non Regibus modò, urbibusq;, sed terrarum dominis ipsis Romanis terrori essent: cogerentq; eos, Duce Cn. Pompeio, quem bellicæ rei expertissimum habuerunt, in dubium belli euentum, maximumq; rerum discrimen secum descendere. Quare & necessum esse, crescentem Turcæ potentiam maturæ frangere, ne nostra negligentia aliquando præualeſcat.

Possibilitas ut ex locis sit amplificanda.

C A P.

V I I.

**P**ossibilitas etiam ex adiunctorum loco ducitur: quæ & ipsa hic ut cætera, in causas conuertitur. Sumitur enim à Cæsaris potentia: à gentium ipsius multitudine, & uirtute: à peditum, equitum, armorumq; genere: à loco item. & tempore, alijsq; id genus circumstantijs. Itaque ex descriptionis loco, quanta natio

l 5

Germania

Germania, quæ iucina est, quàm bellicosa, quanta & quàm potens Italia, atque Hispania, cæteræq; omnes sint, multis erit explicandum. Nulla enim Europæ gens est, nulla natio, quam non pietas, periculumq; in communem hunc hostem armare debeat. Iam & ex comparationis loco possibilitas, atque adeo facilitas, magis eluceat. Turcam Græciam modò armare, nostrum uniuersam Europam: illum auro Asiatico, nostrum lacertis ualere. Conferendus & noster, cum hostili exercitu, robur corporum: genus armorum: belli scientia: & militis in pugnando fides. Et cum Germano ferè milite agenda res sit, quæ gens hac exercitior? quæ corporum robore ualidior? quæ armorum genere instructior? quæ denique ipsa in pugnando fide sanctior, incorruptiorq; adduci ab hoste potest? ut quæ non fugere, sed aut uincere, aut in uestigio moriens, fidem suo principi exoluere soleat. Statarium militem cum instabili, grauem armaturam cum leui, ordinatam atque instructam aciem, cum confusa multitudo esse concursuram. Quin & ex eodem hoc loco exemplis possibilitatem aperias. Pannoniæ modò regem suis ipsius uiribus nixum, omnem Turcarum impetum sæpe sustinuisse: & tandem, non tam horum uiolentia, quàm suorum fraude circumuentum cecidisse: tantum abesse, ut consentientis Germaniæ uires, Italiæ, reliquarumq; nationum lacertos feliciter experiri, & ferre possint. Proximo anno, cum ad Viennam Cæsari nostro pugnam hostis denuntiasset, & cò quantis potuit copijs uenisset, certior per exploratores de nostris copijs factus

factus, fugam inde maturauit : quod, nisi suis rebus desperasset, fecisset minime : ubi cognitum, nullam rem militem nostrum magis execratum, quam oblatam prædam fuga hostis sibi creptam fuisse. A loco etiam possibilitas ostendatur. Casarianis enim hostem propemodum circuncinctum teneri : hinc Siculis, atque Italis : hinc Germanis : illos classe, hos terra aggredi posse.

Exemplum copiosè ex locis suadendi Apud  
Ciceronem pro lege Manilia.

## CAP. VIII.

**Q**Uæ ex locis copiosè suadendi ratio sit breuiter aperuimus: idem exemplis apud Ciceronem ostendere operæpretium erit. Suasurus Cicero Populo Romano bellum in Mithridatem suscipiendum, & Cn. Pompeium huic bello Imperatorem præficiendum esse, diuisione usus est : primum se dicturum de genere belli, deinde de magnitudine, postremo de Imperatore ad id bellum deligendo. Postquam ita diuisit, redit ad primum, & proponit, genus belli eiusmodi esse, quod maxime animos eorum excitare atque inflammare debeat : hoc est, quod maxime suscipiendum sit. Confirmat id quatuor argumentis, ductis ab adiunctis, atque adeo à causis, in quas illa in suadendo conuerti iam sæpe diximus. Agitur enim inquit, salus sociorum, atque amicorum : pro qua multa maiores uestri magna, & grauius bella gesserunt. Aguntur certissima Populi Romani uestigalia, & maxima : quibus amissis, & pacis ornamenta, & subsidia belli requiretis. Aguntur bona multorum ciuium : quibus est à uobis, & Imperatoribus

„ toribus Rcipub. consulendum. Et quoniam semper ap=  
 „ petentes gloriæ præter cæteras gentes, atque auidi lau=  
 „ dis fuistis, delenda est uobis illa macula Mithridatico  
 „ bello superiore suscepta, quæ penitus iam insedit, atque  
 „ inueterauit in Populi Romani nomine, quod is, qui una  
 „ die tota Asia, tot in ciuitatibus uno nuntio, atque una li=  
 „ terarum significatione ciues Romanos necandos tru=  
 „ cidandosq; denotauit, non modò adhuc pœnam nullam  
 „ suo dignam scelere suscepit, sed ab illo tempore annum  
 „ iam tertium & uigesimum regnat, & ita regnat, ut se  
 „ non Ponto, & Cappadociæ latebris occultare uelit,  
 „ sed emergere è patrio regno, atque in uestris uestiga=  
 „ libus, hoc est in Asiæ luce uersari. Sunt porrò qua=  
 „ tuor hæc Romanis, quibus suadebat adiuncta maxima:  
 „ socij periclitantes, uestigalia, bona ciuium, & acce=  
 „ pta à Mithridate ignominia. Verum cum hinc suadeat,  
 „ eadem hæc causæ sunt, cur animi ipsorum ad bellum  
 „ excitari, atque inflammari necessario debeant. Atqui Ci=  
 „ cero non contentus nude hæc modò proposuisse. Ne=  
 „ que enim fidem, motumq; animis ita magnum attu=  
 „ lisset. Quare repetit omnia, & singula fusius expli=  
 „ cat: quod antequam faciat, postremum argumentum,  
 „ acceptum à Mithridate ignominiam esse delendam, ex  
 „ adiunctorum, causarum, comparisonisq; loco, copio=  
 „ siissime primum his uerbis explicat. Etenim adhuc ita  
 „ uestri cum illo rege contenderunt Imperatores, ut ab  
 „ illo insignia uictoriæ, non uictoriam reportarent. Triū=  
 „ phauit L. Sylla, triumphauit L. Muræna de Mithri=  
 „ date, duo fortissimi uiri, & summi Imperatores: sed  
 „ trium

triumpharunt, ut ille pulsus superatusq; regnaret. Ve= ,  
runtamen illis Imperatoribus laus est tribuenda , quod ,  
egerunt , uenia danda , quod reliquerunt : propterea ,  
quod ab eo bello Syllam in Italiam Respub. Mura= ,  
nam Sylla reuocauit. Mithridates autem omne reli= ,  
quum tempus , non ad obliuionem ueteris belli , sed ad ,  
comparationem noui contulit. Qui posteaquam maxi= ,  
mas edificasset , ornassetq; classes , exercitusq; perma= ,  
gnos, quibuscunque ex gentibus potuisset comparasset ,  
Bospheranis finitimis suis bellum inferre simulasset ,  
usque in Hispaniam legatos Electanis misit, ad eos du= ,  
ces, quibuscum tum bellum gerebamus : ut cum duobus ,  
in locis disiunctissimis, maximeq; diuersis , uno consi= ,  
lio , ab unis hostium copijs bellum terra , mariq; gere= ,  
retur : uos ancipiti contentione distracti, de imperio di= ,  
micaretis. Sed tamen alterius partis periculum Serto= ,  
rianæ , atque Hispaniensis, quæ multo plus firmamen= ,  
ti ac roboris habebat , Cn. Pompei diuino consilio , ac ,  
singulari uirtute depulsum est. In altera parte, ita res à ,  
L. Lucullo summo uiro est administrata, ut initia illa ge= ,  
starum rerum magna, atque præclara, non felicitati eius ,  
sed uirtuti, hæc autem extrema , quæ nuper acciderunt ,  
non culpæ, sed fortunæ tribuenda esse uideantur. Sed ,  
de Lucullo dicam alio loco , & ita dicam Quirites , ut ,  
neque uera laus ei detracta, oratione nostra, neque falsa ,  
afficta esse uideatur. Sed pro uestri imperij dignitate ,  
atque gloria, quoniam is est exorsus orationis meæ , ui= ,  
dete quem uobis animum suscipiendum putetis. Hacten= ,  
nus Cicero ab adiunctorum & causarum loco argumē=

tum

tum dilatauit, explicando, adiectis personis, tempore, loco, causis, atque consilijs, quæ, ex quo tempore tanta ignominia Populum Romanum Mithridates affecerit, sint gesta. Figuris item, præsertim occupationibus, de quibus supra in exornatione diximus illustrauit, atque extendit. Nunc subinde eandem hanc rem, & ex comparationis loco exaggerat. Maiores uestri sæpe mercatoribus ac nauicatoribus iniuriosius tractatis, bella gesserunt: uos tot ciuium Romanorum millibus uno nuntio, atque uno tempore necatis, quo tandem animo esse debetis? Legati quod erant appellati superbius, Corinthum patres uestri totius Græciæ lumen extinctum esse uoluerunt: uos eum regem inultum esse patiemini, qui legatum Populi Romani consularem uinculis, ac uerberibus, atque omni supplicio excruciatum necauit? Illi libertatem ciuium Romanorum imminutam non tulerunt: uos uitam ereptam negligetis? Ius legationis, uerbo uiolatum illi persecuti sunt: uos legatum Populi Romani omni supplicio interfectum, inultum relinquetis? Videte, ne ut illis pulcherrimum fuit tantam uobis imperij gloriam relinquere, sic uobis turpissimum sit, illud quod accepistis tueri & conseruare non posse. Haftenus postremum illud argumentum ex locis dilatauit, nunc superiora illa tria ordine prosequenda repetit: & primum quidem, agi uidelicet sociorum salutem, ex adiunctorum, causarum, & comparationis loco confirmat, atque explicat his uerbis. Quid? quod salus sociorum summum in periculum, ac discrimen uocatur? Regno expulsus

expulsus est Ariobarzanes rex, socius Populi Romani, ni, atque amicus: imminent duo reges totæ Asiæ, non solum uobis inimicissimi, sed etiam uestris socijs atque amicis. Ciuitates autem omnes, cuncta Asia, atq; Græcia, uestrum auxilium expectare propter periculi magnitudinem coguntur. Imperatorem à uobis certum deprecari, cum præsertim uos alium miseritis, neque audent, neque se id facere summo sine periculo posse arbitrantur: uident, & sentiunt, hoc idem, quod & uos, unum uirum esse, in quo summa sint omnia: & eum prope esse, quo etiam carent ægrius: cuius aduentu ipso, atque nomine, tametsi ille ad maritimum bellum uenerit, tamen impetus hostium repressos esse intelligunt: ac retardatos. Hi uos, quoniam libere loqui non licet, tacite rogant, ut se quoq; , sicut cæterarum prouinciarum socios dignos existimetis, quorum salutem tali uiro commendetis. Atq; hoc etiam magis, quàm cæteros, quòd eiusmodi in prouinciam homines cum imperio misimus, ut etiamsi ab hoste defendant, tamen ipsorum aduentus in urbes sociorum, nō multum ab hostili expugnatione differant. Hunc audiebāt antea, nunc præsentē uident, tanta temperantia, tanta mansuetudine, ut ij beatissimi esse uideantur, apud quos ille diutissime commoratur. Sociorum periculum Cicero ex adiunctorū loco expressit: ab ijs uidelicet, quæ gesta sunt, atq; gerantur: causis etiam admixtis, quod cum Cn. Pompeiū præ cæteris duces expetant, aperte petere socij non audeāt. Quin & spectata Cn. Pompei temperantia, mansuetudo, atq; humanitas, ex comparationis loco, cum cæterorum Imperatorum



ratorum in socias urbes aduentu parum ab hostili expu-  
 gnatione differente, confertur atq; commendatur. Eo-  
 dem ex loco, & argumenti huius clausulam, ut quæ à  
 „ minori sumpta est, adduxit. Quare si propter socios,  
 „ nulla ipsi iniuria lacesiti maiores uestri cum Antiocho,  
 „ cum Philippo, cum Actolis, cum Pœnis bella gesserunt,  
 „ quanto uos studio conuenit iniurijs prouocatos socio-  
 „ rum salutem unà cum imperij uestri dignitate defendere?  
 „ Secundum autem argumentum, ex comparationis sta-  
 „ tim loco extendit hoc pacto. Præsertim cum de uestris  
 „ maximis uectigalibus agatur. Nam cæterarum prouin-  
 „ ciarum uectigalia Quirites, tanta sunt, ut his ad ipsas  
 „ prouincias tutandas uix contenti esse possimus. Asia ue-  
 „ ro tam opima est, & fertilis, ut & ubertate agrorum,  
 „ & uarietate fructuum, & magnitudine pastionis, &  
 „ multitudine earum rerum quæ exportantur, facile  
 omnibus terris antecellat. Hinc Cicero infert clausu-  
 lam, atque adeo nouam propositionem: non solum  
 Asiam à calamitate, sed etiam à metu calamitatis esse de-  
 fendendam. Confirmat autem hanc subinde à causarum  
 loco: cur uel à metu calamitatis defendi debeat. Itaque  
 „ hæc uobis prouincia Quirites, si & belli utilitatem, &  
 „ pacis dignitatem sustinere uultis, non modo à calami-  
 „ tate, sed etiam à metu calamitatis est defendenda. Nam  
 „ cæteris in rebus cum uenit calamitas, tum detrimentum  
 „ accipitur: at in uectigalibus, non solum aduentus mali,  
 „ sed etiam metus ipse affert calamitatem. Nam cum ho-  
 „ stium copię non longe absunt, etiam si irruptio facta  
 „ nulla sit, tamen pecora relinquuntur: agricultura de-  
 seritur

seritur: mercatorum nauigatio conquiescit. Ita neque ex portu, neque ex decumis, neque ex scriptura uectigal conseruari potest. Quire saepe totius anni fructus, uno rumore periculi: atque uno belli terrore amittitur. Haftenus & breui admixta collatione, copiose rem à causis confirmauit, atque extendit: nunc subinde ex adiunctorum loco exaggerat, dum ex imminenti hostis incursu, & eorum qui uectigalia pendunt, & publicanorum qui exercent, metum describit. Quo tandem animo esse existimatis, aut eos qui uectigalia uobis pensant, aut eos qui exercent, aut exigunt, cum duo res cum maximis copijs propè adsint: cum una excursio equitatus, per breui tempore totius anni uectigal auferre possit? Cum publicani familias maximas, quas in salinis habent, quas in agris, quas in portibus atque custodijs, magno periculo se habere arbitrentur. Putatis ne uos illis rebus frui posse, nisi eos, qui uobis fructuosi sunt conseruaueritis, non solum ut antea dixi calamitate, sed etiam calamitatis formidine liberatos? Tertium & postremum argumentum ex adiunctorum, atque adeo caussarum loco, in quas illa cōuertuntur explicat. Ac ne illud quidem uobis negligendum est, quod mihi ego postremum proposueram, cum essem de belli genere dicturus, quod ad multorum bona ciuium Romanorum pertinet, quorum uobis pro uestra sapientia Quirites, habenda est ratio diligenter. Nam & publicani homines & honestissimi, & ornatissimi, suas rationes & copias in illam prouinciam contulerunt. Quorum ipsorum per se res, & fortuna

„ nã, uobis curæ esse debent. Etenim si uestigalia neruos  
 „ esse Reipub. semper duximus, cum certe ordinem, qui  
 „ exercet illa, firmamentum cæterorum ordinum, recte esse  
 „ dicemus. Deinde cæteris ex ordinibus homines nauis &  
 „ industrij, partim in Asia negotiantur, quibus uos absen-  
 „ tibus consulere debetis: partim eorum in ea prouincia  
 „ pecunias magnas collatas habent. Erit igitur humanita-  
 „ tis uestra, magnum eorum ciuium numerum calamitate  
 „ prohibere: sapientiæ uidere, multorum ciuium calamita-  
 „ tem, à Reipub. seiunctam esse nõ posse. Etenim illud pri-  
 „ mum parui refert, uos publicanis amissis uestigalia post-  
 „ ea uictoria recuperare. Neque ijsdem redimendi facultas  
 „ erit, propter calamitatem: neque alijs uoluntas, propter  
 „ timorem. Deinde quod nos eadem Asia, atque idem iste  
 „ Mithridates initio belli Asiatici docuit, id quod certe  
 „ calamitate docti, memoria retinere debemus. Nam tum,  
 „ cum in Asia res magnas permulti amiserunt, scimus Ro-  
 „ mæ solutione impedita, fidem concidisse. Non enim pos-  
 „ sunt una in ciuitate multi rem, atque fortunas amittere,  
 „ ut non plures secum in eandem calamitatem trahant. À  
 „ quo periculo prohibete Rempub. & mihi credite, id  
 „ quod ipsi uidetis, hæc fides, atque hæc ratio pecunia-  
 „ riarum, quæ Romæ, quæ in foro uersatur, implicita est  
 „ cum illis pecunijs Asiaticis, & cohæret: rueret illa non  
 „ possunt, ut hæc non eodem labefactata motu concidât.  
 Haecenus Cicero ab adiunctis, qui locus est omnium  
 temporum, rem fusius explicauit. Nam primum publi-  
 canorum rationem habendam esse, ducta ab adiun-  
 ctis definitione, confirmauit, uidelicet, cum uestigalia  
 nerui

nerui Reipub. sint, publicanorum ordinem, qui illa ex-  
 ercet, firmamentum ceterorum ordinum esse putandum.  
 Aliorum præterea multorum in Asia negotiantium, &  
 collatas pecunias habentium ciuium commoda non ne-  
 gligere, esse humanitatis eorum, atque officij. Deinde ab  
 ijs confirmauit, quæ euentura publica incōmoda essent.  
 Defuturos enim postea, qui uestigalia redimerent. Po-  
 stremo ab expertis ante Romæ incommodis impeditæ  
 solutionis. Omnia quidem hæc ab adiunctis sunt petita:  
 quæ in suadendo hic in causas uertuntur, cur multorum  
 ciuium commodis, seruiendum esse putent. His subij-  
 cit Cicero breuem omnium horum argumentorum epi-  
 logum. Quare uidete, num dubitandum uobis sit, o=,,  
 mni studio ad id bellum incumbere, in quo gloria no=,,  
 minis uestri, salus sociorum, uestigalia maxima, for=,,  
 tunæ plurimorum ciuium cum Repub. defenduntur. ,,  
 Belli autem magnitudinem Cicero, ex adiunctorum lo-  
 co probat: nempe narratione rerum à L. Lucullo ge-  
 starum, & à Mithridate renouatarum: ubi & ex si-  
 militudinis loco exempla admiscuit. Quin & ex eo-  
 dem hoc adiunctorum loco, Cn. Pompei laudem su-  
 mit: dum prædicat ipsum, à scientia rei militaris, uir-  
 tute, autoritate, & felicitate. Quæ singula dum expli-  
 cat, ex alijs atque alijs subinde locis dilatat, atque am-  
 plificat.

Exemplum ut in petendo ex locis sit amplifican-  
 dum: totaꝑ apud Ouidium Penelopes epi-  
 stola, quibus ex locis sit sumpta.

CAP.

IX.

m 2

Eadem

**E**Adem quæ suadendi, iisdem ex locis & hortandi, petendiq; ratio est: idq; & apud poëtas exëplo ostēdamus. Penelopes ad coniugem Vlysssem epistola, suasorij generis est. Petit enim, ut capta Troia, omnibusq; Græcorum principibus reuersis, & ipse tandem ad se redeat. Quibus autem ex locis argumenta ducat, affectusq; moueat, indicabimus. Exordio, quo beneuolos, dociles, attentosq; reddimus, non hic ferè est usa. Neque enim opus huic erat, eum sibi conciliare, à quo ipsa potius, quòd coniunx in uigesimum usque annum abesset reconcilianda fuit. Primo tamen uersu beneuolum, docilemq; reddit: dum dicit, epistolā illi à sua Penelope trāsmitti, his uerbis:

Hanc tua Penelope lento tibi mittit Vlysse.

Subijcit autem propositionem, quid sit quod ab eo petat, uidelicet:

Nil mihi rescribas, attamen ipse ueni.

Confirmat hanc argumento ex adiunctorum loco sumpto, quod Troia, ad quam expugnandam profectus esset, iam sit euersa:

Troia iacet certe, Danaïs inuisa puellis:

Vix Priamus tanti, totaq; Troia fuit.

Inuisam autem Troiam esse Græijs puellis, Priamumq; & totam Troiam uix tanti putandam, amplificatio est à circumstantijs: quas idem locus suppeditat. Quæ sequuntur à caussarum & euentorum loco petita sunt. Male enim imprecatur Paridi, unde ea, quæ enumerat incommoda acceperit.

O utinam tunc cum Lacedæmona classe ptebat,

Obrutus

Obrutus insanis esset adulter aquis.  
 Non ego deserto iacuissem frigida lecto:  
 Nec quererer tardos ire relictæ dies.  
 Nec mihi quærenti spatiosam fallere noctem,  
 Lassaret uiduas, pendula tela manus.  
 Quando ego non timui grauiora pericula ueris?  
 Res est solliciti plena timoris amor.  
 In te fugebam uiolentos Troas ituros:  
 Nomine in Hectoreo pallida semper eram.  
 Siue quis Antilochum narrabat ab Hectore uictum,  
 Antilochus nostri caussa timoris erat:  
 Siue Menætiaden falsis cecidisse sub armis,  
 Flebam successu posse carere dolos.  
 Sanguine Tlepolemus Lyciam tepesecerat hastam:  
 Tlepolemi leto cura nouata mea est.  
 Deniq; quisquis erat, castris iugulatus Achiuis:  
 Frigidius glacie pectus amantis erat.  
 Hactenus à caussarum & euentorum loco amplificauit;  
 ubi, dum quantæ in cura & metu de coniuge uixerit si-  
 gnificat, mirè sui commiscrationem mouet. Nunc subin-  
 de redit ad adiunctorum locum, confirmandamq; propo-  
 sitionem. Troiam enim esse euersam: Argolicosq; duces  
 domum reuersos suis res à se gestas commemorare: ubi  
 explicatis circumstantijs, omnia ueluti depicta ob ocu-  
 los ponit: quod schema hoc sumptum ex loco, illi Hypo-  
 typosim, nostri descriptionem uocant.  
 Sed bene consuluit casto deus æquus amor:  
 Versa est in cineres, sospite Troia uiro.  
 Argolici rediere duces, altaria fumant:

Ponitur ad patrios barbara præda deos.  
 Grata ferunt nymphæ pro salus dona maritis:  
 Illi uicta suis Troïca fata canunt.  
 Mirantur iustiq; senes, trepidæq; puellæ:  
 Narrantis coniux pendet ab ore uiri.  
 Iamq; aliquis posita monstrat fera pralia mensa:  
 Pingit & exiguo Pergama tota mero.  
 Hacibat Simois, hic est Sigëia tellus:  
 Hic steterat Priami regia celsa senis.  
 Illic Acacides, illic tendebat Vlyssès:  
 Hic lacer admissos terruit Hector equos.  
 Quæ sequuntur ex eodem hoc adiunctorum sumpta sunt  
 loco: & figurata occupatione. Suspiciari enim potuit,  
 unde ea certò accepisset. Quare à certis hominibus ipsis  
 Græcorum reuersis principibus, ea cognita habere scri-  
 bit. Atq; hic, dū audaciā eius in adeundo periculo impro-  
 bat, suumq; inde metum ostendit, mire affectus mouet.  
 Omnia nanq; tuo senior te quærere missò,  
 Rettulerat nato Nestor: at ille mihi.  
 Rettulit & ferro Resum, Dolonaq; cæsum:  
 Utq; sit hic somno proditus, ille mero.  
 Ausus es ò nimium, nimiumq; oblite tuorum  
 Thracia nocturno tangere castra dolo?  
 Totq; simul mactare uiros adiutus ab uno?  
 At bene cautus eras, & memor ante mei.  
 Vsq; metu micuere sinus, dum uictor amicum  
 Dictus es Ismarijs isse per agmen equis.  
 Ab adiunctis hætenus, quæ sequuntur ex compara-  
 tionis loco sunt petita: & interrogationibus figurata.



Suam enim fortunam, cum cæterarum Græcarum sceminarum felicitate, quibus sui rediissent mariti conferendo, indigniorem miserabilioremq; reddit. Cum porro tota sit hic in mouendis affectibus, ut ille, quod petit, ad se tandem redeat: moueriq; hi, nisi copiosa, multumq; amplificata oratione non possint, non contenta est Troiam euersam esse dicere, sed circumstantias explicat, eū ipsum locum arari iam, segetemq; ferre, ubi Troia fuit: ædesq; deiectas herba occultari: unde temporis diuturnitas innuitur.

Sed mihi quid prodest uestris disiecta lacertis

Ilios? & murus, quod fuit antè, solum?

Si maneo qualis Troia durante manebam:

Virq; mihi dempto fine carendus erit.

Diruta sunt alijs, uni mihi Pergama restant,

Incola captiuo quæ boue uictor arat.

Iam seges est ubi Troia fuit, ressecandaq; falce

Luxuriat Phrygio sanguine pinguis humus.

Semisepulta uirum curuis feriuntur aratris

Ossa, ruinas occulit herba domos.

Victor abes. nec scire mihi quæ caussa morandi,

Aut in quo lateas ferreus orbe licet.

Quæ sequuntur ab adiunctis trahuntur. Ex suis enim, filijq; factus, & suam in maritum, & filij in parentem pietatem declarat.

Quisquis ad hæc uertit peregrinam littora puppin,

Ille mihi de te multarogatus abit.

Quamq; tibi reddat, si te modo uiderit usquam,

Traditur huic digitis charta notata meis.

Nos Pylon antiqui Nilëia Nestoris arua

Misimus: incerta fama remissa Pylo est.

Misimus & Sparten: Sparte quoq; nescia ueri,

Quas habitas terras: aut ubi lentus abes.

Et hæc quæ sequuntur, ex adiunctorum loco cadunt.

Mire autem affectus mouet: à sua fortuna, dum eam urbem adhuc stare uelle dicit, quam ante maturè ruere à dijs esset precata. Caussas autem subiicit plures, cur id optare potius posset.

Vtilius starent etiam nunc mœnia Phœbi:

Ira scor uotis heu leuis ipsa meis.

Scirem ubi pugnares: & tantum bella timerem:

Et mea cum multis iuncta querela foret.

Quid timeam ignoro: timeo tamen omnia demens:

Et patet in curas area lata meas.

Quæcunq; æquor habet, quæcunq; pericula tellus,

Tam longæ caussas suspicor esse moræ.

Quæ sequuntur à caussarum & euentorum loco sunt. Siquidem eius cognita libido, caussa fuit, cur suspicetur peregrino eum amore captum esse posse: & narrare, quàm rusticam coniugem habeat, quæ tota in tractando lanas sit occupata.

Hæc mihi dum stulte meditor, quæ uestra libido est,

Esse peregrino captus amore potes.

Forſitan & narras quàm sit tibi rustica coniunx:

Quæ tantum lanas non sinit esse rudes.

Fallar: & hoc crimen tenues uanescat in auras:

Nè ue reuertendi liber, abesse uelis.

Quæ sequuntur argumenta ad maturandum reditum  
grauiora

Graviora adferuntur. Reuocat enim coniugem ab Icarij  
 sui parentis imperio, uolentis se alteri nubere: à proco=  
 rum in se multitudine, & uiolentia. Vtrobique autem am=  
 plicat: ibi in fide tamen coniugali semper se mansurā,  
 patremque pudicis suis precibus frangi addēdo: hic procos  
 in se, suasque fortunas & seruos, uiolentiores, uel nomina  
 tim enumerando. Omnia quidem hæc ex adiunctorum  
 trahuntur loco.

Me pater Icarius uiduo discedere lecto

Cogit: & immensas increpat usque moras.

Increpet usque licet, tua sim, tua dicar oportet:

Penclope coniunx semper Vlyssis ero.

Ille tamen pietate mea, precibusque pudicis

Frangitur: & uires temperat ipse suas.

Dulichij, Samijque, & quos tulit alta Zacynthus,

Turba ruunt in me luxuriosa proci.

Inque tua regnant, nullis prohibentibus, aula:

Viscera nostra tue dilacerantur opes.

Quid tibi Pisandrum, Polybum: Medontaque dirum,

Eurymachi que auidas, Antinoique manus,

Atque alios referam? quos omnes turpiter absens

Ipse tuo partis sanguine rebus alis.

Irus egens, peccorisque Melanthius autor edendi,

Vltimus accedunt in tua damna pudor.

Quæ porro sequuntur omnia ad commouendum gra=  
 uissima sunt: eodemque ex adiunctorum loco deprompta.

Argumenta autem ducit, affectusque mouet, à suo sexu

muliebri atque inutili. Laertæ autem senili: & Telema=  
 chi nondum matura ætate, atque periculo. Atque hic à

suo in filium materno affectu, cui sua longiorem vitam precatur, amplificat : enumeratq; , qui domi ex sevis in officio maneant. Deinde quo magis affectus moueat, atque impetret, ad se ut omni abrupta mora reuertatur, repetit Laertæ senectutem minus accommodatam ad capeffendum regnum, Telemachi ætatem nondum maturam, & suas uires muliebres, nullasq; ad resistendum hostibus esse. Quare quod ante proposuit infert, ipse domum citius ut ueniat. Tertio & postremo ad has ipsas personas redit : argumenta que hinc sumit, & mouet affectus : à persona Telemachi, qui filius à patre bonis artibus iam instituendus erat: à persona Laertæ senis, cui iam iam emorituro, filius ipse patri adesset : Denique & à sua persona, que longiore temporis spatio, quod absuit, anus facta uideri posset. Omnia porro hæc, coniux, pater, filius, unde argumenta affectusq; depromuntur, Vlyßi, cui scripsit sunt adiuncta.

Tres sumus imbelles numero: sine uiribus uxor:

Laertesq; senex: Telemachusq; puer.

Ille per insidias penè est mihi nuper ademptus,

Dum parat inuitis omnibus ire Pylon.

Dij precor hoc iubeant, ut euntibus ordine fatis,

Ille meos oculos comprimat, ille tuos.

Hoc faciunt custosq; boum, longæuaq; nutrix,

Tertius immundæ cura fidelis haræ.

Sed neque Laertes, ut qui sit inutilis annis,

Hostibus in medijs regna tenere potest.

Telemacho ueniet, uiuat modo, fortior ætas,

Nunc erat auxilijs illa tuenda patris.

Nec mihi sunt uires inimicos pellere tectis:

Tu citius uenias, portus, & aura tuis.

Est tibi, sitq; præcor natus, qui mollibus annis

In patrias artes erudiendus erat.

Respice Laerten, ut iam sua lumina condas:

Extremum fæti sustinet ille diem.

Certe ego quæ fueram te discedente puella,

Protinus ut uenias facta uidebor anus.

Hinc quæ ex locis amplificandi, copiosèq; suadendi ratio sit, satis declaratum esse puto. Ieiuna nanq; nudaq; non perinde fidem facit oratio, atque ea, quæ per locos ducta, uires contrahat: reluctantemq; commoueat, & tandem secum uel inuitum rapiat. Nos quidem non grauati sumus, pluribus locorum hic usum explicare: quod nemo fere est, quocunque in genere uitæ existat, cui non aliquando suadendum, hortandum, petendum uel sit: ubi, si intelligat unde sumi commode possit, quo cum motu animorum sibi fidem in dicendo conciliet, felicius hunc quæ uolet, ex sententia impetraturum dubium nulli esse debet. Dissuadendi autem quæ sit ratio, ex superioribus satis liquet. Contraria nanque, turpia uide licet, inutilia, impossibilia, difficilia, quibus multum inest periculi, dissuadenda erunt: quæ ex eodem illo adiutorum, cauissarum sumpta loco, unde superiora, ad maiorem fidem motumq; animorum faciendum, & ex reliquis dilatantur amplificanturq;.

Exemplum copiosè ex locis dissuadendi apud

Titum Liuium.

C A P. X.

Scd

S:2

2:5

2:5

2:5

S:2

S:2

S:2

**S**ed & hic exemplo apud T. Liuium, cum in omnibus passim, tum in concionibus eloquentissimum historicum ostendamus, Elegans apud hunc, doctaq; Q. Fabij Maximu extat oratio, neruis: & rerum pōdere per quam munita. Qui cum senex iam nulli Romæ rerum gestarum gloria secūdus, uideret Publium Scipionem admodum iuuenem totam Hispaniam, cæsis, pulsisque Pœnis recuperasse, atq; inde Romam reuersum ingenti fauore populi, & summa spe finiendi per eum Punici belli creatum consulem statuisse cum exercitu in Africam, trahendi ex Italia Annibalis caussa traicere, eaq; de re, eo consilio ad Senatum referre, ut si hic non impetraret, cū populo ageret, rogatus in Senatu sententiam, consilium Scipionis, siue inuidia, siue Reipub. periculo commotus totum improbat: dissuadetq; ante in Africam esse traicendum, quàm Annibal Italia pulsus sit atque fugatus. Exordium, quo animos patrum cōciliat, uiamq; sibi ad dissuadendum sternit: ex adiunctorum loco ducit nempe à caussa, & Africæ prouinciæ circumstantia, Scipionisq;, & sua persona. Sunt enim dicturo adiuncta hæc omnia: personæ eorum, apud quos dicit: aduersarij: sua ipsius: caussa item ipsa: denique locus, & tempus: qua de re: supra de principijs est disputatum. Duo maxime hoc in exordio præstat Fabius. Primum Scipioni odium conflatur: quod de Africa prouincia sibi decernenda ad Senatum se referre simulet, cum uel inuitis Patribus hanc sibi prouinciam dari uellet. Deinde, cum & ipse natura cunctatior ad res gerendas uideri posset: crescentiq; Scipionis gloriæ inuide-

re, omnem suæ cunctationis & inuidiæ suspicionem amouet. Cum igitur animaduerneret Fabius Scipionem, eo consilio ad Senatum de Africa prouincia, quam in eum diem nec Senatus prouinciam censuisset, nec populus iussisset, referre, ut si is non concederet, à populo impetraret, ab hac rerum circumstantia ita est exorsus. Scio multis uestrum uideri Patres Conscripti, rem actam hodierno die agi: & frustra habiturum orationem, qui tanquam de integra re, de Africa prouincia sententiam dixerit. Ego autem primum illud ignoro, quemadmodum certa iam prouincia Africa consulis uiri fortis, ac strenui sit, quam nec Senatus censuit in hunc annum prouinciam esse, nec populus iussit. Deinde si est, consulem peccare arbitror, qui de re transacta simulando se referre, Senatum ludibrio habet: non sententiam modo, qui de quo consulitur, suo loco dicit sententiam. Haëtenus Patrum animos à Scipione abalienauit: nunc subinde suæ cunctationis, atque inuidiæ suspicionem tollit: ab acta sua uita, & moribus, summisq; gestis honoribus: denique ab sua iam ingrauescenti ætate. Atque hic ex comparationis loco, hæc extendit atque confirmat, dum cum filij sui ætate, Scipionis confert: & exemplum rerum à se gestarum à maiori sumptum adducit. Se dictatorem, cum magistro equitum imperium secum æquaretur, rebus quàm uerbis assequi maluisse, ut qui sibi aliorum iudicio comparatus esset, sua mox confessione se sibi præferret, tantum abesse, ut certamina sibi cum adolescente Scipione proponenda esse putet. Atque hinc ex eodem hoc loco, & quidem à maiori, aliud



aliud infert argumentum: quo & Patrum sibi animos admodum conciliat: æquum esse Scipionem sibi ignoscere, si, cum in se ipso pluris semper Rempub. quàm famam hominum fecerit, non ipsius gloriam, bono publico præponat. Atque ego certum habeo, dissentienti mihi ab ista festinatione in Africam traiciendi, duarum rerum subeundam opinionem esse. Vnius, insitæ ingenio meo cunctationis, quam metum pigritiamq; homines adolescentes sanè appellent, dum me non pœniteat adhuc, aliorum speciosiora primo aspectu consilia semper uisa, mea usu meliora. Alterius, obrectationis atque inuidiæ, aduersus crescentem in dies gloriam fortissimi consulis. A qua suspitione, si me neque uita acta, & mores mei, neque dictatura cum quinque consulatibus, tantumq; gloriæ belli domi'que partum uindicat, ut propius fastidium eius sim, quàm desiderium, ætas saltem liberet. Quæ enim mihi æmulatio cum eo esse potest, qui ne filio quidem meo æqualis sit? Me dictatorem, cum uigerem adhuc uiribus, & in cursu maximarum rerum essem, recusantem nemo aut in Senatu, aut apud populum audiuit, quo minus insectante me magistro equitum, quod fando nunquam ante auditum erat, imperium mecum æquaretur: rebus quàm uerbis assequi malui, ut qui aliorum iudicio mihi comparatus erat, sua mox confessione me sibi præferret, nedum ego perfunctus honoribus, certamina mihi atque æmulatiorem cum adolescente florentissimo proponam: uidelicet, ut mihi iam uiuendo, non solum rebus gerendis fesso,

sso, si huic negata fuerit, Africa prouincia decernatur. „  
 um ea gloria, quæ parta est, uiuendum atque morien= „  
 um est. Vincere ego prohibui Annibalem, ut à uobis, „  
 uorum uigent nunc uires, etiam uinci posset. Illud te „  
 ubi ignoscere P. Corneli æquum est, si, cum in me ipso „  
 unquam pluris famam hominum, quàm Rempub. fe= „  
 erim, ne tuam quidem gloriam bono publico præ= „  
 bonam. Hastenus Fabius, sumpto ab adiunctis exordio, „  
 Scipioni odium conflauit, & quo grauior dissua= „  
 lendi autor esset, suæ cunctationis atque inuidiæ suspi= „  
 ionem sustulit: nunc subinde dissuadet, ante Italia esse „  
 discedendum, quàm Pœni hinc pulsî sint atque fugati: „  
 id quæ ductis argumentis ab adiunctorum loco: uideli= „  
 et à persona hostis Annibalis: ab eius incolumi exer= „  
 citu: à multitudine annorum quos Italiam obsideat. „  
 Atque hoc in genere obiter animaduertendum est, pro= „  
 positionem, ut hic, sæpe omitti, cum id, quod suade= „  
 tur, aut dissuadetur, satis eluceat perspicuumq; sit. Sæ= „  
 tis enim hic apparet, Fabium uelle, Italia hostem ante „  
 esse expellendum, quàm in Africam traiciendum: sic „  
 ille. Quanquam si aut bellum nullum in Italia, aut is „  
 hostis esset, ex quo uicto nihil gloriæ quæreretur, qui „  
 te in Italia retineret, etsi id bono publico faceret, si= „  
 mul cum bello materiam gloriæ tuæ ire ereptum uideri „  
 posset. Cum uero Annibal hostis, incolumi exercitu quar „  
 tumdecimum annum Italiam obsideat, poenitebit te „  
 Publ. Corneli gloriæ tuæ, si eum hostem, qui tot fune= „  
 rum, tot cladium nobis caussa fuit, tu Consul Italia ex= „  
 puleris? Subijcit ex similitudinis loco, & sicut penes C. „  
 Lucatium

„Luſtatium prioris Punici perpetrati belli titulus fuit,  
 „ita penes te huius fuerit? Quæ ſequuntur ex compara-  
 tionis loco ſunt petita: ubi hunc hoſtem Annibalem,  
 cum Amilcare parente, ſuperiorisq; belli duce, & hoc  
 ſecundum bellum Punicum, cum primo, denique hanc  
 futuram uictoriam, cum illa ſuperiori conferendo, oſten-  
 dit longe maximam gloriam in hoc hoſte Italia expel-  
 do, belloq; finiendo Scipioni poſitam eſſe. Niſi aut  
 „Amilcar Annibali dux eſt præſerendus, aut illud bel-  
 „lum huic: aut uictoria illa maior, clariorq;, quàm hæc,  
 „modo contingat ut te Conſule uincamus, futura eſt. Ab  
 „Drepano atque Eryce detraxiſſe Amilcarem, quàm  
 „Italia expuliſſe Pœnos atque Annibalem malis? Ne tu  
 „quidem, etſi magis partam, quàm ſperatam gloriam am-  
 „plecteris, Hiſpania potius, quàm Italia bello liberata  
 „gloriatuſ fueris. Nondum is eſt Annibal, quem non  
 „magis timuiſſe uideatur, quàm contempſiſſe, qui aliud  
 „bellum maluerit. Quin igitur ad hoc accingeris? nec  
 „per iſtos circuitus, ut cum in Africam traieceris, ſecutu-  
 „rum te illuc Annibalem ſperes potius, quàm recto hinc  
 „itinere, ubi Annibal eſt, eò bellum intendis? Quæ hiſ  
 „adijciuntur, ab adiunctis argumenis trahuntur, atq; ex-  
 „tenduntur: nempe à natura, atque ordine gerendarum  
 „rerum. Egregiam iſtam palmam Punici peracti belli pe-  
 „tis? Hoc & natura prius eſt, tua cum defenderis, aliena  
 „ire oppugnatum. Pax ante in Italia, quàm bellum in  
 „Africa ſit: & nobis prius decedat timor, quàm ultro alijs  
 „inferatur. Si utrunq; tuo ductu, auſpicioq; fieri poteſt.  
 „Annibale hic uicto, illic Carthaginem expugna. Si alter-

utra uictoria uobis consulibus relinquenda est, prior,  
 cum maior, clariorq; tum caussa etiam insequentis fue-  
 rit. Quæ item sequuntur argumenta, ab adiunctis su-  
 muntur: ab inopia ararij: & à periculis, quæ & urbi  
 Romæ, & ipsi in Africa pugnaturò impendeant. Atque  
 hæc tribus confirmat exemplis ex similitudinis loco pe-  
 titis, ipsius parentum, Atheniensium, & M. Attilij Re-  
 guli. Nam cum quidem, præterquam quòd & in Italia, &  
 & in Africa duos diuersos exercitus alere ararium non  
 potest, præterquam quòd unde classes tueamur, unde  
 com meatibus satisfaciamus præbendis nihil reliqui est,  
 periculi tandem quantum adeatur quem fallit? P. Lici-  
 nius in Italia, P. Scipio bellum in Africa geret. Quid si,  
 quòd omnes dii omen auertant, & dicere etiam reformi-  
 dat animus, sed quæ acciderunt accidere possunt, & ui-  
 ctor Annibal ire ad urbem pergat? tum demum te con-  
 sulem ex Africa, sicut Q. Fuluium à Capua accerse-  
 mus? Quid quod in Africa quoq; Mars communis belli  
 erit? Domus tibi tua, pater, patruusq; intra triginta dies  
 cum exercitibus cæsi documento sint, ubi per aliquot  
 annos, maximis rebus terra mariq; gerendis, amplissi-  
 mum nomen apud exterarum gentes Populi Romani, ue-  
 stræq; familiæ fecerant. Dies me deficiet, si Reges, Im-  
 peratoresq; temere in hostium terras transgressos cum  
 maximis cladibus suis, exercituumq; ipsorum enumera-  
 re uelim. Athenienses prudentissima ciuitas, bello domi  
 relicto, autore æque impigro, atque nobili iuvene, ma-  
 gna classe in Siciliam transmissa, una nauali pugna flo-  
 rentem Rempub. suam in perpetuum afflixerunt. Exter-

„ na, & nimis antiqua repeto. Africa eadem ista, & M.  
 „ Attilius, insigne utriusque fortunæ exemplum nobis do-  
 cumento sint. Proxima ex comparationis loco sunt du-  
 cta : ubi Hispania & Africa comparantur : resq; à Sci-  
 pione in Hispania gestæ enumerando eleuantur, & cum  
 „ ijs, quæ in Africa futuræ sit conferuntur. Næ tibi P.  
 „ Corneli, cum ex alto Africam conspexeris, ludus & io-  
 „ cus fuisse Hispaniæ tuæ uidebuntur. Quid enim simile?  
 „ Pacato mari præter oram Italiæ Galliæq; uectus, Em-  
 „ porias in urbem sociorum classem appulisti : & expo-  
 „ sitos milites, per tutissima omnia ad socios, & amicos  
 „ Populi Romani Tarraconem duxisti : ab Tarracone  
 „ deinde iter per præsidia Romana : circa Iberum exerci-  
 „ tus patris, patruiq; tui, post amissos imperatores fero-  
 „ ciores calamitate ipsa facti. Dux tumultuarius quidem  
 „ ille L. Martius, & militari suffragio ad tempus lectus,  
 „ cæterum si nobilitas, & iusti honores adornarent, cla-  
 „ ris Imperatoribus qualibet arte belli par. Oppugnata  
 „ per summum otium Carthago, nullo trium Punicorum  
 „ exercituum socios defendente. Cætera, neque ea eleuo,  
 „ nullo tamen modo Africo bello comparanda : ubi non  
 „ portus ullus classi nostræ apertus : non ager pacatus :  
 „ non ciuitas socia : non rex amicus : non consistendi us-  
 „ quam locus : non procedendi : quacunque circumspe-  
 „ ris, hostilia omnia atque infesta. Confutat subinde, quæ  
 „ obijci à Scipione possent, quod amicitiam, fœdusq; cum  
 Numidarum rege Syphace in Carthaginenses fecisset.  
 Barbaris enim regibus non esse credendum : probatq;  
 primum exemplis parentum Scipionum, atque ipsius,  
 quæ ex

ex similitudinis, & comparationis loco sumuntur : deinde argumentis ex adiunctorum loco sumptis : nempe à natura, atque ingenijs regum Numidarum, & hostium Carthaginiensium. An Syphaci Numidisq; credis ? Satis sit semel creditum. Non semper temeritas est felix : & fraus fidem in parvis sibi praestruit, ut cum operæ pretium sit, cum mercede magna fallat. Non hostes patrem patrumq; armis prius, quàm Celtiberi socij fraude circumuenerunt. Nec tantum tibi ipsi à Magone, & Asdrubale hostium ducibus, quantum ab Indibili, & Mandonio in fidem acceptis periculi fuit. Numidis tu credere potes defectionem militum tuorum expertus ? Et Syphax & Masinissa, se quàm Carthaginenses malunt potentes in Africa esse : Carthaginenses, quàm quenquam alium. Nunc illos æmulatio inter sese, & omnes caussæ certaminum acuunt, quod procul exterminus metus est : ostende Romana arma, exercitum alienigenam, iam uelut ad commune restringendum incendium concurrent. Aliter ijdem illi Carthaginenses Hispaniam defenderunt, aliter mœnia patriæ, templa deum, aras, & focos defendent, cum euntes in prælium pauida prosequetur coniux : & parui liberi occursabunt. Quæ sequuntur, ex adiunctorum trahuntur loco : periculorumq; magnitudinē, quæ emergere ex Scipionis in Africam traiectione possunt, ostendunt. Quin & similitudo, quò res periculosior uideatur, admiscetur. Confutatio ncula item, non uictum ab eo Asdrubalem, quem in Italia descendere passus sit : quod ab adiunctis est tractum.

Quid porro, si satis confisi Carthaginenses consensu,

„ Africa, fide sociorum regum, mœnibus suis, cum tuo  
 „ exercitusq; tui præsidio nudatam Italiam uiderint, ultro  
 „ ipsi nouum exercitum in Italiam, aut ex Africa miserint,  
 „ aut Magonem, quem à Balearibus classe transmissa iam  
 „ præter oram Ligurum Alpinorum uectari constat, An-  
 „ nibali se coniungere iusserint? nempe in eodem terrore  
 „ erimus, in quo nuper fuimus, cum Asdrubal in Italiam  
 „ transcendit: quem tu, qui non solum Carthaginem, sed  
 „ & omnem Africam exercitu tuo es clausurus, è manibus  
 „ tuis in Italiam emisisti. Victum à te dices? eo quidem mi-  
 „ nus uellem, & id tua, non Reipub. solum causa iter da-  
 „ tum uicto in Italiam esse. Quæ sequuntur, ab adiunctis  
 „ petuntur: firmaq; sunt argumenta. Primum autem dis-  
 „ suadet ab ipsius Scipionis persona: qui quo melior, bel-  
 „ licosiorq; sit, hoc commodius eum Patria totaq; Italia  
 „ retineat. Deinde ab ipsius iudicio, consentientis ibi belli  
 „ esse caput, ubi sit Annibal. Tum à caussa traijciendi,  
 „ quæ fuit, ut Annibalem in Africam secum ex Italia tra-  
 „ heret, atque ibi cum eo manus conferreret: quod minus  
 „ periculose in Italia fieri posse, ubi & collegæ sui exerci-  
 „ tu iuuari possit, recenti Claudij & Liuij coss. exem-  
 „ plo confirmat. Atque hic rem & ex comparationis loco  
 „ exaggerat, atque extendit, dum collatis locis Africa,  
 „ atque Italia, copijsq;, quibuscum aut hic, aut ibi futura  
 „ res sit, ostendit minus periculose in Italia, cum Annibale  
 „ manus conferere posse, ubi & à collega iuuari possit,  
 „ quàm in Africa, ubi soli aduersus plures hostium copias  
 „ sit pugnandum. Figurata quidem & hæc sunt urgendi  
 „ caussa crebris interrogationibus. Patere nos omnia,  
 „ quæ



quæ prospera tibi & populi Romani imperio euenere,  
 tuo consilio assignare: aduersa casibus incertis belli, &  
 fortunæ legare. Quo melior, fortiorq; es, eo magis ta-  
 lem præsidem sibi patria, atque uniuersa Italia retinet.  
 Non potes ne ipse quidem dissimulare, ubi Annibal sit,  
 ibi caput atque arcem huius belli esse: quippe qui præ-  
 te feras, eam tibi causam esse traiciendi in Africam, ut  
 Annibalem eò trahas. Siue igitur hic, siue illic, cum An-  
 nibale est tibi futura res. Vtrum ergo tandem firmior  
 eris in Africa solus, an hic tuo collegæq; tui exercitu  
 coniuncto? ne Claudius quidem & Liuius Consules tam  
 recenti exemplo, quantum id intersit documento sunt?  
 Quid? Annibalem utrum tandem extremus angulus  
 Brutij agri, frustra iam diu poscentem ab domo auxi-  
 lia, an propinqua Carthago, & tota socia Africa po-  
 tentiorem armis uirisq; faciet? Quod istud consilium  
 est, ibi malle discernere, ubi tuæ dimidio minores copię  
 sint, hostium multo maiores, quàm ubi duobus exerciti-  
 bus aduersus unum, tot prælijs, & tam diuturna, & gra-  
 ui militia fessum pugnandum sit? Quæ sequuntur ex con-  
 trariorum, adiunctorum, seu causarum, similitudinisq;  
 loco sunt deprompta. Nam ut magis atque magis Sci-  
 pionis consilium improbaret, à paterno maxime pugna-  
 re, contrariumq; esse ostendit. Ab adiunctis est, atque  
 adeo à causis, non Reipub. commodum hic eum qua-  
 rere, sed sui nominis gloriam uenari: quod subinde re-  
 rum ante ab ipso gestarum exemplo, ducto à simili con-  
 firmat. His adiicit clausulam, atque adeo suam senten-  
 tiam. Quàm compar consilium tuum parentis tui con-

„ filio sit reputa? Ille consul profectus in Hispaniam, ut  
 „ Annibali ab Alpibus descendenti occurreret, & in Ita-  
 „ liam ex prouincia redijt : tu cum Annibal in Italia sit,  
 „ relinquere Italiam paras : non quia Reipub. id utile,  
 „ sed quia tibi amplum, & gloriosum censes esse. Sicut  
 „ cum prouincia, & exercitu relicto, sine lege, sine S. C.  
 „ duabus nauibus populi Romani imperator fortunam pu-  
 „ blicam, & maiestatem imperij, quæ tum in tuo capite  
 „ periclitabantur, commisisti. Ego P. Cornelium P. C.  
 „ Reipub. nobisq; non sibi ipsi priuatim creatum consu-  
 „ lem existimo : exercitusq; ad custodiam urbis, atque Ita-  
 „ liæ scriptos esse: non quos regio more per superbiam con-  
 „ sules, quò terrarum uelint traijciant. Animaduertendum  
 „ autem, quod ipsum & sæpius diximus, omnia hic, qui-  
 „ buscunque ex locis ad fidem, motumq; animorum du-  
 „ cantur, in caussas conuerti, cur non ante in Africam  
 „ traijciendum Scipioni putet, quàm Annibal hostis Italia  
 „ pulsus sit atque fugatus.

### De dispositione & exordio.

C A P.

X I.

**O**Mnia quæ in suadendo & dissuadendo ad fidem,  
 copiamq; orationis adhibentur, ex locis sumi, cum  
 nostris, tum apud Oratores, Poëtas, Historicosq;, exem-  
 plis ostendimus : nunc subinde, & quæ hoc in genere di-  
 sponendi ratio sit, paucis erit dicendum. Quò enim co-  
 piose inuenisse ualebit, nisi recte disponas? Totidem igi-  
 tur & hic, quot in superiori genere, orationis erunt par-  
 tes. Principium conciliandorum animorū caussa adhibe-  
 tur. Sum

tur. Sumitur autem, ut supra, à personis, nostris, dissentientium, & eorum quibus cōsiliū datur: à loco item, & tempore: denique à causse circumstantijs: quæ ut pro caussa subinde aliæ atq; aliæ sunt, ita unus ille adiunctorum locus, omnium, unde duci debeat nos admonet. Qua de re, cum supra copiosius disputatum sit, nihil attinet hic repetere. Vnus certe adiunctorum locus, eorum omnium, unde sumi possit nos admonet: quæ si magis extendere, atque ad motum animorum dilatare uelis, & per cæteros locos ducas licebit. Verum cum hoc in genere, ij, quibus suademus, aut dissuademus, nobis frerē sint conciliati, longiore non opus erit exordio: adeo, ut quod equidem minus probo, interdum omittatur. Nam ut breui quidem contenti esse possumus, ita totum omitti, & abrupte exordiri, quod in rebus omnibus naturaliter aliquid sit primum, probari quī potest? Quod si uero male audias, aut inuidere, aut tui compendij rationem habere uidearis, cōnibus uiribus ad conciliandum, purgandumq; erit abutendum. Itaq; pro caussa, hæc moderanda erunt omnia.

De narratione, & propositione: & quibus illa sumatur ex locis.

C A P. XII.

**R**Aræ hic, breuesq; si quæ narrationes sunt. Suius Cicero Populo Romano bellum in Mithridatem esse suscipiendum, & Cn. Pompeiū Imperatorem huic præficiendum, breui narratione, quid ab hostibus pararetur, populum docuit. Sumitur autem, si qua incidit, ab adiunctis: nempe ab ijs, quæ gesta sunt, gerantur, n 4 sintq;

sintq; futura bona mala'ue. Cæteris ex locis narrationes, quòd breues esse solent, debentq;, non ferè multum amplificantur: adeo, ut ne ex hoc quidem loco, omnes circumstantias sumant. Porro sæpius hic omnino nulla narratio est: propterea, quòd ij, quibus consilium datur, res ipsa, caussa'q; tota sit cognita: aliunde tamen incidere possunt, quæ exponi oporteat. Quare breui propositione, quæ ferè semper est necessaria, quid suasurus, aut dissuasurus uenias, erit indicandum: quæ tamen & ipsa, cum satis apparet, quid agas, interdum omittitur: ut in proximo exemplo uidimus. Nam cum ipso exordio Fabius satis indicasset, displicere sibi Scipionem in Africam trajicere, nihil attinebat id certius proponendo facere. In epistolis, scriptisq; breuioribus, interdum in finem usque propositio differtur. Porro conclusio, repetita propositio est, & per omnia eadem. Dicitur autem propositio, cum ante conflictum argumentorum probanda ponitur: conclusio, cum ex rerum argumentorumq; pugna, confirmata ducitur. Diuisione item, si pluribus de rebus dicendum sit, nos hic uti posse animaduertendum est: ut Cicero, primum se de genere belli, deinde de magnitudine, postremo de Imperatore deligendo se dicturum dixit.

## De confirmatione.

## CAP. XIII.

**E**Xposita res, seu modo proposita, argumentis erit probanda. Atque hic primum commode de honestate, deinde de utilitate, tum de necessitudine dixerimus: de qua, quanquam duobus illis, honesto atque utili

utili comprehendatur, seorsum tamen sæpe oratio est: postremo possibilitas, & si fieri potest facilitas etiam erit ostendenda. Frustra enim honestum, aut utile esse contendas, si præ difficultate minus fieri potest. Sed & hunc ordinem nutes licebit: primumq; de utilitate, deinde de honestate dicas. Habenda autem eorum, quibus consules, ratio diligenter. Nam si doctos viros esse, uirtutemq; sequi intelligas, plurima tibi de honestate erit oratio: sin uero rudiores, omniaq; utilitate metiri uideas, commoda maxime, atque euentura emolumenta erunt ostendenda. Quod si uero quid ab aduersario sit obiectum, aut obijci possit, erit id omnibus hic modis confutandum. Neque enim quæ uoles alijs recte probes, nisi ea ex animis hominum interim tollas, quæ in diuersum rapiunt atque trahunt. Quæ in suadendo, eadem & in dissuadendo, quod contrarijs constat officijs collocandi, confirmandiq; ratio est. Quibus autem ex locis confirmatio sumatur, explicatum est.

## De epilogo.

## CAP. XIII.

**P**ostquam autem ijs, quæ nocitura erant refutatis, tua satis argumentis confirmaris, rerum pondera, atque firmamenta, epilogo deinde erunt repetenda, affectusq; mouendi. Quæ pars orationis, cum tota ad amplificandum, motusq; animorum accommodetur, licebit hic, si caussa postulat, in locos communes excurrere: & prosopopœias admiscere: eaq; omnia, quæ ad concitandum ualent, de quibus supra in exor-  
natione diximus adhibere. Atque hæc item, quibus su-

tur ex locis, demonstratum est.

De eloquutione seu exornatione.

C A P.

X V.

**P**ostquam autem copiose inuenerimus, recteque collocauerimus, eo omnia uerborum, figurarumque genere erunt exornanda, atque enuntianda, ut doceamus, delectemur, et moueamus: de quibus tribus oratoris officijs, cum pluribus supra dixerimus, eademque huc pertineant, nihil eorum hoc loco repeti oportere putamus. Quae item de actione, et quinta ultimaque rhetorices parte ipsa memoria nobis uidebantur, supra diximus.

τίλθ.

GERARDVS BVKOLDIANVS  
LECTORI  
S. D. P.

**D**VM quartum librum de genere iudiciali, quem forte desideras, scribendum suscipio, Hippocratae atque Galenus è medio me cursu quasi longius digressum ad grauissima <sup>ιατρικῆς</sup> studia reuocant: ad quos a lege redeo, ut illorum pace mihi & hunc aliquando addere liceat. Magna enim omnium artium inter sese cognatio est. Itaque & ipse Galenus, ex quingentis, aut ultra quos scripsit libris, complures & his ipsis de rebus, ut magno futuro medico admodum necessarios edidit. Quare quanquam hoc tempore foro explosa sit eloquentia, nullusq; propemodum in iudicio oratori relictus sit locus, tamen, cum omnes ferè Ciceronis orationes hoc in genere uersentur, & hic locorū usum ostendisse iuuabit: & hoc magis, quod in Topicis Cicero, proprios cuiusque status locos non recte indicasse uideatur. Quapropter & quartum si aliquando librum de usu locorum in genere iudiciali addo, ab hoc nostro Gryphio de studijs literarum optime merito expecta. Vale.













